

# WANTOK

NIUSPEPA BILONG OL PAPUA NIUGINI STRET

Ernst & Young audited/  
circulation 15,177

56 pes

Namba 891

Wik i stat long Fonde 1 Ogas, 1991.

40 toea

Sapos i no gat moa gavman sapot...

## Kopra bisnis bai pinis

DAVID WAMBI i raitim

KLOSTU bai olgeta mani bilong Kopra Stebilaisesen Fan i pinis. Na Papua Niugini Kopra Maketing Bod i askim gavman long givim em K4 milien olsem bai fan inap go het na wok long narapela 6-pela mun.

Las kibung bilong bod i bin kamap long mun Julai long Rabaul, Is Nu Briten provins. Ol memba i bin kisim tok save long dispela taim olsem fan i gat K709,378 i stap long beng.

Long 31 Me, 1991, dinau em kopra fan i kisim i abrusim mak bilong K18 milien. Dispela dinau i kamap bihain long fan i kisim K4 milien dinau long Stabex, gavman i bin givim K14 milien na CMB i kisim K20 milien dinau.

Gavman i bin givim narapela K3 milien tasol dispela tu i pinis.

Siaman bilong CMB, Joseph Bae i tok Kopra Stebilaisesen Fan i mas kisim narapela K4 milien o moa bilong sapotim prais bilong kopra nau i go daun olgeta.

I gat tupela bikpela samting i bin kamap we i bagarapim prais na mak bilong kopra long kantri. Namba wan em prais bilong kopra long wol i go daun olgeta. Na namba tu, gavman i bin rausim 30 pesen sapot bilong en long namba wan hap bilong dispela yia.

Long namba wan 6-pela mun, prais bilong kopra i pundaun i kam daun long K165 long wanpela tan. Tasol insait long kibung bilong en long Rabaul, bod i tingting long apim prais i go antap long K175 long kopra ol i smokim. Dispela i min i go moa long pes 2



Kumul i stap laip yet long Hagen • Pasto Andrew Laip (Iephan) wantaim kaunsil bilong Tapaka viles long Nebilya, Westen Hailans provins i bin pulim planti man, meri na pikinini tru long Hagen taun long las wik Fraide. Long wanem tupela i karim tupela kumul pisin em i no dai yet na traim salim long taun. Kos bilong wanpela em K100. Foto: Alphonse Pu.

## Planti Hailans MP i no givim ripot long ilektorel mani bilong ol

GAVMAN i bin skelim moa long K16 milien i go long ol 109 memba bilong nesenel palamen long 1989. Dispela mani i bilong ol memba long yusim long helpim ol pipel long ol ilektoret bilong ol.

Mipela i save kolim dispela mani olsem ilektorel Developmen Sektorel Program Fan (EDSPF) o Nesenel

Developmen Fan (NDF).

Wanpela ripot i soim olsem wan wan palamen memba i bin kisim K50,000 long dispela yia bilong yusim long ilektoret bilong ol. Wanpela memba tasol husat i no kisim K50,000 sek mani bilong em long dispela taim em memba bilong Rabaul, John Kaputin. Olsem na dispela mani

i go bek long gavman.

I gat 7-pela memba tasol i bin yusim gut tru EDSPF mani bilong ol long 1989. Dispela ol lain em olpela namba tu praim minista, Ted Diro, Sir Julius Chan (Namatanai), Sir Pita Lus (Maprik), Sir Hugo Berghuser (Nesenel Kapitel Distrik), Bernard Narakobi (Wewak), Andrew Rudaka (Goilala),

Albert Kipalan (Wabag) na Jim Sauk (Kandep).

Namel long ol lain husat i no givim ripot long rot ol i bin yusim EDSPF em praim minista Rabbie Namaliu. Ripot i tok Namaliu i no bin givim wanpela ful ripot, ripot bilong beng, NDF aplikesen na ol narapela fom bilong dipatmen.

Na long dispela wik, Wantok Niuspepa i laik

lukluk na skelim wanem samting ol memba bilong Hailans rijon i mekim long NDF mani bilong ol.

**ISTEN HAILANS:**  
**Aita Ivarato** (Isten Hailans rijonal) i kisim sek namba 021206. Memba i no givim yet ripot; **Mathias Ijape** (Goroka) i kisim sek namba 021232 na i no givim yet ripot; **Gai Duwabane** (Daulo) sek

namba 021278. Memba i no givim yet ol beng ripot na NDF fom. I bin kisim K49,976.26; **Jerry Kavori** (Lufa) kisim sek namba 021019 na putim long Indosuez Beng, Goroka. I no givim ol beng ripot. I bin kisim

K50,628; **John Giheno** (Henganofi) sek namba 021277. Bengim wantaim Westpac long

i go moa long pes 2

INSAIT



• Engliken Asbisop kam long Papua Niugini...pes 6

• Mani i lus long Panguna...pes 4

• Kakao plantesin i no gutpela long Kimbe...pes 5




• 20 pes trenspot na konstraksen saplimen

• Morobe provin-sal gavman pundaun...pes 7

12 pes Ragbi Lig Nius

NEKS WIK:

100 yia bilong Engliken Sios



**DAIHATSU  
STRONGPELA**

DISPELA DELTA TRAK  
I GUTPELA LONG OL  
KAIN ROT BILONG YUMI.  
LUKIM DISPELA LONG  
ELA MOTORS NAU!



*Daihatsu  
Dan*

**ELA MOTORS**



PORT MORSBY 22940 • LAE 43855 • RABAU 52198 • MADANG 82188 • GOROKA 22184 • MT HAGEN 52188 • WEWAK 86276  
POPONDETTA 29266 • KAVIENG 94212 • KIMBE 53515 • TABUILI 58880 • VANIMO 87124 • POKGARA 58203

ELA MOTORS I SAPOTIM  
YUN JUNG DO

MEMBA BILONG BURNS PHILP PNG LIMITED

# PLIS



# RIPOT

**KAVIENG:** Nesenel Kot long Kavieng i sasim pinis Daniel Clifford bilong Palakau viles long Mussau, Ailan Nu Ailan provins. Kot i harim olsem Clifford i kilim wanpela plisman long Kavieng ples balus long Me.

Clifford wantaim sampela pren bilong em i bin kilim plisman ya long Kavieng ples balus. Plis ripot i tok olsem plisman ya Joe Wurwur i bin wok na draiv i go ples balus. Taim em i kamap Clifford i kamap na sutim em insait long ka bilong em.

Kot i harim olsem Clifford i gat sampela rekot bilong plis olsem em i bin stilim sampela samting bipo na em i bin go long kalabus tasol em i ranawe.

• Long Trinde 24 Julai, Kavieng Distrik Kot i sasim Branson Panua bilong Mussau Ailan. Panau bai i bin kalabus inap 11-pela yia olgeta bihain long em i kilim Moses Iwai.

Iwai i bin mekim pasin nogut long wanpela meri Mussau. Ol yanpela manki bilong Mussau i belhat na laik kilim Iwai. Iwai i ranawe na Panau i painim em na kilim em insait long Kavieng taun. Ol plisman i mekim wok painim aut yet long holim ol arapela man husat i stap wantaim Panau.

**MOSBI:** Wanpela draiva bilong PNG Motors i dai bihain long em i bin kisim sampela wan wok bilong em i go long Pari viles long Fraide apin-un.

Ripot i tok Seta Jacob bilong Milen Be provins i kapsaitim ka taim ol spakman i tromoi stone long em. Jacob i abrusim rot na sutim nus bilong ka long sait bilong rot.

Long dispela taim ol spakman i kam aut na paitim em. Long wankain taim ol wanwok bilong em i ranawe. Ol plisman i no holim ol dispela spakman ya yet.

• Ol plisman i painim yet ol raskel husat i bin kilim pe masta bilong Dipatmen bilong Pesenel Menesmen Mista Kevau Hau long las wik Fraide.

Ripot i tok Hau bilong Kivoe viles long Sentrel provins i bin draiv i go long Edministretiv Koles taim em i painim bagarap. Ripot i tok sampela man i bin stapim ka na paitim em. Em i dai taim em i kamap long haus sik bikos em i lusim planti blut.

Mista Inguba i tok olsem ka we ol dispela raskel i yusim long kilim Hau em i wanpela waitpela Nissan Cedric i gat giaman registresen namba AGI 841.

**MADANG:** Madang plis i holim pinis 5-pela man husat i kilim narapela man na haitim bodi bilong em. Ripot i tok ol plisman painim bodi bilong dispela man na bihain ol i holim dispela faipela man long tupela wik i go pinis.

Ol plisman i bin kisim toksave long ol arapela man husat i stap klostu long ples we man i dai long en. Ol plisman i bihainim smel i go na kamautim bodi bilong dai man ya.

Ol man ya i tokim ol plisman long husat ol man i kilim em. Ol man ya bai stap long sel bilong plis stesen i go inap kot bilong ol i kamap.

**KUNDIAWA:** Moa long 100 yangpela sapota bilong Kundiawa Warrior ragbi lig tim i bin bagarapim stret Collins & Leahy supamakot stoa long Kundiawa taun.

Plis ripot i tok olsem ol i kamapim dispela pasin bikos Collins & Leahy kampani i no laik long helpim ol i go bek long Kundiawa bihain long wanpela bikpela pait ol i bin kamapim long Goroka.

Pait i kamap bihain long Inta siti gem namel long Goroka Nokondis na Kundiawa Warriors. Ol sapota bilong Warriors i statim pait taim Goroka i dro wantaim ol Warrior long 10-10.

Toktok i kamap long ol pipel bilong Asaro na ol i pasim rot long ol sapota bilong Kundiawa Warriors. Na ol i no kaikai long Sande nait na Mande. Dispela i kirapim bel bilong ol long daunim olgeta samting ol i lukim i no stret long tingting na ia bilong ol.

## Gordons Intanesenel praimerri skul senisim stail

ANNA SOLOMON i raitim

GORDON Intanesenel praimerri skul long Nesenel Kapitel bai kamap olsem namba wan intanesenel skul long kantri long statim narapela kain stail bilong skul. Dispela senis bai kamap taim 1992 skul yia i stat.

Intanesenel Edukesen Ejen-si (IEA) bod i bin holim kibung long 5 Jun na tokaut long daunim skul fi long 25 pesen. Skul fi bilong nau em K2,696 long wanpela pikinini.

Bod i kamap wantaim dispela tingting bikos em i ting dispela bai gutpela na inap helpim komyuniti em i wok long en. Olsem na ol i ma'rim pinis wanpela komiti bilong sekap na ripot long wanem kain samting bai ol sumatin i lainim long skul. Ol memba bilong komiti em ol memba bilong skul bod, IEA na ol tisa yet.

Dispela komiti i save bung olgeta taim na i bin kamap wantaim ol dispela tingting:

• samting bilong ol tisa i skulim ol studen bai bihainim

laik bilong ol lain husat i salim ol pikinini long dispela nupela skul. Bikpela samting bilong tism long skul bai sut long lnglis, Saiens, teknoloji, histori, kalsa na sosaiti bilong Papua Niugini. Bai i gat bung tu wantaim ol papamama bilong toktok long dispela samting.

• Ol tisa bilong ol dispela skul em ol bikpela saveman na meri bilong Papua Niugini yet na wan wan ovasis tisa.

Olgeta tisa na wokman na meri long skul bai kisim tu trening na sapot bilong

mekim gut wok bilong helpim ol sumatin.

• Gordon bai i stap yet olsem ful memba bilong Intanesenel Edukesen Ejen-si. Dispela i min olsem em bai kisim olgeta samting em ol arapela intanesenel praimerri skul i kisim i kam long ejensi. Na ejensi bai sekap long wok bilong skul na ol tisa.

• Sapos i gat planti lain i laikim dispela kain skul, ol bai opim tu wanpela haiskul.

• Ol bai stat kisim nem bilong ol pikinini long 2 Oktoba na i luk olsem planti nem bai kap-sait.

## Kiunga i gat nupela haus sik nau



• Dispela em ol namba wan sikman husat i bin kamap long kisim marasin long nupela Kiunga haus sik. Ol i bin opim nupela Kiunga haus sik long dispela wik.

## Ol saveman bilong solwara i wok nau long Papua Niugini

TUPELA saveman long ovasis i wok wantaim Trensport Dipatmen nau long stretim ol hevi bai i kamap long solwara.

Trensport Dipatmen i wok strong nau long stapim ol hevi em bai i kamap long ol wara na solwara. Bikos wok bilong main na wel i kamap bikpela nau long kantri.

Ol hevi em bai i kamap em wel wantaim ol pipia marasin bilong ol maining bai i go long solwara. Na i ken bagarapim laip bilong ol abus na man tu wantaim.

Seketeri bilong Trensport Dipatmen, Brian Amini i tok bikpela wok maining i wok long kamap long kantri. Olsem na ol i mas sambai long ol hevi em bai i kamap long bihain taim.

Long dispela as na dipatmen i kisim tupela save-man i kam long ovasis long helpim. Nem bilong tupela em Paul Eccles na Alexander Buabeng.

Paul Eccles i bin seketeri bilong wanpela grup long Australia husat i save wok long solwara. Em i lukautim wanpela bisnis nau long Australia yet.

Alexander Buabeng i bilong Afrika. Em i bin wok wantaim wanpela grup husat i save wok wantaim ol samting bilong solwara. Em bai i wok long sait bilong lo, na lukluk long ol hevi i kamap long solwara na abus long solwara.

Wok bilong Mista Eccles em long lukluk gen na stretim ol rot, na plen bilong grup husat i save raun long solwara long sevim ol man na samting i stap long hevi. Em bai mekim tu ol plen bilong nesenel wel insait long kantri.

## Planti Hailans memba i no givim ripot ....

i kam long pes 1

Goroka na kisim K54,180.43. No gat beng ripot i kamap ples klia; **Avusi Tanao** (Kainantu) sek namba 021252 na bengim long Westpac Kainantu. I bin kisim K48,765.20 tasol i no gat ripot long husat i bin kisim mani, wanem kain projek i stap long ilektoret na nem bilong ol ples long wanem hap mani i go long en; **Peter Gaige** (Obura-Wone-nara) sek namba 021216 bengim mani long Westpac Goroka. I bin kisim K50,926.91. Givim ful ripot tasol; **Ben Sabumei** (Unggai-Bena) sek namba 021239 i putim long PNGBC Goroka. I bin kisim K50,975.40 na olgeta ripot i kam bek. Em i no givim tasol ol NDF aplikesen fom.

**ENGA:** **Malipu Balakau** (Enga) sek namba 021273. Mani i go bek taim em i dai; **Jimson Sauk** (Kandep) sek namba 021292 na putim long Beng bilong Saut Pasifik, Hagen. Kisim K49,750. Givim olgeta ripot na fom bilong em; **Tom Amaliu** (Kompiani/Ambum) sek namba 021245 na bengim wantaim Niugini Lloyds beng long Mosbi. I bin kisim K50,200 na i no givim NDF aplikesen fom bilong em; **Tenda Lau** (Laiagam/Porgera) sek namba 021241 tasol ol i no inap painim rekot bilong em; **Albert Kipalan** (Wabag) sek namba 021282 na bengim long Niugini Lloyds, Mosbi. I bin kisim K49,925. Memba i bin givim olgeta ripot bilong em; **Masket langalio** (Wapenamanda) sek namba 021218 na putim long pasbuk akaun long Westpac, Waigani. I bin givim K49,499 long 37 projek. Sampela moa ripot i mas kamap yet.

**SIMBU:** **Peter Kuman** (rijonal) sek namba 021223 i go long beng akaun long Beng ov Saut Pasifik, Boroko. Yusim K2,350. No gat ripot bilong ol NDF fom; **Brown Sinamol** (Suave) sek namba 021234. No gat wanpela ripot i soim sapos sampela wok i bin kamap long mani; **Bill Ninkama** (Gumine) sek namba 021236 na bengim long Beng ov Saut Pasifik, Kundiawa. Yusim K50,000 long 98 projek. Givim sampela ripot tasol; **Pawa Sisioka** (Karamui) sek namba 021238. Tokaut

olsem em i no asua; **Jim Yer Waim** (Kerowagi) sek namba 021283 na bengim long PNGBC, Boroko. I bin givim K28,819.84 long 4-pela projek. No gat rikot bilong narapela K21,180.16 na ripot em i givim i no gutpela; **Wagi Merimba** (Kundiawa) sek namba 021203 na bengim long PNGBC, Kundiawa. Yusim K49,780.16 long 40 projek. Givim ful ripot; **John Numi** (Sinatina-Yongumul) sek namba 021275. No gat ripot.

**SAUTEN HAILANS:** **Wiwa Korowi** (rijonal) sek namba 021250. No gat ripot bilong mani na ol projek; **Roy Yaki** (lalibu/Pangia) sek namba 021291 na bengim long ANZ Beng long Waigani. I bin yusim K50,011.10 long 32 projek. I no givim ol NDF ripot bilong em; **Anthony Temo** (Imbongu) sek namba 021294. No gat ripot i klia; **Marabae Makiba** (Komo-Magarima) sek namba 021222 na no gat ripot; **William Ank** (Mendi) sek namba 021281 na bengim long PNGBC, Mendi. I tok olsem em i bin givim K82,195 long 30 projek. Tasol ol rekot i soim olsem em i no yusim wanpela mani; **Haralu Mai** (Tari) sek namba 021209. Rekot i lus; **Philemon Embel** (Nipa-Kutubu) sek namba 021200 tasol no gat mani ripot i klia;

**WESTEN HAILANS:** **Paia Wingti** (rijonal) sek namba 021219 na bengim long Westpac, Waigani. Yusim K45,000 long 10-pela projek. Memba i no givim yet ol ripot na pepa; **Michael Mel** (Aglimp/Saut Wahgi) sek namba 021237 na bengim long PNGBC, Hagen. Yusim K49,900 long 13 projek. Olgeta mani i go stret long ilektoret; **Joel Paua** (Baiyer-Mul) sek namba 021276 na bengim long PNGBC, Boroko. Yusim K51,260 long 56 projek. Givim ol beng ripot na hap ripot bilong mani; **Melchior Pep** (Dei) sek namba 021261 i bengim long PNGBC, Hagen. Yusim K49,963 long 47 projek. Givim ful ripot; **Paul Pora** (Hagen) sek namba 021231.

• Long neks wik, mipela bai lukluk na skelim NDF mani bilong ol nesenel memba long Momase na Niugini Ailan rijon.

## Kopra bisnis bai pinis nau

i kam long pes 1

olsem bod yet i putim K10 antap long olgeta tan kopra ol groa i salim.

Long nau yet, bod bai inap strongim prais bilong kopra long dispela mak i go inap long pinis bilong yia 1991. Tasol long neks yia, Bae i salim tok lukaut long ol groa olsem mak bilong mani ol i save kisim long wanpela tan bai kam daun long K20. Bikos gavman bai katim gen mani bilong bod long narapela 15 pesen. Na dispela i min tu olsem bod i no inap long givim sapot wantaim dispela K10 olsem pastaim.

Dispela i min tu olsem mak bilong kopra em Papua Niugini i save kamapim bai pundaun i kam daun olgeta. Na abrusim 100,000 tan mak bilong 1959.

Wantaim ol dispela hevi nau i kamap long kopra bisnis, bod i laik traim long grisim na mekim ol groa i amas liklik na go het yet long lukautim na bungim kopra.

# Ol helt woka bai kisim kompensesen mani

DOMINIC KAKAS I rattim

OL wokman bilong Helt nau bai i kisim sampela mani antap long pe bilong ol long lukautim ol yet. Bikos nogut ol i kisim long ol sikman.

Dipatmen bilong Pesenel Menesmen nau i lukluk i go insait long dispela. Dipatmen bai i mekim wanpela askim pepa long dispela samting i go long kabinet long lukluk long en.


Ektng Prait Minista na minista bilong Pablik

Sevis, Akoka Doi i tokaut long dispela long taim ol i opim nupela Mosbi Jenerel haus sik long Tunde.

"Ol wokman bilong haus sik i save stap klostu wantaim ol sikman olgeta taim. Na dispela i isi tru long ol i kisim sik bilong ol sikman. Olsem na ol i mas gat sampela kain kompensesen mani bilong ol.

Gavman bai i sapatim wanem kain trening Helt Dipatmen i kamapim long ol haus sik na helt senta long we bilong lukautim na ranim opis. Doi i tok Gavman wantaim dipatmen i lus tingting long dispela sait.

## Ol mama i bung long tingim Wol Populesen De 1991



• Ol mama na sampela bikman insait long Mosbi i bung long Boroko long opim na tingim Wol Populesen De long Trinde 31 Julai, 1991.

# Diro i laik pinisim Amet

OLPELA namba tu praim minista, Ted Diro i laikim siaman bilong Lidasip Traibunel, Jastis Arnold Amet long pinis.

Diro i tok olsem long wanem Jastis Amet i save gut tru long Jastis Barnett. Jastis Barnett em Komisina bilong Fores Enkwairi. Dispela fores ripot tasol i tokaut long ol sas bilong Diro em nau kamap long traibunel. Jastis Barnett i stap nau long ples bilong em long Australia.

Diro i tok aut long dis-

pela long wanpela pepa em loya bilong em, Loani Henao i bringim kamap long Traibunel long Trinde.

Askim bilong Diro i bihainim sampela stori em i kisim long meri bilong Jastis Barnett, Lila Barnett nau i stap tu long Australia.

Diro i tok em i ringim Misis Barnett i long 29 Julai em na i tokim em olsem Jastis Amet i bin tokim Jastis Barnett long wanem ol samting nau i wok long kamap long Lidasip Traibunel.

Em i tokim Diro tu

olsem taim ol i stap long PNG na kros, Jastis Barnett i save toktok oltaim long ol samting long Fores Enkwairi. Em i laik bai Diro i mas kisim taim.

Praivat seketeri bilong Diro, Elma Kila i toktok tu wantaim Misis Barnett. Misis Barnett i tokim Elma olsem em i laik salim sampela pepa i go long Diro. Ol pepa ya i toktok long Fores Enkwairi.

Elma i tok Misis Barnett wantaim Jasits Barnett i no stap wantaim man bilong em

nau. Tupela i wok long pait nau long kot long painimaut husat bai i kisim pikinini bilong ol. Misis Barnett i tok long wanpela taim long kot, Jastis Barnett i tok PNG em i wanpela lus kantri. Na ol man i save kaikai ol narapela man yet.

Misis Barnett i tok tu olsem Jastis Barnett i wok long kisim sapat bilong ol PNG studen i skul long Australia. Na em i wok long tokim ol olsem Diro i mas kalabus.

# Minista luksave long hevi bilong ol Kokopo plantesin woka

OL wokman bilong ol plantesin long Kokopo eria, Is Nu Briten provins i no save kisim gutpela pe. Na tu i no gat gutpela kaikai, wara na ples bilong slip.

Minista bilong Leba na Emploimen, Tony Ila i tokaut long dispela bihain long wanpela lukluk raun bilong em i go long eria long dispela wik.

Ila i tok planti long ol dispela wokman i save kisim liklik pe tru. Dispela pe em liklik tru long pe ol i mas kisim aninit long lo bilong leba long kantri. Sampela papa bilong plantesin i no bihainim lo. Ol toilet, ples bilong slip na wara i no gutpela bilong ol man long stap long en.

Em i tok ol manmeri bilong PNG yet

i mas kamap plantesin menesa long bipo yet. Tasol nau em i painimaut olsem ol waitman i lukuatim ol plantesin yet. Ol dispela waitman i ting ol i stap yet aninit long Australia.

Minista i askim ol plentasin menesa long lainim ol manmeri bilong PNG yet long kamap ol plantesin menesa. Em i tok sampela taim ol menesa i no save harim ol askim bilong ol wokman long kompensesen mani.

Em i tok maski pe bilong kakao, kopra nau i go daun tru, ol menesa i mas lukim ol wokman olsem ol man, na i no olsem ol pik na dok. Ol i mas luksave long sindaun bilong ol wokman, na tu lukluk long pe bilong ol.

# Planti Yunitek studen i feil

YUNIVESITI ov Teknoloji long Lae i kisim tasol 72 skul manki bek long wokim namba tu semesta o skul yia bilong 1991.

Long namba wan semesta, moa long 1,000 studen i lusim skul, bikos ol i no wokim tes. Long dispela as na olgeta i stap olsem feil. Na ol bai i no inap long kam bek long stadi.

Ektng Asisten Rejista, Goodnews Aruai i tok ol i lukluk long kisim bek 170 studen long kam mekim namba tu semesta stadi bilong ol long dispela yia. Tasol dispela lukluk bilong ol i abrus, na 72 studen tasol i kam

bek. Olgeta namba bilong ol skul manmeri long Yunitek i olsem 1,333.

Mista Aruai i tok taim hevi ya i kamap long tupela Yunivesiti wantaim, ol studen bilong Yunitek i no bin mekim tes. Long dispela as na olgeta i feil nau.

Em i tok ol i lukluk long kisim moa studen long 1992 skul yia. Planti bai i kam long Gret 12 long ol neserel haikul insait long kantri. Sampela em ol manmeri husat i wok pinis, na i laik go bek gen long skul.

# Gavman oraitim bingo bisnis

GAVMAN i oraitim pinis lo bilong ol haus bilong pilai bingo na laki long kamap insait long kantri. Dispela em i wankain liklik long ol hotel.

Memba bilong Kompian Ambum, Tom Amaiu i tok ol arapela kantri i gat pinis ol haus bilong pilai bingo na laki. Na i wok gut tru. Em i tok ol kantri long Pasifik tu i gat ol haus kasino na i kamapim gutpela helpim tru long kantri bilong ol.

Em i tok nau gavman i orait pinis long haus kasino o bingo na laki i kamap. Bikos dispela bai i kamapim kain helpim olsem;

- Moa mani i go long gavman,
- Pulim moa turis o ovasis manmeri i kam bai PNG i mekim moa mani,
- Kirapim wok bisnis na

- Kamapim wok long ol kamap long kasino.
- manmeri bilong yumi. Tasol gavman yet i
- Em i tok i gat hevi i mas go pas long em.

**FRI BAIBEL KOS**  
**YU KEN KISIM SKUL**  
**LONG SALIM PAS**  
 (Salim nem na edres long: WORLD BIBLE SCHOOL, Dept. VD22, P.O. Box 9346, Austin, TX 78766 USA)

**TOR TOO**  
 TORO PUTIM T-SIOT BILONG PEPSI FAN RAN NA BIHAINIM OL MANMERI I RON...

**EM ASKIM WANPELA MAN LONG ROT...**  
 HEY, TOBRAE! BAI YUMI RON IGO WE?.. MI NO SAVE YA!  
 WAGANI... (PUFF) SPOTS... (PUFF) STADIUM.

**TASOL TORO INO HARIM GUT...**  
 HA! HA! HA! YUPELA GO LONG WAGANI... MI GO LONG STADIUM.  
 SWOOSH!  
 NAU EM TANIM GO BEK.

**EM GO KAMAP LONG KONE-DOBU MEIN STADIUM NA WETIM OL...**  
 HURAY!! MI FES MAN LONG KAMAP!! MI WIN! MI WIN! YAHOOO!

**TARANGU EM WET I GO NAIT NAU NA EM BELHAT NOGUT TRU...**  
 BLARY GEXE! WANTOK SISTEM YA! OL OPIKALG LAIK GIVIM PRAIS LONG YAMO LAUNA, NA MI OLSEM WANEM, A?  
 TASOL SAMTING TRU EM OLGETA RON IGO LONG NIUPELA SPOTS STADIUM I LONG WAGANI!

# WANTOK

NIUSPEPA BILONG OL PAPIA NIUGINI STREET

## Gavman mas strongim wok bilong sekim ol memba

BIKPELA tok kros i bin kamap long las wik taim dispela niuspepa na Times i bin autim ripot long rot ol memba i bin yusim ilektorel mani bilong ol.

Insait long palamen kibung, ol memba i-pairap na toktok nambaut bikos ol i no amamas long ol dispela ripot. Long wankain taim yet, oi i komplek tu long taim mipela i putim ripot we i soim hamas taim ol memba i bin sindaun long kibung bilong palamen na wanem taim ol i no stap.

Wanem samting ol memba i wokim bihainim dispela tupela ripot i soim olsem ol i pikinini, i no gat klia tingting na ol i laik haitim tasol wanem samting i bin kamap tru. Na mipela i sanap olsem mausman bilong ol grasrut pipel bilong tokim ol long wanem samting tru i wok long kamap long palamen, gavman, pablik sevis na olgeta arapela hap bilong laip em inap givim pen long ol.

Olsem wanem tru bai ol pipel i bilipim lida bilong ol. Mipela ol pipel i ting em ol gutpela lida, olsem na mipela i votim ol.

Gavman i mas strongim nau wok bilong opis husat i lukautim dispela mani em ol memba i save kisim. Bai i gat gutpela stretpela ripot, na ol pipel i kisim gutpela helpim.

## Planti bisnis bilong nesenel gavman i no bin yusim na lukautim gut mani bilong ol

### SAM VULUM i raitim

PLANTI kampani em nesenel gavman i papa long ol i no bin wokim profit bilong gavman long taim ol i stat i kam inap nau.

Sampela i pas, sampela i no bekim dinau bilong ol yet na sampela i gat ol paul pasin i kamap long we ol i lukautim na yusim mani.

Gavman i gat 17 kampani bilong em yet na em i baim sea long narapela 18 kampani. Wanpela bilong ol dispela kampani em gavman i gat sea long em, en Bogenvil Kopa Limited (BCL).

I gat wok painimaut i kamap nau long Cape Roodney Estates Pty Limited long Sentrel provins. I gat bilip olsem sampela paul pasin i bin

kamap namel long 1984 i kam inap long 1989.

Energy Development Company Pty Limited em narapela kampani husat i gat K172,526 dinau wantaim gavman. Long Julai 14, 1982, gavman i luksave olsem kampani i no wok gut na i bin tok long pasim. Tasol nau i no klia sapos kampani i pas pinis o nogat.

Dispela kampani i gat narapela han bilong en yet, em Baiyer River Alcohol Company Pty Limited. Kampani ya i pinis wok long mun Julai 1982 tasol em i no bin bekim K335,000 dinau bilong ol seaholda.

Narapela kampani, Food Marketing Corporation Pty Limited i bin salim ol samting bilong em pinis i go long ol narapela kampani long 6 September, i go moa long pes 7

## Ripot bilong Odita Jeneral i no tokaut klia long hamas i lus long Panguna

BOGENVIL Kopa Limited (BCL) i bin lusim K556 milien taim wok bilong kopa main long Panguna i pas long 15 Me, 1989.

Long dispela mani, K546 milien i karamapim ol haus samting na ol kain kain masin em i bagarap o i stap nau long narapela hap bilong kantri. Narapela K10 milien i karamapim ol stua em BCL i gat i bagarap.

Tasol ripot bilong Odita Jeneral long 1990 i tokaut olsem ol i no

klia sapos dispela i kos tru bilong ol samting o nogat. Long wanem ol trabel long Bogenvil i pasim ol long go long ples bilong wok stret na sekap long ol samting i bagarap long en.

Ekting Odita Jeneral, Lobe U. Geno i tokaut long dispela bilong soim nesenel gavman wanem samting i kamap nau long kampani. Nesenel gavman i wanpela seaholda bilong BCL. Gavman i gat 19.1 pesen 76,430,809 sea olgeta long BCL. Gavman i bin salim ol dispela sea long Kl.

Geno i tok ol i ken save long kos tru bilong ol dispela samting sapos Panguna main i stat gen.

Ol dairekta bilong BCL i tok i no gat narapela rot moa painimaut ol kos tru bilong ol dispela samting. Ol dairekta nau i wok long daunim kos bilong ol dispela samting bilong ol i bagarap. Na tu ol i wok long rausim nem bilong ol stua i bagarap long rekot bilong ol.

Geno i tok dispela i no gutpela rot bilong ol dairekta i bihainim long painimaut kos tru bilong ol samting.



De bilong soim save: Samuel Kinawi (Iephan) na Andrew Kagamasau husat i wokim Gret 9 long De La Salle haiskul long Mosbi i soim we bilong mekim pawa long wara. Dispela em long Mosbi Intanesenel haiskul taim ol studen i resis long soim wanem kain sains projek ol i ken mekim long las wik.

# WANTOK

NIUSPEPA BILONG OL PAPIA NIUGINI STREET

P.O. Box 1982 BOROKO  
Telepon Namba: 25 2500  
Feks Namba: 25 2579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

## Ol palamen woka i no bihainim lo bilong lukautim mani

OL WOKMAN bilong nesenel palamen i no bihainim gut lo bilong Palamentri Sevis Ekt long yusim na lukautim mani.

Fittin (15) wokman i kisim nating bikpela mani antap long lip pe bilong ol. Narapela 23 i kisim nating bikpela pe stat long mun Januari 1989 taim Spika bilong palamen i no tok orait long ol.

Na narapela foapela wok-

man i bin stap long ol haus em gavman i save baim long en, tasol ol i save kisim sampela mani antap long pe bilong ol long bekim mani ol yusim i long baim ol dispela haus.

Long 1 Junueri, 1989, Spika i bin orait long wanpela wokman long kamap asisten sekyuriti opisa. Dispela opisa i mas kisim K176.17 long fot-

nait. Tasol no gat, em i save kisim K197.06. Palamen i yusim nating moa long K543.14 bilong baim dispela opisa.

Meri bilong wanpela kontrak opisa i mas wok inap long wanpela yia tasol aninit long lo bilong kontrak. Tasol nogat, wanpela i bin wok longpela taim tru na pe bilong em olgeta long wan-

pela yia em K12,325. Antap long dispela, em i save kisim K10,400 poket mani.

Narapela kontrak opisa i bin wok wantaim gavman na kontrak bilong em i pinis long Epril, 1990. Palamen i kisim em long wok olsem wanpela spesel saveman aninit long Bilding Operesens na Mentens seksen bilong palamen.

i go moa long pes 6

**BIABIA SPAK NOGUT TRU NA GO LONG HAUSKUK LONG PAINIM KAIKAI... EM KARIM HAP BIA TUI GO INSAIT...**



**KAIKAI I PINIS NA EM LAIK DAUNIM KAIKAI WANTAIM BIA...**



**TASOL EM ABRUS NA DAUNIM KEROSIN...**

**EM LUSIM HAP BIA BILONG EM KLOSTU LONG BOTOL KEROSIN NA EM KAIKAI OLSEM PIK...**



**MAN, AI BILONG EM I OP NA TANIM TANIM... SIMUK I KAMAUT LONG IAU BILONG EM...**



**... NA PAIA I KAMAUT LONG MAUS BILONG EM...**

## Tingting bilong skelim insurens na kompensesen i no kisim sapot

PLANTI manmeri i kisim bagarap taim ka i bam o tanim i no save kisim gutpela kompensesen long ol insurens kampani.

Memba bilong Lufa, Jerry Kavori i tok ol manmeri i save painim hat tru o sampela taim i save wet longpela taim tru long kisim kompensesen.

Kavori i tok dispela i kamap long wanem ol wokman bilong insurens opis i no wok stret. Ol i no save stadim gut wanem kain ol bagarap i kamap long ol manmeri.

Bikos long dispela, em i autim wanpela bil bilong palamen long skelim bilong mekim isi long ol manmeri. Palamen i vot long dispela bil na ilpela memba tasol i laikim na narapela 3l i no laikim.

Tasol Kavori i tok wanpela indipenden grup i mas kamap bilong lukluk long wari bilong ol manmeri na i no ol insurens kampani yet. Insait long dispela grup bai i gat wanpela loya, akaunten na dokta husat i save long kain kain bagarap i ken kamap long bodi bilong man taim em i bam long ka. Nem bilong dispela kain dokta long Inglis em "psychiatrist".

Wok bilong dispela ol lain man em long lukluk long askim bilong ol manmeri na traini long givim gutpela kompensesen.

Kavori i tok i gat nainpela hap i wok wantaim long holim bodi i stap laip. Wan wan hap i gat wok bilong en yet. Sapos wanpela long ol dispela hap bilong i bagarap, bai laip bilong man i no inap gutpela.

Olsem na dispela grup, husat i save long wok bilong ol yet i mas kamap bai lukluk long wari bilong ol man. Psychiatrist bai stadim tingting bilong man i bagarap olsem wanem na kamap wantaim pe bilong en na dokta i stadim wanem bagarap i kamap long bodi. Dispela bai helpim ol insurens kampani long baim gut ol man na meri.

Kavori i tok long dispela taim nau, sapos pinga bilong wanpela man i lus, em bai kisim tasol namel long K500 na K1,000. Tasol han bilong yu i kos moa. Bikos taim em i lus, i no gat wanpela hap gen i stap long senisim. Taim hap bilong bodi bilong yu i lus, em i lus olgeta.

i go moa long pes 6



□ **KANAGE** i save wok long haus sik bilong ol mama long Nonga. Olgeta taim ol mama i kam bilong kisim marasin, em bai sasim ol K1. Tasol dispela mani i no save go long wok bilong haus sik, em i save putim long akaun bilong em yet long PNGBC. Wapela taim Tuvi wantaim Golman i bagarap tru long hangre na giamanim Kanage. "Poru, yu givim mipela sampela mani. Mipela bai wokim pati bilong ol sista na nes long haus sik tasol i no gat inap mani." Kanage i harim tasol i no wanbel liklik. Boi kirap kisim pepa bilong beng long rausim mani na sainim K100 stret. Tasol tupela ya i no save olsem Kanage i putim narapela mak antap long pepa bilong rausim mani. Tuvi wantaim Golman i kisim hap pepa ya na siksti hariap tasol i go long beng. Tasol long beng, ol meri kirap na tokim ol, "Man, dispela mak antap long pepa ya i bilong wapela lapun bilong Vunadidir husat i bin dai longpela taim pinis ya." Tupela ya i no wanbel na kam bek painim Kanage tasol boi i lus pinis.

Fanny Yeninen,  
Rabaul, E.N.B.P.

□ **OL soldia** i bin holim wapela operesen ol i kolim olsem "OPD" long Ampo, Lae las wiken. Dispela operesen i bin kamap bihain tasol long tupela tambu meri bilong Kanage i go painim danis long Igam bareks i go no gat na kam bek long Ampo. Tupela i kam bagarap olgeta na go slip na i no save olsem operesen OPD i kamap gen long nait. SP 2 Boys,

Hohola, Mosbi.  
□ **WANPELA** Arowe lukim Kanage na askim em long ples bilong Kanage. Taim Kanage i tokim Arowe olsem em i bilong Sepik, Arowe i kirap na tok, "Yupela ol Sepik i winim mipela tru. Yupela i gat bikpela save bilong flaim balus, ronim ka, mekim ol kain kain bikpela wok long opis. Tasol mipela ol Arowe no gat. Mipela i wok long laitim yet ol pompom paia na bihainim yupela."

Charles Suky,  
Ulavoc Plantasin,  
Kokopo, E.N.B.P.

□ **PAPA** na mama i planim taro long gaden na liklik kandre bilong Kanage i stap wantaim lapun tumbuna meri bilong em. Apinun nau na liklik tumbuna i hangre. Olsem na lapun meri i kirap kukim saksak long pala na singaut long kandre bilong Kanage, "Benjami, yu kam na kaikai dispela sakin satan mi kukim pinis i stap ya!" Benjami i harim olsem na pret ranawe lusim tumbuna meri bilong em. Tumbuna meri i singaut tasol liklik kandre bilong Kanage i luslain pinis.

Willie Namori, Rabaul, E.N.B.P.

## PEA long Niugini Ailan i givim tupela wik long PSA stretim opis

NIUGINI Ailan Rijonal Pablik Employis Asosiesen long Rabaul i givim PSA Sevings na Lon Sosaiti tupela wik long putim ol samting long opis bilong ol memba long yusim.

Sapos dispela i no kamap, ol eksekutiv bai mekim sampela samting gen. Pablik Employis Asosiesen na PSA Sevings na Lon Sosaiti i bin sainim wapela tok orait olsem PEA bai karim wok bilong helpim ol memba long Niugini Ailan rijon.

Ektng presiden bilong PEA

long Rabaul, Sam Keri i bin autim dispela tok lukaut insait long wapela pas (16 Julai, 1991) i go long Jenerel Seketeri bilong PSA Sevings na Lon Sosaiti. Bikos sosaiti i no putim yet ol samting long opis bilong ol memba long yusim.

Antap long dispela pas, 5-pela memba bilong eksekutiv komiti i bin putim mak bilong ol. Pas i tok rijonal opis i no gat telipon na fax masin na dispela i givim bikpela mekim save tru long ol memba inap long tripela

mun nau.

Keri i tok sosaiti i bin tokaut long ol nupela dairekta bilong bod wantaim menesa long bringim gutpela sevis we i mas stap klostu long ol memba. Tasol dispela i no kamap tru yet.

Em i tok menesmen bilong PSA i save gut tru olsem olgeta samting ol memba i laikim i stap wantaim bikpela opis long Waigani. Olsem na em i bikpela samting tru long rijonal opis i gat ol kain samting olsem bilong lukautim na helpim ol memba olgeta de.

Insait long namba 25 kibung bilong en las yia, ol mausman bilong PEA i oraitim tingting bilong mausman bilong NGI, Kauma Ariku olsem PSA Sevings na Lon Sosaiti i mas baim K50,000 fi long olgeta yia bilong PEA long stap olsem ejen o mausman bilong sosaiti long olgeta hap bilong kantri. Ariku i tokaut long dispela taim olsem PEA i bin givim fri sevis stat long 1984 yet i go long 27,000 memba bilong PSA long olgeta hap bilong kantri.



• **Ol meri husat bai resis long Mis PNG i soim ais krim bilong Tanubada long EM TV long pulim mani bilong helpim Red Cross Sosaiti wantaim wok bilong em.**

## Kakao plantasin i no gutpela bilong Kandrian na Gloucester

WES Nu Briten provinsal gavman i yusim pinis K187,000 long Kandrian/Gloucester Intagreted Dvelopmen program tasol i no gat rekot bilong soim rot em i yusim dispela mani.

Provinsal gavman i yusim K58,000 long mekim ol wok stadi bilong redim projek long 1989. Na long 1989, em i yusim gen narapela K129,115. Dispela olgeta i kamapim K187,000.

Namba wan hap bilong stadi i tokaut olsem bai i gat ol smolholda kakao plantasin i kamap long Kandrian na Gloucester. Tasol ol stadi bihain i tokaut olsem ol pipel i save wokim samting olsem 80 pesen kakao long wapela de. Dispela i soim olsem ol i no save kisim bikpela mani tumas long wapela de. Olsem na tingting bilong kirapim ol kakao plantasin i no inap gutpela tumas.

Dispela ol stadi i kamap wantaim as tingting bilong painim ol rot bilong bringim gutpela sindaun long ol pipel bilong dispela tupela distrik.

## Ol pipel bilong Flai na Striklen i amamas moa long nupela helt senta

FLAI na Striklen Riva long Westen provins i gat nupela helt senta. Provinsal Helt minista Michael Namalok i bin opim dispela helt senta long Obo long las wik Fraide.

Helt senta bai helpim moa long 4,000 pipel. Bipo ol pipel i save go long kanu na spitbot i go long Lek Mari. Na ol i save mekim olsem inap long 5-pela aua bilong go long helt senta.

Tasol nau nupela helt senta bai lukautim ol pipel bilong Obo, Kaviananga, Komowai, Aimbak, Boekumawa na ol

arapela ples klostu.

Kos bilong nupela helt senta em K125,000 na i gat ples bilong slip, kisim marasin, ples bilong ol meri i karim pikinini, ples bilong kuk, toilet na haus bilong ol wokman.

Sinia menesing dairekta bilong Ok Tedi, Ian Gunn, jenerel menesa Chris Brown na ol arapela opisa bilong kampani i bin kamap tu long Fraide.

Dispela haus sik i makim wok bung wantaim namel

long provinsal gavman na Ok Tedi maining kampani. Evangelikel Sios bilong Papua (ECP) tu i stap insait long dispela wok program wantaim kampani na gavman.

Obo distrik i stap namel long Midel Flai na i gat komyuniti skul wantaim haus sik na ples balus bilong helpim dispela eria. Wok bilong helt senta bai stap long han bilong ECP husat i save lukautim tu ol wok long Rumginae helt senta klostu long Kiunga. Tripela opisa,

wapela nes, edpos odali na ol arapela helt woka bai go wok long nupela helt senta.

Meri i go pas long ol, Sista Tamali Sinba i tok ol bai wok strong long stapim ol sik olsem malaria long dispela hap.

Em i tok taim helt senta i bin op wapela wik i go pinis, 50 sikman, meri na pikinini i bin kamap kisim marasin long 3 klok olgeta de. Ol lain husat i gat bikpela sik tumas bai go long bikpela haus sik long Kiunga.

## Papua Niugini Nesenel Ileksen, Me-Jun, 1992

Nem bilong ol olupela na nupela kendidet bai kamap bilong resis long ol sia long olgeta ilektoret. Dispela em i bikpela samting olsem na olgeta man na meri bilong Papua Niugini i mas save gut tru long olgeta samting bilong mekim long taim bilong ileksen.


Sapos yu laikim helpim, go lukim ol Distrik Menesa, na ol Distrik Opisa-In-Sas (DOIC).

Askim ol long wok bilong ileksen em yu no klia long en.

**Tingim gut, ol gutpela lida i kamap long stretpela vot**

### TASOL HUSAT I KEN VOT?

Ol Papua Niugini man na meri husat i givim nem tasol long 1992 ilektorel rol bai tromoi vot. Na dispela i min olsem olgeta sitisen husat em krismas bilong ol i winim 18 yia na i bin stap insait long wapela ilektoret moa



Authorised by  
Reuben Kauulo,  
Electoral  
Commissioner Papua  
New Guinea

long 6-pela mun na mama i bin karim em pastaim long 27 Jun, 1974 bai tromoi vot.

Sapos yu winim olgeta dispela toktok na i no givim nem yet, pulimapim wapela fom long Provinsal Ilektoel Opis, Distrik Menesa o Opisa-In-Sas long hap bilong yu.

**Tingim ... lo i tok olsem olgeta Papua Niugini man na meri i mas givim nem bilong vot.**

### OL NUPELA LAIN BILONG VOT

Sapos mama i bin karim yu pastaim o long 27 Jun, 1974, yu mas givim nem bilong vot. Yu i no inap vot long neks yia sapos nem bilong yu i no stap long ileksen rol.

Go long Provinsal Ilektoel Opis i stap klostu long hap bilong yu na pulimapim wapela fom bilong vot nau!

**Tingim gut, givim nem nau! Olsem bai yu gen vot long 1992 ileksen.**

## TU MINIT TINGTING

## POGIV BILONG GOD I NARAKAIN

"Yumi mas amamas na pati long pikinini i kam bek pinis." (L 15:24)

ATING planti taim yumi bin harim dispela stori long Gutnuis bilong man i gat tupela pikinini man na yangpela i kisim mani bilong em na i ranawe i go faulim laip bilong em. Na bihain em i kam bek na papa i pogivim em olgeta. Tasol bikbrata i no laik pogivim em.

Jisas i wokim dispela stori nating bilong skulim yumi long pasin bilong God Papa long pogivim yumi. Dispela poin i kamap ples klia sapos yumi skelim pasin bilong papa long stori, na pasin bilong bikbrata.

Long taim dispela yangpela boi i kam i laik kisim mani long papa, papa i no krosim em. Papa i save, yangpela ya bai inap bagarapim laip bilong em long taim em i lusim ples na i go longwe. I no olsem papa i laik dispela boi i go. Nogat. Tasol em i givim fridom long em. Em i

ting olsem: "Em i mas groap na sanap long lek bilong em yet. Yes, mi save dispela i ken pulim em long olkain rong na asua. Tasol mi no ken pasim em. Mi mas givim sans long em. Em i no manki moa; em i bikpela pinis. Mi ting olsem: wanpela de bai em i les na i kam bek."

Tasol sapos yu askim bikbrata bilong stori, bai em i tambu tru long liklik brata i ken kisim mani na go. Em i laik bai liklik ya i mas stap bek na mekim hatwok olsem em yet i mekim. Em i no laik harim tok bilong malolo na amamas na pilai. Wok, wok tasol, em i laip bilong em.

Orait, yumi save pinis long stori. Boi ya i bagarap na i sori na i kam bek, na wantu papa i pogivim em, na i wokim pati bilong welkamim em. Yu lukim: papa yet i wetim em. Na papa i no givim strongpela tok kros

long em pastaim long em i pogivim em. Nogat. Em i makim pasin marimari bilong gutpela God Papa.

Tasol dispela bikbrata long stori, em i makim pasin bilong planti yumi kristen long pasin pogiv. Em i lukim liklik brata na em i bel nogut. I gat sampela Kristen yet i lukim man o meri i pundaun long sin na ol i no laik ol i kirap bek. Ol i laik bai God i mekimsave long ol dispela manmeri nogut. Watpo pogivim ol?

I gat kain Kristen olsem dispela bikbrata. Ol i holi long ai bilong ol yet, na ol i hambak long dispela. Ol i no laik helpim o givim han long man o meri i save smok o i save dring o i raskol. Dispela inap faulim ol. Planti Kristen olsem i bilong wanpela klap bilong ol gutpela manmeri tasol. Ol tu i no laikim ol sinman na raskol i tanim bel. Maski,

larim ol i lus: em pe bilong ol.

Ol i olsem wanpela lain hambak Kristen long kantri Inglan long taim Jeneral Booth, hetman bilong Selvesen Ami, i bin dai. Bilong givim ona long Jeneral Booth, wanpela saveman i penim wanpela piksa i soim Jeneral ya i go long heven. Wanpela bikpela lain manmeri bipo ol i stilman na kilman na pamukmeri na raskol . . . nau ol i amamas na i kam welkamim Jeneral Booth long dua bilong heven. Jeneral ya i amamas tru na i hepi long lukim wok bilong em long graun i bin karim kaikai. Long wanem, nau ol dispela lain lusman i stap long heven.

Tasol wanpela lain Kristen i kirap na tok kros long man i bin putim ol dispela kain manmeri nogut insait long heven. Long tingting bilong ol, heven em i ples bilong ol gutpela lotu Kris-



FRANK MIHALIC i raitim

ten stret. Na ol manmeri i bin mekim ron, ol i tambu long kam insait.

Tasol dispela i no tingting bilong Jisas na bilong God Papa tu . . . Jisas yet i bin kam bilong oraitim ol sinman na helpim ol long kam long heven. Bilong dispela na em i bin kam daun long graun. Ating wanpela de sampela Kristen bai kalap nogut long lukim husat i stap long heven.



Ol Orthodox i kisim baptismo: Moa long 1,000 memba bilong Orthodox sios long kantri Rasia i kisim baptismo long wara long Yaroslavl. Dispela em long not bilong Mosko, biktaun bilong Rasia long las wik.

## Bos bilong Engliken Sios long wol bai krungutim Mosbi long Sarere

BOS bilong olgeta Engliken Sios long wol, Asbisop bilong Kentabri, Dokta George Carey bai krungutim Mosbi long Sarere, 3 Ogas 1991.

Wanpela singsing tumbuna grup bilong Engliken Daiosis bilong Mosbi bai bungim em long Jacksons ples balus. Ol bikman husat bai bungim Dokta Carey em Asbisop bilong Papua Niugini, Bevan Meredith, ol arapela sios lida, Gavana Jenerel Sir Serei Eri,

Praim Minista Rabbie Namaliu na ol narapela bikman na sinia pablik sevan.

Ol wok bilong redim ol samting bilong amamasim 100 yia bilong Engliken Sios long Papua Niugini i go het gut. Olgeta samting bai stat wantaim bikpela lotu long Begabari long Mosbi. Dispela em long Sande 4 Ogas, 1991.

Long dispela lotu, Asbisop Carey bai givim kumonio na tok-tok bihain long Baibel rit, em bai

rausim hap laplap bilong soim nupela Engliken Sios haus lotu bilong stap long Begabari, planim diwai na givim baptismo long ol pipel. Long Mosbi, Asbisop bai i go lukluk raun tu long wanpela skwata setelmen.

Dispela ol bikpela amamas i bilong makim namba wan taim tru em tupela misin woka bilong Engliken Sios i kamap long Kaieta long Milen Be provins. Dispela tupela man em Albert McLaren na

## Baibel Wik long Mosbi go olsem wanem

BAIBEL Sosaiti bilong Papua Niugini i bin holim Baibel Wik bilong en stat long Sande 28 Julai. Na dispela bai pinis long Sande 4 Ogas, 1991.

Dispela 5-pela de progrem i sut long tingting bilong ol kristen i ken amamasim Baibel Wik. Na long Mosbi, PNG Baibel Sosaiti yet i lukautim progrem. Ol lain long ol narapela senta yet i bin makim wanem samting bilong mekim long makim dispela wik.

Long Mosbi, ol pikinini i bin bung long Mande, 29 Julai long Gut Nius senta long Kaugere stat long hap pas 8 long moning (8:30 am) i go inap long 12 klok apinun.

Eksekutiv seketeri bilong Baibel Sosaiti, Reveren Steven Pirina i tok ol pikinini i bin holim ol baibel drama, stori, pilai wantaim ol papet, singsing, lukim vidio, wokim ol kain kain pani na pilai.

Long apinun, bikpela bung i bin

kamap long Sen Martins Engliken Sios long Boroko. Na Reveren Pirina i bin givim liklik toktok na skul bilong makim dispela de.

Long Tunde apinun, Pater Theo Aerts i toktok long narapela bung gen long Nazarene Sios long Gordons. Long Trinde i bin gat ol vidio muvi long Selvesen Ami kem long Kaugere. Muvi i stat long 6 klok na pinis long 8 klok nait.

Na nau long nait, wanpela bung bai kamap long Good Shepherd Luteran Sios long Koki. Issac Teo bai givim liklik toktok na skul stat long hap pas 6 long apinun (6:30 pm) i go inap long 8 klok nait. Long Fraide, 2 Ogas, narapela bung gen bai kamap long AOG Sios long Gerehu stat long wankain taim yet. Orait Sarere em i taim bilong ol meri long 1 klok i go inap long 4 klok apinun.

Margaret Ogomeni bai toktok long Laipain senta long Waigani.

## Tingting bilong skelim insurens na kompensesen i no gat sapot

1 kam long pes 4

Minista bilong Jastis, Bernard Narokobi i tok em i tru olsem dispela i kamap tasol em i no sapotim bil. Em i tok i gat ol narapela rot we gavman nau i lukluk long en.

Narokobi i tok palamen i oraitim pinis nupela lo long apim pe i go antap long K5,000. Em i tok sapos insurens i no baim hariap, taim em i baim em i mas putim 5 pesen antap. Em i tok dispela i no gutpela ting-

ing tumas long wanem sapos em i kamap lo, gavman bai westim bikpela mani long baim ol wokman bilong grup. Na ol dispela wokman olsem dokta na loya i mas kisim bikpela pe.

Spika i no givim inap-taim long olgeta memba long paitim tok long dispela bil. Narokobi wanpela tasol i toktok na bihain ol i vot long en.

## Ol palamen woka i no bihainim

1 kam long pes 4

Palamen i baim opisa ya namel long 1 Epril 1990 na 31 Desemba 1990 long K9,399.27 olgeta. Tasol pe bilong man ya i no stap long plen bilong 1990 baset bilong haus Palamen stret.

I no gat rekot bilong K13,384 em foapela memba i bin yusim olsem poket mani

bilong ol taim ol i go long Japan namel long 8 na 16 Desemba. Na i no klia sapos i gat tok orait bilong ol bos long dispela mani o long wanem wokabaut ol memba i go long en.

Narapela memba i bin go long Honolulu namel long 17

Jun na 23 Jun, 1990. Mani em memba i kisim bilong yusim i mas karamapim tasol sevenpela de em i bin stap long Honolulu. Tasol em i kisim K1,300 we i karamapim 13 de olgeta. I no gat rekot tu bilong K4,432.22 em ol sampela memba i bin yusim bilong go long ol narapela kantri.

# Garry sutim tok long Morobe provinsal gavman i yusim nating K13,000 bilong raun long Mosbi

MOROBE provinsal gavman i bin tromoi nating K13,000 bilong baim rot i kam long Mosbi na go bek long las tupela mun.

Nesenel memba bilong Huon Galp, Ben Garry i tokaut long dispela long palamen.

Memba i tokaut tu olsem opis bilong primia i bin kirapim wanpela nupela wok bilong Siev ov Stav. Tasol lo bilong Rimuneresen Komisnin i no oraitim dispela long kamap.

Em i tok sampela minista

bilong Morobe provinsal gavman nau i gat ol wasman bilong ol yet. Na dispela tu i brukim lo bilong komisnin.

"Mi no amamas olsem sampela minista bilong provinsal gavman i save raun nating i kam long Mosbi na stap long ol bikpela hotel. Wanem samting ol i mekim em long tromoi nating mani bilong provins."

Long dispela as, Garry i askim Provinsal Afeas minista Pater John Momis long tokim ol minista bilong em long bihainim lo.

Tasol Pater Momis i bekim olsem em i no gat pawa bilong tokim primia long wanem rot bilong yusim mani.

"Dispela em i wanpela klia piksa tru long wanem samting i save kamap taim yu givim moa pawa i go long ol provinsal gavman. Em i samting bilong primia na ol wanwok bilong em long yusim pawa bilong ol long yusim stret mani."

Tasol bihain Pater Momis i tokaut long toktok wantaim

primia long dispela.

Long askim bilong Siev ov Stav, Pater Momis i tok lo bilong Rumeresen Komisnin i tambu long provinsal gavman i makim wanpela kain sia olsem. Na mama lo bilong kantri i no givim pawa long wanpela provinsal minista long makim wasman bilong em yet.

"Mi bai salim pas long primia na tokim em olsem em i brukim lo pinis. Olsem na em i mas kamapim ol senis hariap," Pater Momis i tok.

# PPP laik lukim senis long pati lo

SENIS i mas kamap nau long lo bilong ol politikel pati insait long Papua Niugini bilong stapim ol kain kain hevi long kamap.

Kodineta na namba tu presiden bilong Peoples Progress Party long Kavieng ilektoret, Peter Choi i laikim senis i mas kamap long lo bilong ol pati.

Nupela na strongpela lo i mas kamap long strongim rot em ol politikel pati i wok insait long kantri. Em i tok planti pati i abrus long bihainim ol pati lo. Long dispela as tasol na planti man i save kalap kalap nabaut long ol pati.

Choi i tok gavman i mas kamapim dispela senis hariap pastaim long 1992 nesenel ileksen. Em i bin mekim dispela toktok insait long wanpela kibung we moa long 500 manmeri i bung long en.

Lida bilong PPP na memba bilong Namatanai, Sir Julius Chan i bin stap tu long dispela bung.

## Nupela sevis stesin bilong Mobil Oil i op long Lae



• Ol manmeri bilong ples Butibam long Lae i singsing long opim nupela sevis stesin bilong Mobil Oil long las wik. Dispela nupela sevis stesin i gat ples bilong kalkai tu.



Pulim meri • Ol studen bilong Milen Be long Aiyura Nesenel Hai Skul i putim kamap wanpela singsing bilong pulim meri

## Nesenel gavman bisnis i pundaun

i kam long pes 4

1984. I no gat wanpela senis i kamap long wok bilong Higaturu Transport Pty Limited long taim em i stat i kam inap nau.

North Fly Highway Development Company Pty Limited i fel long bekim dinau bilong em long Westpac Beng. Olsem na gavman i helpim em long baim dinau long 30 Jun, 1989. Dispela dinau em K1,784,322 olgeta.

PNG Forest Product Pty Limited i lusim K830,400 long mun Desemba 31,1990. Na i gat ripot bilong paul pasin nau i kamap long wok bilong PNG Fish Marketing Corporation Pty Limited. Narapela kampani, PNG

Timber Holdings Pty Limited i wankain.

Na Sea Park Pty Limited, Kagamuga Natural Products Pty Ltd na Livestock Development Corporation Pty Limited i fel long tokaut long ol rekot bilong ol long we ol i lukautim na yusim mani.

Mineral Resource Development Pty Limited i go het yet long pinisim ol wok long rekot long pasin em i save lukautim na yusim mani. Na National Forest Product Pty Limited wantaim National Plantation Pty Limited i pasim olgeta wok bilong ol long wankain taim long mun Desemba 1987.

## Bikpela 2 yia edpos projek i no stat yet

WOK bilong lukautim ol edpos i stap long han bilong ol provinsal na lokal gavman. Tasol dispela i no kamap planti yia nau bikos i no gat mani i go insait long dispela wok.

Dispela hap toktok i stap insait long namba 48 Rurel Helt projek ripot bilong Pemenen Palamenteri Pablik Woks komiti.

Komiti i bin tokaut tu

long tingting bilong wanpela rurel helt projek. Na dispela bai sut long wok bilong senisim 100 edpos em ol i wokim long samting bilong ples na 100 strongpela haus bilong ol edpos odali long kantri.

Dispela projek bai karamapim olgeta provins bilong kantri. Na dispela samting i mas kamap insait long

tupela na hap yia stat long 1990 i go inap long 1992. As tingting bilong dispela em long givim gutpela sevis long ol pipel bilong ples.

Narapela tingting tu i bilong grisim ol lain olsem ol komyuniti helt woka bilong go wok long ol edpos long ples. Kos bilong dispela projek i stap long K2.42 milien. Ol lain

long provins yet bai lukautim kos bilong kisim marasin na ol narapela liklik medikal saplai.

Ol viles komyuniti bai lukautim hap em edpos i sindaun long en olsem hap skel bilong ol long wok.

Komiti i laikim olsem wok bilong Rurel Edpos projek bilong 1991-1993 i mas stat hariap na i no ken westim taim gen.

# Noken peim moa long ol stoa!



10t 10t 10t 10t

Sapos ol askim moa...go long narapela stoa!

"NAU 63% BIKPELA MOA!"

# Bikpela stil pasin kamap long balus



• Wapela meri long kantri Yugoslavia i holim korona bilong Jisas Kraus na i prea long gutpela sindaun. Nau yet bikpela pait i kamap namel long ol Krosia sekyuriti fos, na rebel paitman bilong Sebia. Krosia na Sebia em tupela rijon bilong Yugoslavia, husat i pait long kamapim kantri bilong tupela yet.

## De Klerk bai rausim ol minista husat i sapatim Inkatha

PRESIDEN de Klerk bilong Saut Afrika i bai tokaut long mani bilong Inkatha Freedom Pati, na stapim gavman long baim nating ol plisman husat i kamapim planti giaman wok.

Ripot i tok gavman bilong Presiden de Klerk i redi long stapim ol dispela paul pasin we sampela gavman bodi i sapatim ol blek politikel grup wantaim mani.

Ripot i no tokaut long wanem kain samting Presiden de Klerk bai i mekim long stapim dispela pasin nogut.

Ripot i tok Presiden de Klerk bai i tokaut tu olsem plis i bin givim 250,000 Australian dola i go long sapatim Inkatha Freedom Pati long 1989 na 1990. Wapela opisal bilong Inkatha i kisim dispela mani i go bek long gavman. Bikos ol i no laik bagarapim nem bilong Inkatha olsem wapela blek politikel grup husat i giaman long pait long gutpela sindaun bilong ol blek skin pipel, tasol i

kisim sapat hait long wait gavman.

Narapela K1.5 milien Australian dola em plisi baim tred yunien bilong Inkatha, Yunaitet Wokas Yunien bilong Saut Afrika em ol i no bekim yet.

Gavman i tok olsem dispela mani i bilong helpim Inkatha long kempen egensim ol ovasis kantri long salim kaikai long Saut Afrika.

Ripot i tok dispela sapat i bilong helpim Inkatha long egensim Nelson Mandela bilong Afrika Nesenel Kongres.

Presiden de Klerk i tok em bai rausim olgeta dispela mani em sampela gavman bodi i save yusim long sapatim ol blek grup i go aninit long palamen komiti we olgeta pati i memba long en.

Na tu bai i rausim wapela o tupela minista bilong em. Bikos ripot i tok ol i stap insait long dispela rabis wok.


WANPELA stilman i hait insait long kago ples bilong balus na i stilim moa long K1 milien.

Dispela 1.26 Australian dola (moa long K1 milien) em bikpela bilip i stap olsem ol stilman i no inap long stilim. Tasol nogat.

I bin gat bikpela sekyuriti taim ol i putim dispela mani i go insait long balus. Tasol bipo long ol i putim mani insait long balus, ol i sekim gut olgeta hap we ol kago i save stap long en. Na bihain ol i mekim fainal sek ap gen, bipo long balus i tekov.

Sampela sekyuriti wokman i bin stap insait long balus tu long lukautim dispela mani.

Tasol insait long hap mani i stap long en i gat wapela bokis em wanpela liklik man o meri i hait insait. Taim balus i ran long 30,000 fit antap long skai, stilman ya i kam ausait



long bokis, na i brukim lok bilong beg em mani i stap insait long en.

Em putim sampela niuspepa wantaim plai wut insait long beg, na i kisim mani. Bihain em kalap i go insait gen long bokis wantaim

mani na hait i stap inap balus i pundaun.

Long Paris, ol sekyuriti bilong Brinks kampani i kisim dispela mani beg, na i sainim OK. Ol i lukim lok bilong mani beg i bruk liklik, na i ting olsem balus i sek na beg i skrapim wantaim ol arapela kago.

Bikos long olgeta ran bilong balus, ol i save lukim kain mak olsem long ol arapela mani beg. Tasol mani i lus pinis.

Hevi bilong bokis kago em stilman i hait insait long en em 68 kilogram.



• Meri Krosia i kral taim ol i planim brata bilong em. Brata bilong meri ya em wanpela plisman. Em i wanpela bilong ol 20 pipel husat i bin dai long pait long ples Vinkovsi, Krosia long las wik.



• Ol wokmam i rausim ol mambu em i bin pundaun nambaut arere long wanpela haus. Bikos long bikpela win ol i kolim 'Brendan' i kan ap long Hong Kong long Trinde 24 Julai, 1991. Hai wara tu i kamap long dispela birua na i kamapim bikpela bagarap stret.



• SBS TV stesin long Sidni, Australia husat bai i katim namba bilong ol tok ples program. Sampela program bai i kisim moa taim aninit long dispela senis olsem Redio Anaunsa bilong Tonga, Richard Prescott.



## Isrel no laik kibung wantaim ol Palestinian

ISREL bai no inap insait stap long kibung bilong mekim tok wan bel long Midel Is. Dispela em sapos ol Palestinian i kamap long kibung ya.

Praim Minista bilong Isrel, Yitsak Shamir i tok Isrel bai i kibung wantaim ol kantri insait long Arab sapos Palestinian i no kamap long kibung. Tasol em i askim Siria na Jordan long noken givim graun long narapela long kamapim pasin wan bel. Ol i mas kamapim tok orait na mekim pasin wan bel. Na i noken baim long wanpela samting, em i tok.

Dispela toktok bilong Shamir i mekim ol Palestinian i tingting olsem kibung bilong presiden bilong ol wantaim presiden bilong Rasia, Gorbachev bai i no inap long kamap gut. Dispela kibung bai i kamap long neks wik.

Ripot i tok dispela hevi i stapim nau husat bai i makim Isrel na Palestinan long kibung bilong stretim dispela bikpela longtaim hevi. Wanpela gutpela kibung bai i no inap kamap sapos dispela hevi i no stret.

Dispela pasin bilong Shamir i soim olsem bai i hat tumas long Siria na Jordan i kisim bek hap graun bilong

tupela long Golan. Dispela hap graun em Isrel i bin winim long 1967 woa.

Shamir i bin toktok long televisen olsem em i no bilip long kibung bilong ol kantri husat i stap klostu wantaim. Em i tok kantri bilong em i liklik tumas. Olsem na em i no inap long givim dispela hap graun long wan bel.

Em i tok bilip bilong em i sanap olsem dispela em graun bilong Isrel pinis. Na i gat sekyuriti na gutpela pasin i stap long lukautim ol pipel long dispela hap graun.

Sekyuriti na graun i go wantaim. Dispela em bilip bilong mipela. Dispela em tirgting bilong olgeta manmeri bilong Juda, em i tok moa olsem.

Ol toktok bilong Samir i no nupela. Tasol ripot bilong em long Trinde nait bilong las wik i gat planti as bilong en.

Namba wan as i soim olsem em i bekim ripot bilong seketeri bilong Amerika, Mista Baker. Dispela em long Jordan, Siria na Lebanon i orait long kibung wantaim Isrel.



• Hostel bilong ol olpela paitman bilong woa long Toowong, Australia em paia i bin kukim long Sarere 27 Julai, 1991. Nogat wanpela man i indai o bagarap. Tasol ol i lusim olgeta samting bilong ol. Ripot i tok masin bilong hotim ges i mas kamapim dispela paia.



• Keith Harcombe bilong Sidni, Australia i gat 9-pela krismas, na i wanpela disebel. Wanpela samting tasol i save amamasim Keith em komputa bilong em long pilai. Tasol sampela stilman i stilim pinis long las Fraide nait.

## Siria baim moa samting bilong pait

SIRIA i yusim kompensesen mani bilong em na i baim mao pait samting bilong ami bilong em. Dispela kompensesen mani em Saudi Arabia i bin baim long ol bagarap em i bin kamap long taim bilong Gap woa taim Irak i tekova long Kuwait.

Ripot i tok Siria i baim ol balus bilong pait long Rasia, ol bom bilong pait long Not Korja, na woa tenka long Sekoslavakia.

Siria i plenim long yusim 3.2bilien Australian dola kompesesen mani em Saudi Arabia bai i givim em. Dispela em long baim ol ami bilong em husat tu i bin stap long woa, na i pait wantaim Irak.

Ol samting Amerika i salim i go long Midel Is i go gut tru. Tasol ripot i tok Rasia i gat planti samting nau em i laik salim long Iran. Em i laik mekim dispela bihain long em i lusim Isten Yurop.

Iran i laik baim ol strongpela samting bilong yusim long pait. Ol kantri husat i wok long salim kain samting i wok strong long sapotim ol Midel Is kantri long baim moa strongpela masin bilong pait.

Ripot i tok ol komiti grup bilong Inglan long Foren Afeas i no painim klia rot long mekim isi pasin bilong salim, na baim ol woa samting insait long Midel Is. Dispela bai i kamap long intanesenel kibung long traime kamapim wanpela rot bilong baim na salim ol samting bilong woa.

Ripot i tok gavman bilong Inglan i mas traime long kamapim gutpela rot wantaim ol kantri husat i wok long salim ol pait samting olsem Sekoslavakia, Saina na Rasia. Gavman bilong Briten i mas bringim dispela tingting i go long Amerika gavman.

Ripot i tok strong long wanpela samting i mas kamap long rausim presiden bilong Irak, Saddam Hussein. Bikos sapos em i stap yet bai i ol pipel na kantri long Midel Is i no inap long stap gut. Long wanem bai i gat moa trabel i kamap yet.

Ol sekyuriti bilong Yunaitet Nesen i lukluk nau long ripot bilong stretim Irak.

Namba wan wok i bilong lukluk long ol helpim olsem marasin na kaikai sapos i sot. Yunaitet Nesenel bai i larim Irak i salim liklik wel aninit long strongpela lukaut.

Askim i go nau long seketeri bilong Yunaitet Nesen long kamap wantaim gutpela plen bilong mekim ol dispela samting. Em i mas lukim olsem mani i kamap long salim wel i mas go stret long mekim wok helpim ol pipel, na stretim ol bagarap.

Namba tu wok em long lukim olsem ol samting bilong Irak long yusim long pait olsem ges o marasin noguti mas pinis olgeta. Bikpela plen nau em long pinisim olgeta dispela samting em Irak i ken yusim bihain taim long pait.

## Ol beng long Australia i laik strongim yet sekyuriti bilong ol

**BENG SEKYURITI SISTEM I WOK OLSEM**

Skrin i ran antap long rana o rel na i go pas long het bilong haus mani o beng.

Skrin i pawa long pusim go arere o "pasim" wanem samting i stap namel long em.

Dispela sistem em ol i mekim we i ken ran long spit bilong 80 pesen mak long 0.5 sekon tasol.

Taim skrin i "on", dispela hinses long kaunta bai flai i go antap, na i go long kastoma. Na bai rausim wanem samting i stap antap long skrin.

Kompres win i save givim pawa long skrin. Taim wanpela wokman i putim "on", kompres win i kam aut na pusim wanpela "ram", na pusim skrin i go antap.

Skrin em ol i save traime pastaim bipo ol i putim. Bikos ol i ken abrusim katres bilong ol masin gan, ol strongpela pawa sot gan na pistol.

OL beng long Australia i strong yet olsem ol bai i putim ol "pop-up" sekyuriti skrin long beng bilong ol.

Ol i tok strong olsem bihain long indai bilong wanpela yangpela stilman husat i laik stil long beng. Ma ya em skrin i pasim em wantaim antap bilong haus mani o beng taim em wantaim sampela stilman i hensapim ol wokman, na i laik stil.

Sekyuriti bilong ol wokman wantaim kastoma na mani insait long beng o arapela bisnis husat i mekim wok bilong mani em bikpela samting.

Dispela man i bin indai long las Mande apinun long St Leonards brens bilong Advance Beng.

Wanpela man husat i givim nem olsem John i bin lukim we skrin o lait i pasim dispela stilman antap long het bilong haus, na em i indai. Man ya i tok em i amamas olsem dispela stilman i kisim gutpela mekimsave stret.

I gat bilip olsem John i mas wanpela wokman bilong Advance Beng. Em i tok dispela stilman husat i indai

i holim wanpela masin gan, na narapela i holim wanpela pistol. "Mi sore olsem narapela stilman i no laik indai tu," John i tok.

Yu ken tingim olsem bai yu pret tru sapos yu lukim. Tasol long tingting bilong mi, stilman ya i kisim gutpela mekimsave."

Sampela beng i putim pinis ol "pop-up" skrin we kantres i no inap long go insait. Dispela em ol i bin putim long 10-pela yia samting i go pinis.

Australian Bankers Asosiesen i tok ol kastoma bilong em i save pinis long dispela sekyuriti sistem. Na ol i lukim olsem em i gutpela long strongim sekyuriti bilong beng.

Ripot i tok ol wokman long beng i trening pinis long we bilong yusim dispela hevi stil skrin long taim bilong birua. Ol wokman husat i ken lusim laip bilong ol i kisim tok orait pinis long yusim dispela sekyuriti sistem.

Bikpela as bilong dispela em long lukautim ol yet na sekyuriti bilong beng wantaim.

# Senisim ilektorel baundri bilong Menyama na Wapi konstituensi

Dia Edita,

Mi wanpela manki Aiyogi insait long Wapi konstituensi long Menyama distrik, Morobe provins. Mi stap nau long Ramu Suga, Madang provins.

Mi laik autim tingting bilong mi long ilektorel baundri nau i stap namel long Menyama na Wapi konstituensi, insait long Menyama distrik bilong Morobe provins.

Mi laik askim tupela provinsal memba bilong dispela tupela konstituensi wantaim provinsal ilektorel komisen long lukluk na senisim baundri. Bikos baundri nau i stap i no stret.

Dispela ol 4-pela ples Kumai, Minge, Kanagoki na Wopikamaga i mas stap insait long Menya konstituensi. Tasol nau yet ol i stap insait long Wapi

konstituensi.

Dispela senis i mas kamap. Bikos Wapi konstituensi em mipela i mas brukim long maunten bilong Kumai i go pinis long Yakepa ples balus.

Na hapsait long maunten Kumai em 4-pela ples mi kolim antap pinis i ken stap insait long Menyama konstituensi.

Aninit long dispela senis em mi makim, mipela i no inap long brukim wara Kotai. Mipela bai i brukim maunten Kumai tasol.

Yu husat brata bilong Menyama o Wapi i sapotim dispela tingting, OK mi bai i amamas tasol long lukim pas bilong yu long Wantok Niuspepa.

Taitus Soko  
RAMU SUGA

## Ol Tolai tasol i no save bikhet

Dia Edita,

Mi wanpela meri Tolai, tasol nau mi stap long Mame Komyuniti skul long Is Sepik provins. Mi laik bekim pas bilong brata F.Kipsy Kai em i bin kamap long Wantok Niuspepa Namba 879.

Brata Kipsy i tok ol Tolai i save bikhet long pilaim redio kaset, na stapim ol narapela famili long slip gut long nait.

Brata, gutpela yu tingting gut pastaim bihain long yu raitim pas. Bikos i no ol Tolai tasol i save bikhet. Olgeta manmeri bilong dispela graun i save bikhet olsem.

Olsem na maski long bagarapim nating nem bilong ol man, long wanem ol manmeri bilong Niugini Ailan i bagarapim sindaun bilong yu.

Elizabeth. T. Wartovo  
WEWAK.

Salim pas i kam long:

WANTOK  
NIUSPEPA  
P.O. BOX 1982  
BOROKO

## Ol Sinasina plisman mekim wantok sistem

Dia Edita,

Mi wanpela manki Sinasina long Simbu provins, tasol nau mi stap long Kimbe.

Mi laik komplem long ol plisman bilong plis stesin long Sinasina.

Planti taim mi lukim olsem ol i save lusim ol trabelman long kalabus, na i no gat sas bilong ol.

Dispela pasin i no gutpela long mipela

sampela pipel.

Mi laik askim provinsal plis komanda long rausim ol kain piisman olsem.

Bikos ol i mekim planti wantok sistem tumas long lain bilong ol.

Em tasol na husat i laik bekim em laik tasol.

Paul Koroga  
KIMBE

## Tingim Pangia stesin nau

Dia Edita,

Mi wanpela manki Pangia long Sauten Hailans provins, na mi laik komplem long ol memba bilong mipela.

Mi laik askim ol tripela provinsal memba ya, Mailo Timini, Joe Walo Kuna na Jerry Luru Longa.

Olsem wanem na yupela i no laik kisim helpim i kam insait long stretim Pangia stesin? Dispela stesin i luk no gut tru. Bikos bikipela bus i stap raunim na i no gat wanpela gutpela samting i stap long en.

No gat haus sik, no gat inap plisman, ples balus i no gat wantaim pos opis tu.

Planti samting i sot tru long Pangia stesin. Ol publik sevan i no stap gut. Olsem na ol i no save painim amamas long lukluk bilong long ol wok.

Olsem wanem.

Lende Yamo Pecks  
PANGIA S.H.P

## Ol meri Hailans dia tumas

Dia Edita,

Mi laik tokaut long tingting bilong mi long pasin sampela lain i save mekim long kisim mani long pikinini meri bilong ol.

Sampela i kos bikipela na antap tru long prais olsem K6,000 na K7,000. Dispela mak i abrusim tru pe bilong ol meri Wes Nu Briten, we mipela i save baim long K1,500 tasol.

Dispela pasin em mi lukim bikipela long hap bilong ol Hailans taim meri bilong ol i laik marit.

Sapos yupela i laik kisim kain mani olsem long pikinini meri bilong yupela, orait lukautim ol gut tru bai ol i man i ken baim. Na ol i no ken paul nambaut.

Mandela Porolo  
BARIMA

# Maski raunim kain kain raba long lek, nek and han

Dia Edita,

Mi wanpela manki Pindiu insait long Morobe provins, tasol nau mi stap long Kimbe taun Wes Nu Briten provins.

Mi laik autim tingting bilong mi long pasin mi lukim long ol meri i mekim taim ol i save putim ol raba na samting raunim han, lek na nek bilong ol.

Long Kimbe planti meri i gat kain kain raba na samting long skin bilong ol. Dispela i soim ol arapela stret olsem em ol paul meri bilong rot.

Sapos yu gutpela meri, ating yu mas lusim kain samting olsem. Bikos ol man bai i tingting nogut stret long yu. Ol man i ken tok yu pamuk mer. Na bai i laik mekim nambaut long yu.

Mi no jeles o bel hat long yupela ol meri long dispela pasin. Tasol mi tingting long gutpela sindaun wan-

taim man o famili bilong yupela long haus.

Dispela pasin i bin kamap pinis taim wanpela marit meri i bin sindaun long taun i stap, na narapela man i ting em pamuk meri. Em i go stret na askim laik long meri ya, na karim i go pinis. Dispela meri i no ting em marit meri. Bikos em i pret long dispela man nogut ya.

As bilong dispela em bikos meri ya i gat kain kain kala raba na rop i raunim han, lek na nek bilong em. Dispela i givim tingting long man nogut ya olsem em i pumuk meri.

Olsem na ol gutpela susa, plis tingim gut na lusim kain pasin olsem. Bikos ol arapela pipel i kisim krangi tingting long yupela.

Em tasol na husat i laik bekim em laik tasol.

Narocks Moi Gara  
KIMBE

## Tripela bisket long wanpela paket i no inap

Dia Edita,

Mi wanpela manki Pomio insait long Is Nu Briten provins, tasol nau mi stap long Kimbe, Wes Nu Briten provins. Mi gat wanpela bel hevi long olgeta bisket kampani insait long Papua Niugini.

Mi wok long wanpela kampani long Kimbe. Na olgeta moning dispela kampani i save givim mipela wan wan paket bisket bipo mipela i go long wok. Tasol insait long olgeta

paket i gat tripela bisket tasol.

Mi no save pulap long kaikai liklik pipia bisket olsem. Traim na putim 4-pela insait long wanpela paket. Bikos bel bilong mipela i no olsem ol pikinini.

Mipela ol papa. Na pasin bilong putim tripela bisket tasol insait long wanpela paket i no gutpela tumas long ai na bel bilong mi.

P. Kwetu  
KIMBE

## Pasin nogut long Anderson's stua

Dia Edita,

OLGETA taim mi save laik baim ol samting long Anderson's Foodland stua long Mosbi.

Mi laik komplem long dispela waitman i save wok long stua. Olgeta taim mi go insait, mi save harim dispela waitman i save krosim ol skul manki bilong St Francis na Koki komyuniti skul.

Em i save singaut long ol na rausim ol manki taim ol i go insait long kemis. Maski sapos ol i stap tasol long narapela sait bilong stua, em bai singaut yet long ol. Em i save tok, "raus long manki long stua bilong mi."

Mi no klia sapos dispela em i stua bilong em. Tasol mi ting olsem em i stua bilong Mista Anderson. Olsem na sapos em i wokman nating, orait, em i mas pasim maus. Long wanem ol manki i laik baim samting na mani bai i go long stua.

Ol manki i no pik na dok, ol man tu. Mi laikim dispela waitman i mas stap long mekim kain pasin.

Gordons  
MOSBI

## Gavman no lukluk long baksait

Dia Edita,

Gavman bilong tude i wok long lusim tingting long ol samting i stap arere long em, na i wok long go het tasol. Em i laik lukim senis tasol na i go het tasol long karimaut ol wok em i laik kamapim.

Tasol em i no tingting na lukluk go bek long bikipela bagarap i stap bihain long em. Long dispela as na planti hevi i stap yet. Na gavman i no laik kam bek na stretim pastaim.

Ol samting i stap yet wantaim hevi em edukesen, helt, bisnis, sevis na ol arapela moa. Gavman i statim ol dispela pinis long bipo. Tasol ol i no wet na lukim ol i kamap gut, na i karim kaikai pastaim. Ol i laik go het tasol.

Danat Tinapit  
SANDAUN

## Kumul kepten mas kisim asua



• Kumul kepten Stanley Haru .... kikim planti bal tumas.

Dia Edita,

Mi wanpela ragbi lig sapota. Mi laik toktok long nesenel ragbi tim bilong mipela, Papua Niugini Winfield Kumul husat i bin salim kaikai long Frans Roosters long Goroka.

Mi lukim olsem Kumul tim inap long winim dispela gem, tasol kepten Stanley Haru i asua. Bikos em i kikim bal planti taim tumas. Na i wokim ol pilaia bilong em i ran tumas, na i sot win.

Na tu ol kik bilong em i givim bal long ol Frans pilaia long kisim, na i kam skoa.

Mi laik tok i no asua bilong ol pilaia. Em asua bilong Kumul kepten.

Long tingting bilong mi, sapos ol i putim olpela Kumul kepten, na ol olpela pilaia olsem Tuiyo Evei, Tony Kila na Darius Haili, Kumul bai i inap long winim ol Frans isi tasol.

Bikos Sauten na Ailan son i winim pinis ol Frans. Na dispela sem Frans tim i winim PNG Winfield Kumul. Olsem na mipela ol sapota bilong PNG i karim bikipela sem tru.

Francis Tommy  
KIMBE

## Ol meri i mas baim ol man tu

Dia Edita,

Mi save harim olsem ol man mas baim meri pastaim na maritim. Dispela em i no gutpela pasin tumas. Long Buk Baibel, Adam i no baim meri bilong em bipo em i maritim.

I no gat tru wanpela tok olsem i stap long Buk Baibel. Tasol olgeta kristen manmeri bilong dispela graun i mekim dispela pasin nau.

Na tu mi harim olsem ol man i mas baim meri. Bikos mama na papa bilong meri i hat wok long lukautim em.

Tasol olsem wanem long mipela ol man. Mipela i gat ol mama na papa. Mipela ol man i no pundaun nating long Heven.

Andrew Zero  
KIMBE

# Senisim Kumul Ol memba mas sapatim ol kosa nau yet long haus palamen

**Dia Edita,**  
Mi no amamas tumas long dispela kosa bilong Kumul tim. Ating bai ol i mas pinisim em, na kisim wanpela kosa gen.

Bikos long tingting bilong mi, em i no kosim gut Kumul tim bilong mipela. Olsem na ol arapela ovasis tim i save kam na winim mipela.

Mi laikim bai yupela ol bikman bilong PNGR-FL i lukluk long dispela. Na kisim wanpela nupela kosa nau.

Ol selekta tu i mas opim ai bilong yupela, na makim ol gutpela pilala.

**Francis Tommy KIMBE**

## Baim meri bihainim tumbuna pasin

**Dia Edita,**  
Mi laik bekim pas bilong brata ya Stermphy Blaifon i bin kamap long 27 Jun. Brata ya i sapatim ol lain tumbuna bilong em long baim meri long tumuna pasin.

Toktok bilong brata ya i no kisim lewa bilong mi. I tru olsem bipo ol lain tumbuna bilong yumi i save baim ol meri. Dispela long wanem ol tumbuna bilong yumi i no klia long Baibel.

Tasol nau mi yumi ol nupela lain manmeri na yumi noken bihainim dispela pasin moa. Dispela long wanem Adam i no baim Eva. God i givim Eva long Adam long lukautim Adam na tu helpim em.

**David Ekiha RAMU SUGA, LAE**

## Kerowagi haiskul i sot long gutpela tisa

**Dia Edita,**  
Mi gat bikpela wari long ol tisa bilong mipela long Simbu provins.

Kerowagi Haiskul nau i sot tru long tisa. Na nau wanpela kain nupela senis i kamap. Mi no save sapos dispela kain pasin i stap tu long ol arapela haiskul long arapela provins o nogat.

Nau long Kerowagi haiskul, ol tisa bilong komyuniti skul i kam antap na lainim ol manki bilong haiskul. Mi lukim dispela i nogut tru. Bikos save bilong komyuniti skul tisa na haiskul tisa i no wankain. Tupela i bin kisim trening long narapela trening koles.

Dispela i no helpim ol manki long haiskul long lainim ol gutpela na nupela samting. Wanem samting ol i lainim pinis long komyuniti skul i kamap gen long ol i lainim.

Olsem na bai mipela i save long ol samting bilong haiskul olsem wanem, sapos mipela i wok long lainim ol samting em mipela i skul long en pinis?

Plis mi askim provinsal gavman bilong Simbu provins long mekim samting hariap nau. No gut bai save bilong mipela i stap tasol long wanem hap mipela i stap long en.

**Bernard Kuble KEROWAGI**

## Lukaut long ol meri Manus

**Dia Edita,**  
Mi laik komplek long pasin mi lukim long ol meri Manus long Madang.

Taim mipela i ran long sip i go nait, mi lukim ol meri Manus i wok long raun antap long sip long painim man bilong slip wantaim.

Mi lukim dispela long ai bilong mi

yet. Bikos wanpela meri Manus i kam askim mi taim mi slip i stap sapos em i ken joinim mi long bed.

Mi laik toksave long olgeta yangpela man husat bai ran antap long sip i go nait na i laik slip.

**M. T. Dickie MADANG**

## Swokin mas kisim bek Lens wok

**Dia Edita,**  
Mi makim maus bilong ol grasrut manki bilong Tari long Sauten Hailans provins. Mipela i stanu long Mósbi. Mipela i gat liklik wari. Olsem na mipela i laik autim long Wantok Niuspepa.

Mipela i kisim maus bilong Kala Swokin na mipela i laik askim Prais Ministia Rabbie Namaliu long givim Lens Ministia posisen i go bek gen long em. Mipela i lukim olsem Kala

em i wanpela gutpela na trupela minista.

Em i no save paul o mekim wantok sistem olsem ol arapela minista i save mekim. Kala i bin helpim planti grup na man long hevi bilong ol.

Na maski long praim minista i makim ol arere man nambaut long kisim dispela posisen.

**John Tawi MOSBI**

**Dia Edita,**  
Mi wanpela manki Morobe na mi stap long Mosbi siti. Mi gat bikpela bel hevi long pasin mi save lukim long ol memba bilong mipela long palamen i mekim.

Mi save go long haus palamen long taim bilong palamen kibung, na lukim planti samting na pasin bilong ol memba bilong yumi i no gutpela tru.

Taim wanpela memba i laik kirap na toktok long hevi bilong ol pipel bilong em, sampela bai i bikmaus long em. Na mekim ol toktok nambaut long em. Trangu memba ya i laik toktok bai em i save bel hat, o sampela taim bai em i lap. Dispela i save westim taim na gutpela tingting bilong em long toktok.

Mi no wan bel tru long dispela pasin. Bikos husat lida i laik toktok, em i mas toktok. Bikos em i karim hevi, na i mas toktok long hevi bilong em.

Ol arapela memba husat i sindaun i mas pasim maus. Na taim memba ya i pinis, orait ol i mas sapatim hevi bilong em.

Sapos ol memba i mekim olsem, ating bai hevi bilong ol pipel i ken kamap gut, na i gat gutpela rot long stretim.

Olgeta memba i mas sapatim long hevi bilong narapela. Taim narapela i toktok long hevi bilong ol pipel bilong em, olgeta i mas sapatim.

Ating sapos olgeta lida i helpim narapela long hevi bilong em, na i sapatim tingting bilong em, bai gutpela pasin i kamap namel long ol na pipel tu. Hevi bilong pipel tu bai i kamap gut.

Olsem na ol lida i mas sapatim ol yet. Bikos yupela i karim hevi bilong mipela ol pipel bilong Papua Niugini.

**Leni Zero MOSBI**

## Maski westim taim na vot long 1992 ileksen



**Dia Edita,**  
Mi makim maus bilong ol manmeri insait long Papua Niugini, na i laik tokaut long pasin ol nesenel memba bilong mipela i save mekim.

Ripot bilong Wantok Niuspepa long las wik i toktok long ol memba i no givim stretpela ful ripot long ilektorel Fan bilong ol. Dispela i soim piksa olsem ol i paulim planti mani bilong ol pipel pinis. Bikos dispela pasin i bin kamap long bipo yet i kam inap nau.

Mipela ol pipel bai i makim wanem ol trupela lida nau long lukautim mipela. Mipela ting ol trupela lida mipela i makim. Tasol taim ol i lukim mani, tingting bilong ol bai i bagarap olgeta.

Mipela olgeta pipel bilong dispela kantri i mas tingting gut nau. Wanem rot bai kantri bilong mipela i bihainim? Bikos ol lida bilong mipela i no mekim gutpela wok. Ol i tingim poket bilong ol yet.

Mi laik bai olgeta pipel i mas toktok long dispela

samting nau. Sapos ol memba i bikhet het, mipela i mas stap long vot long 1992 ileksen.

Ating dispela bai i givim gutpela skul long ol memba bilong mipela.

Mi tokim yupela ol pipel, bilong wanem mipela i westim taim long votim ol lida. Mipela votim ol i go, na ol i no mekim gutpela wok. Ol i tingim ol yet tasol.

Olsem na maski long vot. Mipela i stap olsem tasol. Long wanem dispela kain pasin bai i stap yet long wanem man mipela i votim.

Maski wanpela gutpela man mipela i makim. Tasol taim em i lukim pes bilong mani, gutpela pasin bilong em bai i senis.

Olsem na mi tok gen, maski vot long 1992 ileksen.

**Joe Mando WEWAK**

# Gavman mas skelim gut wok bilong nesenel gad pastaim

**Dia Edita,**  
Mi laik autim tingting bilong mi long rot gavman i laik kamapim long stapim hevi bilong lo na oda insait long kantri.

Gavman i laik kamapim Nesenel Gad bilong kantri long givim trening long ol yangpela, na mekim ol i wok.

Gavman bai i yusim moa long K70 milien long dispela wok, na K1000 long olgeta yut insait long kantri.

Mi ting gavman i mas givim dispela mani i ge insait long c: ami na plisman long strongim wok bilong ol long karimaut. Gavman i noken westim mani nating long Nesenel Gad. Bikos i gat hevi bilong em i stap.

Plantu yangpela sapos i pinis long 1 via kontrak

bilong ol wantaim Nesenel Gad bai i gat hevi kamap sapos ol i painim laip i hat long autsait.

Ol bai i traim long painim wok long mekim o joinim ol teknikel skul nambaut. Mani gavman bai givim long ol yut i no inap long mekim gutpela wok i kamap.

Sapos ol yangpela ya i pinis long Nesenel Gad, ating bai i gat bikpela hevi i kamap long bihain. Bikos ol lain ya i kisim trening tu long kain wok bilong ami na plis. Ol bai save long yusim gan o pait wantaim birua. Na ol i ken yusim dispela save bilong ol long mekim trabel wantaim ami na plis.

Olsem na mi laik askim gavman long tingting gut long dispela rot pastaim, na karimaut bihain.

**Leni Jo MOSBI**

## Ol marit mas pait long haus

**Dia Edita,**  
Mi wanpela meri Morobe na mi stap long Lae siti. Mi gat bel hevi long wanpela pasin em ol maritman na meri i save mekim long pablik ples.

Taim man na meri i save kros, tupela i mas kisim dispela hevi bilong tupela i go long haus stret.

Sapos tupela i laik pait orait pasim dua bilong haus, na mekim save insait long haus bai nogat man i lukim tupela.

Sampela i save pait long maket ples, long taun na long ol ples i gat planti manmeri i raun long en.

**Eska Kasai LAE**

## Ol Enga plisman mas pasim blanket

**Dia Edita,**  
Mi wanpela manki bilong Wara Wali eria long Enga provins. Mi katim sowlara na stap nau long Kimbe taun, Wes Nu briten provins. Mi laik toktok long ol plisman husat i save so op.

Mi luksave olsem ol plisman long Enga i no save stapim pait. Mi harim na lukim olsem 6-pela man i dai pinis long wanpela pait. Pait ya i bin kamap namel long lain bilong mi wantaim narapela grup long Desemba 1990.

Nogat wanpela plisman i kamap long stapim dispela pait. Ating yupela olgeta plisman long Enga i mas pasim blanket, na go bek lukautim pik long ples bilong yupela.

Yupela i no fit long lukautim lo na oda.

**Laitak Enenge KIMBE**



**CAMBRIDGE**  
A MAJOR SPONSOR

# Seketeriet laik daunim pawa bilong viles kot long Niugini Ailan

**SAM VULUM i raitim**

VILES Kot Seketeriat i bin holim wanpela kibung wantaim ol opisa bilong ol han bilong viles kot long

olgeta Niugini Ailan provins long Rabaul long Trinde inap long Fraide las wik. Ol narapela lain i kamap long kibung em ol presiden bilong komyuniti gavman, ol

viles mejistret, sinia mejistret bilong Rabaul Distrik Kot na Nesenel Kot Jas, Jastis Jalina.

Viles kot opisa i lukautim Rabaul opis, Melky ToKilala i tok dispela em i namba wan taim tru dispela kain kibung i kamap long kantri.

ToKilala i tok kibung i kamap bihain long Nesenel Kot Jas, Jastis Jalina i bin lusim 6-pela kalabusman bilong Kerevat haus kalabus i

go fri. Em i tok dispela i kamap bikos i no gat gutpela lo bilong viles kot. Viles kot i kalabusim ol dispela lain nating.

Em i tok sampela hap bilong nupela Viles Kot Ekt em palamen i bin oraitim long mun Novemba, 1989 kibung bilong en i no stret. Ol viles kot i stat long yusim ol dispela nupela lo long mun Mas long 1989.

ToKilala i tok kibung

long las wik i traim long kamap wantaim sampela tingting bilong stretim ol dispela hap bilong ekt.

ToKilala i tok ol i kamap wantaim planti tingting bilong stretim dispela hap bilong ekt we i no gutpela. Wanpela em olsem ol viles kot i save kalabusim ol man nating. Na nupela tingting em olsem kot i mas kalabusim man husat i mekim tru rong na i no ken kalabusim

ol man nating.


Seketeri bilong Viles Kot Seketeriat hetkwata long Mosbi, Penis Keris i autim ripot i sut long wok bilong ol distrik kot long ol provins.

Prinsipel mejistret long Rabaul i autim tingting bilong wanem kain wok bai ol mejestret long ol provins i mekim long wok bilong ol viles kot.

Nesenel Kot Jas, Jastis Jalina i toktok strong olsem ol kot i

mas luksave long rait bilong ol manmeri. Ol i kolim dispela long Inglis olsem "natural cause of justice." Dispela i min olsem ol manmeri i ken mekim wanem samting na kot i no ken abrusim dispela rait bilong ol.

Narapela wankain kibung nau i kamap long Madang long dispela wik. Dispela kibung i sut long hevi bilong ol viles kot long Momase rijon.



**MOSBI:** Ol plisman i holim na sasim pinis wanpela yangpela man husat i gat 17 krismas long las wik Fraide. Dispela man i bin ranawe long Bomana haus kalabus we em i stap long sas bilong kilim man.

Plis ripot i tok ol plisman i bin lukim em i wok-abaut long 6 Mail setelmen na holim em.

Long wankain taim yet, ol plisman i bin holim na sasim tu wanpela yangpela man husat i gat 19 krismas long Jun Veli. Ol i sasim em long brukim haus na stilim ol samting.

**MOSBI:** Ol plisman i bin holim na sasim wanpela man long Laurebada Avenu long Is Boroko long holim ol piksa buk nogut. Dispela man i gat 32 krismas.

Plis ripot i tok dispela man wantaim ol poro bilong em i bin stap nating long haus bilong ol arapela lain. Ol plisman i kamap sekim olgeta man i go na painim olsem dispela man i karim ol piksa nogut. Na em bai kamap long kot sampela taim long dispela wik.

**WEWAK:** Plis ripot i tok 5-pela man i bin pretim tupela plisman na kisim sotgan bilong ol. Ripot i tok ol 5-pela man ya i bin pretim tupela wantaim naip na sotgan long las wik Fraide apinun, namel long Hagime na Maringe viles.

Dispela tupela plisman i bin stap long Wewak na i laik go bek long Yangoru taim 5-pela man i sut long sotgan na pasim ol long maunten. Katres i brukim glas bilong ka. Tupela plisman i stap na ol 5-pela man ya i kisim sotgan bilong ol na bihain tokim tupela plisman ya long kisim ol i go long Yangoru.

Ol plisman i wok long painimaut yet long dispela.

**MADANG:** Wanpela draiva bilong Bekeri ka i bin helpim ol plisman long holim pasim tupela man husat i laik bagarapim em long rot.

Plis ripot i tok dispela ka bilong bekeri i bin kamap long Bora bris taim 5-pela man i kamap na laik stapim ol. Tasol draiva bilong ka i tanim na ronim ol dispela raskol. Ol arapela pasindia bilong dispela bekeri ka i helpim draiva na ol i holim pasim tupela bilong ol.

Ol i kisim tupela i go long Ramu na lusim long han bilong ol plisman long Ramu plis stesin.

**LAE:** Ol raskol i bin kilim wanpela yangpela ragbi union pilai long Tunde 30 Julai, 1991. Man ya i gat 20 krismas. Plis ripot i tok dispela birua pasin i bin kamap long Saina taun long 4 klok moning.

Ripot i tok sampela man i bin kamap long nait na traim long brukim haus. Tasol em i pait wantaim ol na ol i ranawe. Bihain long 4 klok moning, ol i kam bek wantaim wanpela sotgan na kilim em stret long ai bilong famili bilong em.


Ol eksekutiv bilong Papua Niugini ragbi union i bin makim em tu long tim bilong Saut Pasifik gem long las wik Fraide. Long Tunde apinun, ol eksekutiv bilong ragbi union i stretim rot long dai bilong em.

Ol plisman i painimaut yet long dispela birua.

**WEWAK:** Ol plisman i holim pasim pinis wanpela man ol i bilip olsem i bin statim paia long BMS opis long Is Sepik provins. Ol i bin holim dispela man long Tunde 30 Julai, 1991.

Ripot i tok dispela man em Bais Bugata bilong Kairuru Ailan, Is Sepik provins. Em i gat 30 krismas. Plis ripot i tok ol i bin painim em wantaim ol arapela lain husat i bin kamapim dispela pasin. Na ol i bilip long sampela gen long taim bihain.

## Be with your family




### ...by phone!

Sometimes you don't need to say much. The sound of your voice is often enough to tell them how you're feeling. But isn't it good to know that when the ones you love are a long way away, you can still let them know how you're getting on. You can be together by phone.

With a phone in your home, you are closer to the ones you're close to, for a lot less than you may think.

Call in at your Telecom Business Office, and you'll find out how you can afford a phone in your home.



POST AND TELECOMMUNICATION CORPORATION  
PARTNERS IN 1991 SOUTH PACIFIC GAMES



## Japan i go het yet long helpim ol provinsal haus sik

ANINIT long namba wan hap ridvelopmen projek bilong ol provinsal haus sik, gavman bilong Japan i bin tokaut long mun Julai, 1990 long stretim na wokim gen ol haus sik long Hagen, Lae na Wewak.

Vais Foren minista bilong Japan, Muneo Suzuki na John Giheno (ekting Foren Afeas minista) na minista i bosim Tred na Industri i bin putim mak bilong tupela antap long sampela pepa long Mande. Na dispela ol tok orait i bilong kisim gen

mani bilong givim ol marasin na masin samting bilong ol dispela haus sik.

Long dispela taim yet, tupela i bin sainim tu tok orait bilong wokim haus sik long Kudiawa, Simbu provins.

Gavman bilong Japan i luk-save tu long askim bilong Papua Niugini gavman long sapotim na helpim yet ol provinsal haus sik. Japan Intanesenel Kopresen Ejensi (JICA) i bin makim gavman bilong Japan na sekap long wok bilong stretim narapela

tripela haus sik long Kundiawa, Rabaul na Madang. Na ol i tokaut olsem bikipela wok i mas kamap long ol dispela tripela haus sik pastaim.

Na aninit long namba tu hap bilong dispela projek long dispela yia, wok bai stat nau long Kundiawa haus sik.

Vais Foren minista Suzuki i tok wanpela bikipela samting long kirapim wanpela kantri em long gutpela helt na sindaun bilong ol pipel. Em i tok ol gutpela helti pipel inap wok hat moa bilong helpim kantri

long kirap na go het.

Bikipela wok bilong stretim na putim moa nupela masin samting insait long Mosbi haus sik i pinis. Suzuki i tok gavman bilong Japan i bin givim tu ol marasin na arapela samting long ol haus sik na helt senta long kantri. Dispela i kam aninit long medikal saplai projek.

Em i givim tu ol sut na bokis ais bilong yusim pawa bilong san long ol rurel eria. Dispela i kam aninit long wanpela progrem bilong pait egensim ol strongpela sik nogut.

## PNG i gat K1 bilien dinau yet long ovasis

DINAU em Papua Niugini i gat yet wantaim ol ovasis kantri i kamap nau olsem K1 bilien. Dispela em dinau long indipendens yet i kam inap nau.

Fainens na Plening minista Paul Pora i tok dispela dinau i bilong ol pablik woks projek. Dinau bilong ol arapela bikipela projek olsem Ok Tedi maining, Porgera, Misima gol na Yonki pawa saplai i kamap K2 bilien. Dispela em ol praivet dinau.

Minista i tok planti bilong ol dispela dinau bai stap inap long 25 o 30 krismas bilong bekim. Na i gat ol liklik 2.5 o 3 pesen takis bilong poromanim ol dispela dinau.

Planti projek i wankain olsem na mani bilong praivet dinau i save go long ol wok olsem long Yonki pawa saplai na PTC. Narapela hap i save sut long mekim ol wok bilong bris, rot, pawa stesin na planti arapela kapitel woks.

Pora i tokaut tu olsem kain dinau em Papua Niugini Benging Kopresen (PNGBC) i save givim i wankain long Westpac na ANZ beng. Na PNGBC i helpim pinis planti man na meri long kantri.

Air Niugini i gat bikipela dinau i stap yet wantaim PNGBC. Beng bilong yumi i bin go het tu long helpim Saut Pasifik Gems Faundesen wantaim K3 milien bilong holim ol pilai long mun Septemba.

Pora i tok beng i givim bikipela helpim tru long kirapim planti bikipela wok projek na bisnis long kantri. Olsem na ol pipel i no ken kros sapos ol i no kisim gutpela bekim long askim bilong ol long dinau.

Fainens minista i bin mekim ol dispela toktok long bekim ol askim bilong memba, Gai Duwabane. Gai i bin askim long hamas dinau em kantri i gat long ovasis, na sapos gavman inap pasim mani long lusim kantri.

Pora i tokaut tu olsem ol manmeri bilong arapela kantri i kam wok long Papua Niugini i ken salim mani bilong ol i go long ovasis sapos ol i baim takis na bihainim lo.

Ol ovasis kampani husat i stap wok long kantri i save baim 33 pesen takis.



• Vais Foren Minista bilong Japan, Muneo Suzuki (Iephan) na Ekting Foren Afeas Minista, John Giheno i pasim tok orait olsem Japan bai i wokim gen ol haus sik long Hagen, Lae na Wewak. Lukim stori long antap.

## Luteran opis i bekim tingting bilong gavman long kilim man na putim makmak

SOSOL opis bilong Evanjelikal Luteran Sios bilong Papua Niugini i no wanbel tumas long wanem samting em gavman i mekim long traime stapim hevi bilong lo na oda long kantri.

Insait long wanpela pas em dairekta bilong opis, Pasto Mutengkec Wahazokac i bin raitim long de, 3 Julai, 1991, em i tok "Wanem samting em gavman bilong yu, Mista praim minista i tokaut long mekim bilong pait wantaim hevi bilong lo na oda i givim mipela tupela tingting.

"Dispela kain ol tingting i mekim mipela i askim sapos ol gavman bilong bipo na nau yusim pinis olgeta samting. Na sapos ol i bin givim inap mani bilong pait egensim hevi bilong lo na oda long kantri," dispela pas i tok.

Pasto Wahazokac i askim tu sapos olgeta gavman i bin traime skelim ol ripot na wok painimaut em ol grup na komiti i bin mekim pastaim. Em i tok planti bilong ol dispela ripot na wok painimaut i kosim bikipela mani bilong ol pipel olsem na ol wok i mas kamap long ol.

Em i bin autim tu tingting long sampela samting em i laikim gavman bilong nau long sekap long en. Dispela ol samting em:

1. Kirapim moa teknikal na vokesenel skul bilong helpim bikipela lain skul liva nau i stap na i wok long kamap yet long Papua Niugini. Long wanem, kain pasir bilong skul em

kantri i gat long en i no gutpela moa.

2. Kirapim moa arapela bikipela bisnis, na i no ol maining bisnis tasol. Dispela em ol kain faktori na bisnis bilong wokim klos, ol kaikai na arapela samting bilong kantri yet. Olsem bai ol pipel yet inap kisim helpim.

3. Long ol haus kalabus long kantri:

- putim moa mani i go insait long rihebilitesen progrem bilong ol kalabus.

- stretim ol banis na sekyuriti sistem bilong olgeta haus kalabus long kantri.

- kamapim moa trening bilong ol woka na insevis o skul long wanpela kain wok tasol.

- stretim ol haus na givim gutpela pe long ol woka. Na dispela i mas karamapim tu ol plisman na meri long kantri.

4. I mas gat bikipela wok sekap bilong stretim gen olgeta lo na kot bilong Papua Niugini. Ol plis grup bilong sekap (CID) na kotim ol man na meri i no pinisim olgeta wok bilong ol. Planti wok i stap nating yet.

Dispela i kamap bikos i no gat inap mani na helpim long wok bilong ol plisman. Olsem na plis i mas kisim moa mani.

5. Givim moa helpim long Nesenel Yut Muvmen Progrem. Na sekap long wanem as tru na em i no wok gut. Maski long yusim nating bikipela mani gen long statim nupela skim, we i sut long Nesenel Gad Skim.

## Ol primia askim nesenel gavman long no ken sapotim Helsingut ripot

OL primia i askim nesenel palamen long no ken sapotim yet ripot bilong Heni Helsingut long rausim ol provinsal gavman.

Long kibung bilong ol primia long Madang, primia bilong Manus na siaman bilong provinsal riviui komiti, Stephen Pokawin i tokaut strong logn no ken mekim ol senis yet. Em i tok ripot bilong Helsingut i no soim gutpela na wanam bikipela asua em provinsal gavman sistem i abrus long en.

Pokawin i tok komiti bilong Helsingut i mas skelim na lukluk gut gen long dispela ripot wantaim nupela komiti grup pastaim long senis ya i kamap. Em i tok sapos i gat gutpela rot na ripot i kamap, orait, senis i ken kamap bihain.

Pokawin i tok ol i bin raitim pas i go pinis long praim minista long lukim na bekim. Ol i lukluk long kisim sampela bekim i kam bek long praim minista taim em i kam bek long ovasis raun bilong em.

Ripot i laikim Helsingut wantaim komiti bilong em, husat i laik kamapim dispela senis, i mas lukluk

i go moa long pes 15

## De 31 Julai i bilong tingim populesen long wol

### EILEEN TUGUM SENGE i raitim

OLGETA hap long wol i bin holim de bilong tingim namba bilong ol manmeri na pikinini (populesen) long wol long 11 Julai. Long Mosbi, dispela i bin kamap aste, Trinde 31 Julai long Tabari Ples, Boroko.

Dispela de bilong tingim populesen bilong wol i bin kamap las yia long Mosbi. Na ol manmeri i ken tingim populesen long wol tude na wanem kain senis i kamap nau.

I tru olsem taim bilong tingim dispela de i pinis, tasol em i bikipela de. Olsem na grup bilong ol



• Ol lain Kiwai i hatim danis long Wol Populesen De long Tabari Place long Mosbi. Ol opisa bilong Yut na Hom Afeas dipatmen i go pas long putim kamap dispela de

# Nupela haus sik bilong Mosbi bai kisim nau ol sikman

**SAM YAKAM** i raitim

LONG Tunde 30 Julai, 1991 minista bilong Helt, Gerald Beona na Foren Afeas minista bilong Japan Muneo Suzuki i bin opim nupela haus sik bilong Mosbi.

Wok bilong nupela haus sik i stap aninit long helpim em gavman bilong Japan i givim. Na Kumagai Gumi kampani bilong Japan yet i bin wokim haus sik. Mosbi haus sik em i wanpela bikpela haus sik. Na planti pipel i save kam long en.

Nau yet, Beona i tok Mosbi haus sik i bin stap olsem ples bilong skulim ol dokta na wokman bilong haus sik. Nupela haus sik bai helpim moa long 330 tausen manmeri insait long Nesenel kapital Distrik na Sentrel provins.

Beona i tok pastaim tru long 1989, gavman bilong Papua Niugini i tingting long stretim ol bikpela haus sik na bringim stended bilong olgeta insait long kantri i go antap. Long dispela as Papua Niugini gavman i askim gavman bilong Japan long helpim na stretim bikpela haus sik bilong Mosbi.



• Tupela sista i traime nupela bed na kabod insit long Wod 2. Nupela haus sik ya i op pinis long Tunde 30 Julai. Insait long dispela haus sik i gat 580 bed olgeta wantaim kabod bilong em yet.

Japan i bekim askim bilong Papua Niugini gavman wantaim K21.3 milien bilong istretim dispela haus sik. Na Kumagai Gumi kampani i statim wok bilong dispela nupela haus long stat bilong mun Mas, 1989.

Insait long dispela nupela haus sik i gat "Aut pesen dipatmen, ples bilong kisim marasi, ples bilong glasim bodi man, bilong putim ol daiman na kalim man. Tu dispela nupela haus sik i gat moa long 580 bed bilong ol sik manmeri. Na antap long K21.3 milien bilong stretim dispela haus sik, gavman bilong Japan i givim narapela K1.15 milien bilong baim ol

nupela masin samting.

Japan Vais Foren minista Muneo Suzuki i bin tokaut olsem, nau yet gavman bilong Japan i lukluk long givim moa helpim long istretim wok bilong helt insait long Papua Niugini.

Suzuki i tok bihain long bikpela haus sik bilong Mosbi em bai lukluk long ol arapela senta olsem Lae, Hagen, Madang na Kundiawa. Dispela 4-pela ples gavman bilong Papua Niugini i makim pinis long Kumagai Gumi i statim wok long en.

Wok bilong stretim ol bikpela haus sik long Mosbi, Lae, Kundiawa, Madang na Wewak bai helpim helt sevis,

## Ol primia askim nesenel gavman long i no ken sapotim Helsingut ripot

i kam long pes 14

gut gen long dispela wok gut pastaim na bihain kamapim ol senis. Bikos ripot ya i no gat strong-pela as bilong rausim provinsal gavman sistem.

Tasol nau yet ol i no kisim wanpela bekim i kam long Helsingut wantaim komiti bilong em. Helsingut i stap nau long hevi bikos pikinini meri bilong em i dai olsem na dispela pas bai i stap liklik inap em i kam bek long wok.

Wanpela kaunsil bilong Kompim lokal gavman kaunsil, David Pilyo i givim sapot bilong em long rausim provinsal gavman sistem. Em i tok taim provinsal gavman i kamap, em i no lukim wanpela samting i kamap long distrik bilong em.

Em i tok ol provinsal gavman i abrus long planti samting bilong mekim na yusim dispela sans bilong go insait long nesenel politik.

## Wok bilong Lihir gol main i stat gen

WOK bilong Lihir gol main long Nu Ailan provins i op gen bihain long em i pas long 3 Julai.

Ol papa bilong graun i pasim wok bilong main bihain long kampani, Kenecott Niugini Maining Join Venja i no bekim ol askim bilong ol.

Ol i laikim join venja long rausim banis we i brukim graun kampani i wok long en na graun bilong ol. Ol i laikim tu pe bilong ston em kampani i save kisim long wokim ol rot i go antap long K20. Kampani i mas baim tu poket mani bilong ol eksekutiv bilong Lihir Lenonas Maining Asosiesen.

Ol i promis long dispela taim olsem ol bai i no inap long larim kampani long wok gen inap ol i tok tok long namba wan bos bilong kampani, Tom Robert long Australia.

Tasol menesa bilong join venja long Mosbi opis, Ron Brew i tok olgeta samting nau i kamap orait gen. Em i tok dispela i kamap bihain long kibung ol i holim wantaim seketeri bilong dipatmen bilong Nu Ailan na ol papa bilong graun.

Brew i tok ol i toktok tu wantaim ol namba tu presiden bilong Lenonas Asosiesen. Long ol dispela kibung ol i toktok long hevi bilong ol papa

bilong graun na traime long stretim.

Em i tok ol stori i kamap olsem ol papa bilong graun i mekim planti samting long pasim wok bilong main, tasol em i tok i no gat wanpela bikpela samting i kamap.

Wantok i askim sapos ol papa bilong graun i amamas long bekim bilong ol opisa bilong join venja. Brew i tok ol papa bilong graun na ol wokman i amamas olsem na ol i go bek wok. Olgeta wokman i go bek na wok bilong kampani i go het nau.

Tasol minista bilong Helt long Nu Ailan provinsal gavman, Vincent Ambiah i tok ol papa bilong graun long Lihir na provinsal gavman i laikim bai wok bilong projek tru i kamap hariap.

"Kennecott i no ken haitim ol samting long ol pipel bilong mi. Ol i mas soim long mipela olsem ol i gat bikpela laik long painim gol long Ailan. Nu Ailan i no laik westim taim wantaim ol kampani husat i no gat gutpela plen bilong wok," Ambiah i tok.

Em i askim Kennecott long kamap wantaim gutpela plen na ol rot wok bung wantaim ol pipel.

## Nupela tingting bai oraitim lo yet long skelim mak na pasin bilong kompensesen

GAVMAN i laik kamapim nupela lo long tambuim pasin bilong askim kompensesen na larim lo yet long skelim.

Minista bilong Jastis, Bernard Narokobi i putim dispela ripot i go long palamen bilong senisim ol pasin em kompensesen i wok long kamapim.

Narokobi i tok, long kibung bilong ol Hailans primia long lsten Hailans provirs,

ol i bin oraitim dispela lo long kamap. Dispela lo i laik kamap long stapim ol manmeri long askim na kisim kompensesen nating. Olgeta samting i mas go long han bilong lo yet long stretim. Ol man i no ken kisim kompensesen tu long pasin bilong baim samting wantaim bia.

Em i tok ol man husat i save kilim man i save kisim taim long kalabus tasol ol lain bilong man

husat i stap long hevi i no save kisim kompensesen. Olsem na sapos dispela lo i kamap tru, bai kot i putim sas bilong baim man i kisim hevi long K5,000. Dispela pe i no inap karamapim pasin bilong baim bia na givim long ol lain i stap long hevi.

Dispela lo i bungim tingting na pasin bilong tumbuna na lo bilong waitman long givim sampela amamas i go

long ol lain i kisim hevi.

Long hevi we ka i kilim man, i gat lo i banisim dispela. Lo ya i stap aninit long lo bilong *Basic Protection Act*. Sas bilong em i abrusim pinis K2,000 na nau i stap long K5,000. Sapos ol lain i stap long hevi i askim moa long dispela mak, bai hevi ya i go long kot. Sas bilong kilim man i dai i no gat taim bilong em long lusim kalabus.

Sapos ol i baim kompensesen pinis, bai Probesen Opisa i givim ripot long Jas. Wantaim dispela ripot, Jas bai skelim na daunim taim bilong man ya long kalabus.

Jastis minista i ritim ripot ya pinis na askim palamen long pasim ol dispela lo. Ol dispela lo em;

- No gat kompensesen oda aninit long dispela lo,
- Tambuim pasin

bilong baim kompensesen wantaim bia na

• Ol samting bilong yusim long baim kompensesen i mas kos K5,000 o moa sapos ol i no yusim mani. Sapos ol i yusim mani long baim kompensesen bai kot yet i mas skelim dispela.


Narokobi i tok as bilong kamapim dispela lo em long tambuim kompensesen long kamap nating nat-

ing. Ol man husat i askim long kompensesen bai kisim taim long kot sapos kot i skelim olsem ol i rong.

Dispela lo bai tambuim ol man i pasim rot, bris, wara, pretim arapela manmeri na bagarapim ol bihainim askim bilong ol long kompensesen. Dispela hevi bai kisim sas wantaim 7-pela yia kalabus na Gret 5 mejistret bai harim dispela kot.



Tingim ol tevel • Husat i save, nogut bilas long het i pun-daun. Em wanpela studen bilong Nu Allan i soim danis bilong amamasim ol tevel. Em i danis long taim bilong Alyura Nesenel Hai Skul So



Kerevat Institut stadi long saksak: Willie Namori i sanap poromanim wanpela yangpela saksak ol i planim nau tasol long Kerevat Agrikalsa Riset Institut, Is Nu Briten provins. Institut i traime nau long planim sampela saksak bilong mekim sampela wok painimaut.

# Tewel meri i stretim wari bilong tripela brata

BIPO bipo tru long taim bilong tumbuna, i gat tripela brata i save stap long ples Mulaganni long Kombe eria bilong Wes Nu Briten provins. Nem bilong ol em Sanga, Vava na Ako.

Papa na mama bilong ol i dai pinis. Olsem na ol tasol i save stap long dispela ples.

Tasol nogat wanpela famili o arapela manmeri long ples i save helpim ol long kaikai. Ol i save stap long strong bilong ol yet.

Planti taim ol i save stap wantaim wari. Bikpela brata Sanga i lukim olsem na i sori tru long tupela liklik bilong em.

Em i save tingting planti long mekim sampela samting bai ol i gat inap kaikai long haus oltaim.

Wanpela taim Sanga i tokim Vava na Ako olsem em bai i go raun long bus, na painim sapos i gat sampela hap graun bilong mekim gaden.

Em i raun long bikbus i stap tasol em i no painim wanpela hap graun. Olgeta gutpela hap bilong mekim gaden em ol arapela manmeri long ples i mekim gaden pinis. Sampela gutpela hap we gaden i no kamap yet em ol i putim mak tu long ol pinis.

Sanga i mekimsave long painim gutpela hap graun long moning taim yet i go inap apinun. Em pilim sori long tupela liklik bilong em, na i stat long wokabout isi isi i go bek long ples.

Em abrusim ol gaden i go na i tingting planti tru long wanem samting bai em i mekim nau. I no longtaim em i stat long tingim mama na papa bilong ol, na i wari olgeta.

Sapos tupela i no dai bai mi wantaim tupela liklik i no inap long lus olsem. Mipela



bai i gat gaden bilong kisim kaikai olgeta taim. Tasol tupela i lus pinis nau na ol kandre i no luksave moa long mipela.

Em i wok long tingting olsem na wokabout i go bek long ples.

I no longtaim em i abrusim wanpela gaden na i bungim wanpela lapun meri.

Sanga i no save lukim dispela lapun meri long bipo. Olsem na em i pret nogut tru. Bikos em i tingting olsem nogut dewel meri i laik giaman na paulim em.

Sanga i kisim dispela kain tingting, na hariap tru em i laik katim long narapela rot na i go. Tasol lapun meri i

lukim em pinis. Na i singautim em long kam bek.

Sanga i strong na i laik ranawe. Tasol lapun meri i singaut gen. Olsem na isi tasol Sanga wokabout i go insait long gaden. Tingting bilong em i wok long pret yet.

Sanga i kamap klostu na lapun meri i tokim em long helpim na planim sampela taro na banana. Hariap tru Sanga i harim tok na i stat long planim ol taro na banana long gaden.

Em i tingting olsem nogut em i no harim tok bai dewel meri ya i paulim em. Olsem na em i wok hariap tru na planim olgeta banana na taro long gaden.

Samting tru em mama bilong em i tanim olsem dewel meri. Na i kamap long helpim em. Tasol Sanga i no kisim dispela tingting.

Sanga planim olgeta banana na taro pinis, na lapun meri i tokim em, "Yangpela man. Tenkyu tru long helpim mi. Em i orait, yu go long ples na tripela de bihain yu kam long dispela gaden.

"Ol kaikai bai i redi. Yu kam bek wantaim tupela liklik brata bilong yu na kisim olgeta dispela kaikai. Olgeta dispela kaikai long gaden i bilong yupela."

Taim Sanga i harim olsem, bel bilong em i amamas nogut tru. Em i ran hariap i go long ples long tokim tupela liklik bilong em, Vava na Ako. Olgeta i kisim tingting pinis olsem lapun mama i mas kamap olsem dewel meri, na i kam long helpim ol.

Ol i wari nogut tru na i stap. Semtaim ol i amamas wantaim.

Tripela de bihain ol i kirap long bikpela moning tru. Ol i kirap kaikai liklik na i stat long wokabout i go long gaden ya.

Ol i kamap na lukim dispela gaden i pulap stret long banana na taro. Ol kaukau tu i no pilai pilai. Gaden ya i pas stret long kain kain kaikai. Bikpela wari bilong ol tripela ya i pinis stret. Ol i pulapim basket bilong ol wantaim sampela kaikai, na singsing wantaim i go bek long ples.

Sampela kaikai ol i larim i stap bilong kisim long bihain taim.

Olsem na tude long ples Mulaganni long Kombe eria, ol gaden kaikai olsem kaukau taro na banana i pulap stret.

Em tasol liklik stori bilong mi.

Ken Kalus  
BIALLA



Wanpela lapun pul long kanu i go na sampela manki i krosim em. Ol i tok, "Hel lapun! Yu blari longlong siek baga lapun stret!"

Lapun bel hat na bekim long ol olsem, "Yu silly boys. Yu come to my house, mi bai givim yupela gut wan. Yu no fit mi baga."

John Wena  
MADANG

Wanpela man Sepik i slip wantaim meri pikinini bilong em long haus. Dispela na it graun i sek wantaim haus. Bikpela guria i kamap.

Papa kirap nogut na i go ausait long bed. Em ting olsem em i kisim trausis bilong em na putim, Tasol nogat.

Em supim long meri blaus bilong misis na sisti i go ausait.

Em lukim olsem em i rong pinis na sisti i go insait long haus long senis. Tasol em i pret long nogut haus i buk, na i tanim bek long lata.

Mama wantaim ol pikinini i lukim papa na kilim skin stret long lap.

Charles Sumayo  
SIMBU

Wanpela taim Kanage i sindaun long haus win i stap. Na meri bilong em wantu i go antap long haus boilim kumu gras nating long paia, bilong kaikai wantaim saksak. I nogat tin pis long go wantaim.

Taim kumu i tan pinis, em putim antap long saksak bilong Kanage. Na singaut i go daun long Kanage, "Mipela tanim saksak nating o?"


Na Kanage bekim na singaut i go antap long haus, "Yu tanim saksak nating bai yu kaikai wantaim wanem propeti."

Kanage i laik tok protin tasol tang i popala na em i tok propeti.

Jack Mawi  
WEWAK

Bihain long krismas holide, tambu bilong Kanage i lusim Rabaul, na i kalap long Air Niugini balus long go bek long Mosbi siti. Balus i go pundaun long Hoskins long kisim sampela moa pasindia.

Tambu bilong Kanage i pilim toilet na i go ausait. Na i go toilet long teminel i stap. Wanpela sekyuriti i no save olsem tambu bilong Kanage i stap insait na i go pasim dua bilong toilet.



Asaro tevel • Wanpis bilong Asaro i rausim lang long taim bilong Aiyura So. Ol studen bilong Aiyura Nesenei Hai Skul i save putim kamap kain so long olgeta yia

## Mi no save long wanem hap bilong marit



Dia Laiplain,

Mi wantaim pren meri i tingting long marit, bikos laik bilong mitupela i pas wantaim. Tasol mitupela i gat hevi long bilip bilong mitupela. Meri i kristen na mi nogat.

Meri ya i save go long lotu olgeta taim bikos em i kristen. Mi no save go long lotu, bikos kastom bilong mi i tambuim lotu.

Mitupela i save olsem marit i save kamap long haus lotu. Tasol dispela i no bihainim pasin tumbuna bilong mi. Meri i save askim mi long go lotu wantaim em. Tasol mi no

save harim tok. Bikos tumbuna pasin bilong mi i stapim mi long dispela.

Olsem na mi no save, wanem rot bai mitupela i bihainim long marit?

KASTOM MAN

Dia Pren,

Hevi bilong yu i no bikpela samting tumas long stretim. Yu ken marit long pasin tumbuna, o resistaim marit bilong yutupela long Resista - Jenerel Opis. Yu ken stretim tu wantaim ol lain bilong yu, na holim marit bilong yutupela.

Sapos yutupela marit long wanpela bilong ol dispela pasin, bai yutupela i no inap long wari long marit long haus lotu. Ating hevi bilong yu em long painim ples bilong holim marit bilong yutupela.

Ating kastom bilong yu i no oraitim yupela long maritim ol kristen meri? Bikos yu i no save laik go long lotu, taim meri bilong yu i askim yu long go wantaim em.

Sampela taim marit namel long ol kristen na i no kristen manmeri i save bagarap. Olsem na yu wantaim pren meri bilong yu i mas toktok gut. Na traim long kamap wantaim wanpela tingting pastaim long yutupela i marit.

Sapos yutupela i gat pikinini, bai yutupela i kros long wanem lotu bai ol pikinini i bihainim. Bai yu orait long ol

pikinini bilong yu long kamap kristen, o bihainim pasin kastom bilong yu?

No ken ting olsem yu man, na meri bai i harim tok bilong yu. Marit i no olsem wanpela man tasol i bosim famili, na mekim olgeta samting long laik bilong em.

Mipela i askim yu long sindaun gut wantaim pren meri bilong yu na skelim gut hevi ya pastaim.

Traim long toktok long ol samting ya pastaim. Na sapos yutupela wantaim i wan bel long en, em i orait.

Sapos yutupela i no inap long kamap wantaim gutpela rot, na tingting long stretim hevi ya, orait ating yutupela i mas lusim marit ya i stap pastaim, inap tok orait i kamap gut bihain.

LAIPLAIN





# MUSIK na TELEVISEN

## Nupela Pacific Gold studio long Mosbi i stat katim ol kaset pinis

### FRANCIS ULIAU i raitim

NAMBA tu musik studio bilong Pacific Gold long Mosbi i stat pinis long katim ol kaset.

Namba wan 4-pela musik grup em ol ensinia na wokman bilong studio long Mosbi i bin katim i kam long Hanuabada, Kikori, Bereina na Kerema. Studio i bin stat katim ol kaset long las mun.

Menesing dairekta bilong Pacific Gold, Greg Seeto yet i no klia gut long wanem taim stret bai ol dispela namba wan kaset i redi. Tasol em i tok, "Mipela i stat katim pinis ol kaset long las mun na dispela ol kaset bai redi long sampela mun bihain."

Pacific Gold rekoting studio i winim gen nem bikos nau em i katim kaset wantaim nupela strongpela pawa 56 trek rekoting masin bilong en. Dispela nupela masin bilong Pacific Gold long katim kaset i winim tru ol arapela nau ol kain kain studio i

save yusim.

Greg i no inap tokaut tu long wanem taim stret bai ol i opim studio.

Tasol dispela i stap long han bilong ol boi long studio yet. Nupela Pacific Gold studio long Mosbi i stap long Gordons. Olgeta wok bilong katim, stretim na redim kaset tu nau bai i kamap insait long studio yet.

Dispela nupela studio bilong Pacific Gold i winim tru

namba wan studio bilong en long Rabaul. Wantaim olgeta dispela samting, i luk olsem musik bilong Pacific Gold tu bai i go moa yet.

Pacific Gold i bin kamapim nem bilong planti biknem musikman na meri long Papua Niugini tude. Sampela bilong ol dispela lain em kain man olsem George "Telek" Mamua, Julie Turalir Toliman, Kanai Pineri, John Wong husat i bin stap wantaim ol bipo tasol nau i

kalap i go long Chin H Meen, Glen Low, Fabian Tadoi, John Warbat - man husat i laik wokim gita i toktok, Christopher Manduwali bilong Sepik na planti arapela musik lain.

Pacific Gold i bin kamapim tu nem bilong planti musik grup long kantri. Sampela bilong ol dispela grup em man olsem George "Telek" Mamua, Junior Unbelievers na planti arapela lektrik musik ben.

Tasol em i no luk-tasol long ol lek-

'trik ben. Nogat. Pacific Gold i wok strong tu long helpim nem bilong ol stringben bilong olgeta hap bilong Papua Niugini.

Long dispela as, planti stringben bilong Niugini Ailan rijon yet, Momase na Hailans rijon i save brukim solwara bilong go long Rabaul na bungim Glen Low na Nelson Amos long hap bilong katim ol kaset.

Pacific Gold i no bin katim planti kristen kaset tumas long dispela yia.

Em i bin wokim liklik tasol wantaim wan wan man na meri na grup.

Na nau, ol lain bilong Papua rijon i ken amamas bikos i gat wanpela studio long Mosbi yet. Olsem na ol lain bilong Westen provins, Popondetta, Samarai, Sentrel na ol ples insait long Nesenel Kapitell Distrik i ken kamap tasol long Mosbi na katim kaset.

Long dispela ol namba wan 4-pela kaset em Pacific Gold i bin statim, tupela em stringben musik na tupela em lektrik ben.


Narapela bikpela samting em Pacific

Gold i mekim em long sapotim gut tru ol musikman na meri long kantri. Dispela i kamap ples klia long taim Pacific Gold i helpim na lukautim wokabaut bilong wanpela lektrik ben bilong Australia husat i bin kam raun long Papua Niugini. Dispela grup em *Not Drowning Waving*.

Na long taim tripela musikman bilong Papua Niugini i go long ovasis, Pacific Gold i kam insait na sapotim ol. Dispela kain wok bilong Greg na ol boi bilong em bai helpim tru musik bisnis na wok long kamap bikpela long kantri.



• Ben, Pius na Telek wantaim papa bilong Pacific Gold Studio, Greg Seeto i bung wantaim long amamasim ben bilong Australia, Not Drowning Waving. Ben, Pius na Telek i pilai na raun wantaim dispela ben long Australia




## EMTV

<p><b>THURSDAY 1ST AUGUST, 1991</b></p> <p>6.00 TEST PATTERN AND MUSIC</p> <p>6.27 STATION OPEN</p> <p>6.30 ITN WORLD NEWS</p> <p>7.00 TODAY SHOW (G)</p> <p>9.00 STATION CLOSE</p> <p>1.42 STATION RE-OPEN</p> <p>1.45 MIDDAY WITH RAY MARTIN (PGR)</p> <p>3.00 SESAME STREET</p> <p>4.00 KIDS KONA</p> <p>4.30 TEENAGE MUTANT NINJA TURTLES</p> <p>5.00 THE FLINTSTONES</p> <p>"The long long weekend"</p> <p>5.27 EMTV TOKSAVE</p> <p>5.29 NATIONAL EMTV NEWS</p> <p>5.30 HOME AND AWAY</p> <p>6.00 NATIONAL EMTV NEWS</p> <p>6.30 A CURRENT AFFAIR (G)</p> <p>7.00 SALE OF THE CENTURY (G)</p> <p>7.25 EMTV NEWS UPDATE (G)</p> <p>7.30 NEIGHBOURS (G)</p> <p>7.52 EMTV TOKSAVE</p> <p>7.55 EMTV NEWS UPDATE</p> <p>8.00 HEY DAD</p> <p>8.54 EMTV NEWS UPDATE</p> <p>8.59 EMTV NEWS MAGAZINE</p> <p>9.00 21 JUMP STREET</p> <p>"A big disease with a little name" (PGR)</p> <p>10.00 SPORTS ACTION</p> <p>10.57 MEDITATION WITH PASTOR WALO ARNI (G)</p> <p>11.00 STATION CLOSE</p>	<p><b>FRIDAY 2ND AUGUST, 1991</b></p> <p>6.00 TEST PATTERN AND MUSIC (G)</p> <p>6.27 STATION OPEN</p> <p>6.30 ITN WORLD NEWS (G)</p> <p>7.00 TODAY SHOW</p> <p>9.00 STATION CLOSE (G)</p> <p>1.42 STATION RE-OPEN</p> <p>1.45 MIDDAY WITH RAY MARTIN (PGR)</p> <p>3.00 SESAME STREET (G)</p> <p>4.00 THE REAL GHOST BUSTER</p> <p>4.30 TEENAGE MUTANT NINJA TURTLES</p> <p>5.00 THE FLINTSTONES (G)</p> <p>"Two men on a dinosaur"</p> <p>5.27 EMTV TOKSAVE</p> <p>5.29 NATIONAL EMTV NEWS BREAK (G)</p> <p>5.30 HOME AND AWAY (G)</p> <p>6.00 NATIONAL EMTV NEWS</p> <p>6.30 A CURRENT AFFAIR (G)</p> <p>7.00 SALE OF THE CENTURY (G)</p> <p>7.25 EMTV NEWS UPDATE</p> <p>7.30 NEIGHBOURS (G)</p> <p>8.00 FAMILY TIES (G)</p> <p>"Super Mom"</p> <p>8.26 EMTV TOKSAVE (G)</p> <p>8.29 EMTV NEWS UPDATE (G)</p> <p>8.30 SPORTS ACTION (G)</p> <p>"Rugby League"</p> <p>10.24 NATIONAL EMTV NEWS UPDATE</p> <p>10.29 EMTV NEWS MAGAZINE</p>	<p>10.30 GUNSMOKE (PGR)</p> <p>"Blind Man's Bluff"</p> <p>11.27 MEDITATION</p> <p>11.30 STATION CLOSE</p> <p><b>SATURDAY 3RD AUGUST, 1991</b></p> <p>8.00 TEST PATTERN AND MUSIC</p> <p>12.57 STATION OPEN</p> <p>1.00 WIDE WORLD OF SPORTS (G)</p> <p>5.00 LAVERNE &amp; SHIRLEY</p> <p>"Rock 'N' Roll"</p> <p>5.27 EMTV TOKSAVE (G)</p> <p>5.29 NATIONAL EMTV NEWS BREAK</p> <p>5.30 GILLETTE (G)</p> <p>6.00 NATIONAL EMTV NEWS (G)</p> <p>6.30 HEY HEY IT'S SATURDAY (G)</p> <p>8.22 EMTV TOKSAVE</p> <p>8.25 EMTV NEWS UPDATE (G)</p> <p>8.30 SPORTS ACTION (G)</p> <p>"Rugby League"</p> <p>10.29 EMTV NEWS MAGAZINE</p> <p>10.30 HAWAII 5-0 (PGR)</p> <p>"Didn't we meet at a murder"</p> <p>11.27 MEDITATION</p> <p>11.30 STATION CLOSE</p> <p><b>SUNDAY 4TH AUGUST, 1991</b></p> <p>8.00 TEST PATTERN AND MUSIC</p> <p>10.55 STATION OPEN</p>	<p>11.00 WIDE WORLD OF SPORT</p> <p>1.00 BUSINESS SUNDAY</p> <p>2.00 SUNDAY (G)</p> <p>4.00 SPORTS SUNDAY</p> <p>6.00 NATIONAL EMTV NEWS</p> <p>6.23 THE ROAD TO THE 1991 SOUTH PACIFIC GAMES</p> <p>6.30 SPORTS ACTION</p> <p>"Rugby League"</p> <p>7.55 CHIT CHAT WITH SIR PAULIAS MATANE</p> <p>8.00 60 MINUTES</p> <p>8.52 EMTV TOKSAVE (G)</p> <p>8.55 NATIONAL EMTV NEWS UPDATE</p> <p>9.00 SUNDAY NIGHT MOVIE</p> <p>"Rattle of a simple man" (MAO)</p> <p>10.27 MEDITATION</p> <p>10.30 STATION CLOSE</p> <p><b>MONDAY 5TH AUGUST, 1991</b></p> <p>6.00 TEST PATTERN AND MUSIC</p> <p>6.27 STATION OPEN</p> <p>6.30 ITN WORLD NEWS (G)</p> <p>7.00 TODAY SHOW (G)</p> <p>9.00 STATION CLOSE</p> <p>1.42 STATION RE-OPEN</p> <p>1.45 MIDDAY WITH RAY MARTIN (PGR)</p> <p>3.00 SESAME STREET (G)</p> <p>4.00 KIDS KONA (G)</p> <p>4.30 TEENAGE MUTANT NINJA TURTLES (G)</p> <p>5.00 THE FLINTSTONES (G)</p> <p>5.27 EMTV TOKSAVE</p> <p>5.30 HOME AND AWAY (G)</p>	<p>5.29 EMTV NEWS BREAK</p> <p>5.30 HOME AND AWAY (G)</p> <p>6.00 NATIONAL EMTV NEWS</p> <p>6.30 A CURRENT AFFAIR (G)</p> <p>7.00 SALE OF THE CENTURY (G)</p> <p>7.25 EMTV NEWS UPDATE</p> <p>7.30 NEIGHBOURS (G)</p> <p>7.52 EMTV TOKSAVE</p> <p>7.55 NATIONAL EMTV NEWS UPDATE</p> <p>8.00 THE YOUNG DOCTORS</p> <p>8.54 EMTV NEWS UPDATE</p> <p>8.59 EMTV NEWS MAGAZINE</p> <p>9.00 FLYING DOCTORS</p> <p>10.00 SPORTS ACTION</p> <p>11.27 MEDITATION WITH PASTOR WALO ARNI</p> <p>11.30 STATION CLOSE</p> <p><b>TUESDAY 6TH AUGUST, 1991</b></p> <p>6.00 TEST PATTERN AND MUSIC</p> <p>6.27 STATION OPEN</p> <p>6.30 ITN WORLD NEWS (G)</p> <p>7.00 TODAY SHOW (G)</p> <p>9.00 STATION CLOSE</p> <p>1.42 STATION RE-OPEN</p> <p>1.45 MIDDAY WITH RAY MARTIN (PGR)</p> <p>3.00 SESAME STREET (G)</p> <p>4.00 THE REAL GHOST BUSTERS (G)</p> <p>4.30 TEENAGE MUTANT NINJA TURTLES (G)</p> <p>5.00 THE FLINTSTONES (G)</p> <p>5.27 EMTV TOKSAVE (G)</p> <p>5.29 EMTV NEWS BREAK</p> <p>5.30 HOME AND AWAY (G)</p>	<p>6.00 NATIONAL EMTV NEWS</p> <p>6.30 A CURRENT AFFAIR</p> <p>7.00 SALE OF THE CENTURY (G)</p> <p>7.25 EMTV NEWS UPDATE</p> <p>7.30 NEIGHBOURS (G)</p> <p>8.22 EMTV TOKSAVE</p> <p>8.25 PNG WINFIELD LEAGUE 1991</p> <p>8.35 THE YOUNG DOCTORS (G)</p> <p>9.29 EMTV NEWS UPDATE</p> <p>9.34 EMTV NEWS MAGAZINE</p> <p>9.35 THE EQUALIZER (PGR)</p> <p>10.35 BEYOND 2000</p> <p>11.33 MEDITATION WITH PASTOR WALO ARNI</p> <p>11.42 STATION CLOSE</p> <p><b>WEDNESDAY 7TH AUGUST, 1991</b></p> <p>6.00 TEST PATTERN AND MUSIC</p> <p>6.27 STATION OPEN</p> <p>6.30 ITN WORLD NEWS</p> <p>7.00 TODAY SHOW</p> <p>9.00 STATION CLOSE</p> <p>1.42 STATION RE-OPEN</p> <p>1.45 MIDDAY WITH RAY MARTIN (G)</p> <p>3.00 SESAME STREET (G)</p> <p>4.00 THE REAL GHOSTBUSTER (G)</p> <p>4.30 TEENAGE MUTANT NINJA TURTLES (G)</p> <p>5.00 THE FLINTSTONES (G)</p> <p>5.27 EMTV TOKSAVE</p> <p>5.30 HOME AND AWAY (G)</p> <p>6.00 NATIONAL EMTV NEWS</p> <p>6.30 A CURRENT AFFAIR</p>	<p>7.00 SALE OF THE CENTURY (G)</p> <p>7.27 EMTV NEWS UPDATE (G)</p> <p>7.30 NEIGHBOURS (G)</p> <p>8.00 SOCCER ROUND-UP (G)</p> <p>8.03 FAMILY &amp; FRIENDS</p> <p>8.30 INTERNATIONAL RUGBY SPECIAL (G)</p> <p>10.22 EMTV TOKSAVE (G)</p> <p>10.30 MEKIM MUSIK</p> <p>11.27 MEDITATION WITH PASTOR WALO ARNI</p> <p>11.30 STATION CLOSE</p>
---	--	--	--	--	--	--

G - General Exhibition  
PGR - Parental Guidance Required  
AO - Adults Only





# NATIONAL **BOOK** WEEK



5-9 OGAS

1991

KAINKAIN ASKIM  
KAINKAIN PIKSA NA POTO  
MUVI O PIKSA  
RESIS



SALIM TIKET  
STORI  
LAIP BEN  
KAIN KAIN PILAI

## NESENEL BUK WIK 5 - 9 OGAS



Nesenel Buk Wik em i de bilong selebretim ol buk na tu long ritim ol buk. Ol kain kain samting ol i redim pinis long kamap long olgeta hap bilong kantri. Noken lus tingting.

Wanem kain man o meri i ken gat buk olsem na mekim dispela yia i namba wan tru i winim ol narapela yia. Askim ol lokel skul o pablik laibreri long moa save.

**KAM NA AMAMASIM NESENEL BUK WIK LONG NESENEL LAIBRERI EM I TAIM BILONG STORI NA SOIM OL MUVI NA OL KAIN KAIN PIKSA**

Praim Minista Rabbie Namaliu bai opim dispela long Mande, 5 Ogas long 2 klok. Plis Ben, Gerehu Hai Skul, Jisas Senta Hapwe Haus na Bavaroiko Komyuniti Skul bai putim kamap ol kain kain pilai.  
Siaman bilong SP Gems Faundesen bai pasim selebren long In-Sevis Koles long Fraide, 9 Ogas long 2 klok.  
Sapos yu laik kisim moa save, ringim Nesenel Laibreri long Pon: 25 6200.

### WANEM SAMTING BAI KAMAP

Wanem samting bai yu mekim long wokim dispela buk wik i winim ol narapela bilong bipo?

Ol Pikinini  
Amamasim dispela de olsem taim bilong pilai Ritim wampela stori long ol wantok bilong yu Askim ol manmeri long ol ples long go long skul na stori

Ol papa na mama  
Stori long ol pikinini bilong yu long olgeta apinun Putim nem bilong pikinini bilong yu long wampela pablik laibreri

Baim buk na lus tingting long bai.

# WANTOK PABLIK NOTIS

NIUSPEPA BILONG OL PAPUA NIUGINI STRET

Sapos yu laik advertais, telepon 25 2500 na askim long

MIRI AIORI long Ext 203  
JOHNATHAN BOMIEPE long Ext 215  
KOSINTO FOSAGU long Ext 218

## OL SEKENHEN KLOS

### TUPELA KONTENA I PULAP TRU LONG OL NUPELA BEG SEKENHEN KLOS I STAP NAU

OL I KAM YET LONG APEX MELBON

# APEX TEXTILES PACIFIC

I REDI TASOL BILONG KISIM

# TELIPON: 21 1834



### THE 1991 ROYAL VISIT COMMITTEE

The General Public and Business Houses are reminded that it is an offence to publish the Government Logo of Papua New Guinea without written permission.

Please be informed that with regard to the visit of His Royal Highness The Duke of York in September of this year, the use of his Coat of Arms or the Crest of Papua New Guinea are expressly forbidden.

Any person or company using these crests or photographs of HRH The Duke of York on T-shirts, scarves, ties, mugs, sun visors, tea cloths, flags, hats or any other souvenir or any person who in any way causes these crests or His Royal Highness' photographs to be published in any way without the express permission of the Royal Visit Committee will be subject to prosecution.

Published on behalf of the Royal Visit Committee by the INDEPENDENT GROUP to whom all enquires should be addressed at P. O. Box 168, Port Moresby.

INDEPENDENT DESIGN

## Word Publishing

I go het wantaim PNG  
Ol Engliken, Katolik,  
Lutheran na Yunaitet  
sios i amamas long  
bung wantaim long  
wokim ol nius



### WANTOK

NIUSPEPA BILONG PAPUA NIUGINI STRET  
PNG's Tok Pisin newspaper

### THE TIMES

PNG's award winning newspaper

### BUSINESS

reporting on the business community

### SPORT

Weekend  
for complete sport coverage



Ol 2 milien memba bilong Engliken, Katolik, Lutheran na Yunaitet sios i amamas long stap olsem papa bilong dispela wok long kamapim ol nius

# All the league news

*when it happens!*

## every week in your Wantok & Times



# SOFBAL

## Ol nupela bos i ranim GASA nau



• Stail bilong ol meri Mosbi long 1989 sofbal gren fainal.

### GAZELLE SOFBAL:

TRIPLELA man husat i go pas long kamapim Gazelle Amatua Sofbal Asosiesen (GASA) i lusim pinis sia. Dispela em long wanpela vot i nogat bilip em i bin kamap long 16 Julai, 1991.

Ol memba husat i lusim sia em presiden Tamil Pua, na tupela komiti memba bilong em, Thomas ToBunbun Junior na Misis Molly Pouru.

GASA i gat 10-pela klap olgeta wantaim moa long 500 memba. Na em i namba tu sofbal asosiesen long kamap insait long Rabaul, Is Nu Briten provins.

Dispela vot i no gat bilip i bin kamap long jenerel kibung long 16 Julai, 1991. Vais presiden, Ereman Mete i go pas long dispela vot i nogat bilip.

Ereman i tok dispela senis i kamap bikos long sampela nupela developmen. Dispela em long kamap bilong 'Sulphur Creek Sports Promotions Incorporated'.

Ereman i tok ol olupela

eksekyutiv i no tingting long wok bilong GASA. Em i tok moa olsem ol i no tingim ol memba, na i yusim mani long kamapim ol arapela developmen.

Dispela tripela olupela eksekyutiv i stap insait long Bod ov Dairekta bilong Sulphur Sports Promotions Incorporated, wantaim wanpela bisnisman, na tupela arapela memba.

Bikpela as bilong holim vot i no gat bilip em GASA i bungim hevi bilong mani nau.

Ol nupela memba bilong GASA em presiden Paschalis Vuaina, vais presiden Ereman Mete, na seketeri Francis Rangatin. Tresera em ol bai i makim long bihain.

Tripela komiti memba em Misikaram Bakut, Francis Lukara, na Andreas Tata.

Ereman i tok moa olsem posisen bilong tresera em ol bai i makim wanpela man long narapela jenerel kibung em bai i kamap long dispela mun (Ogas, 1991).



• Kain sindaun em stail bilong ol meri Mosbi long taim bilong 1989 sofbal gren fainal.

## Bomana resis bungim fainal wantaim hevi

### BOMANA SOFBAL:

BOMANA op sisen sofbal resis bilong ol meri na pikinini meri bilong plisman ausait long Mosbi siti i bungim wanpela hevi gen nau. Planti meri i komplem nau long namba bilong tim husat bai i pilai insait long fainal.

Ol resis bilong dispela sisen i save kamap long Bomana Plis Koles. Na Andrew Moe i save go pas long ogenaisim dispela resis. Em i tok bihain long dispela sisen bai em i makim tingting sapos resis bilong narapela sisen bai i kamap long Bomana Plis Koles yet o long McGregor Bareks.

Ol opisal i makim olsem 5-pela tim bai i go insait long fainal. Tasol wanpela Bomana 1 pilai i komplem olsem 8-pela tim mas i

go insait long fainal. Em i komplem olsem las yia i gat 8-pela tim long resis. Olsem na 5-pela tim tasol i go insait long fainal. Tasol dispela sisen i gat 18 tim olgeta. Olsem na namba bilong ol tim i go insait long fainal mas goap i go long 8-pela.

Moe i sanap strong long tok orait bilong ol opisal olsem 5-pela tim tasol bai i go insait long fainal.

Meri ya i komplem moa olsem sapos Moe komiti i no oraitim 8-pela tim long fainal, orait ol fainai bai i no inap kamap long Bomana Plis Koles.

Tasol Moe i no tingting tumas long dispela toktok. Bikos em i no kisim wanpela leta i kam long Komanda husat i bosim Bomana Plis Koles, Mista Jeffrey Vaki.

Long ol gem bilong las wiken, McGregor 3 i nekim McGregor 2, 15-8, na Bomana 4 i bagarapim sindaun bilong Dok Yunit 17-7.

McGregor 3 i pilaim gutpela gem na banisim stret McGregor 2 long skoarim sampela ran long namba wan 4-pela ining. Na McGregor 3 i mekim planti gutpela ran long olgeta ining.

Long namba wan ining taim McGregor 3 i kisim bat, Caroline Toby i givim sisti na kamap long hom. Dispela i opim rot bilong ol yangpela McGregor 3 meri long skruim skoa.

Long namba tu ining, Madina Deganu na Michella Giru i mekim wanpela ran long hom bes. Na bringim McGregor 3 i go pas long skoa 3-0. Long namba 4 ining,

McGregor 3 i skruim skoa i go antap long 8-0.

McGregor 2 i pait strong na salim Anna Gawnd, Sari Miki na Elizabeth Mika i kamap hom. Dispela i bringim skoa i go long 8-3 we McGregor 3 i go pas yet.

Long namba 5 ining, ol yangpela blut bilong McGregor 3 i pilai strong yet. Na skoarim tripela moa ran. Dispela i pusim ol i go pas moa long skoa 11-3.

Long namba 6 ining, McGregor 2 i lukim olsem ol bai i lusim dispela gem nau. Ol i pilai strong liklik na skoarim tripela moa ran long bringim skoa i goap long 6. Fainal skoa em 15-8.

Ol gem bilong las wiken i bin kamap gut tru. Bikos namba wan gem bilong Sande em Mista

Andrew Rindfleish i kikim op. Mista Rindfleish em wanpela kampaia bilong Australia husat i stap nau long Mosbi. Em i bin karimaut wanpela tripela de ampaia kos. Na i redim ol ampaia bilong mipela long 1991 Saut Pasifik Gems.

Dispela wiken McGregor 1 bai i bungim McGregor 3. Wina bilong dispela gem bai i go wet long gren fainal. Gren fainal bai i kamap long 18 Ogas, 1991.

Narapela pilai bai i kamap namel long McGregor 2 na Bomana 4 long 30 minit i lusim 3 klok apinun (3.30pm).

Lusa bilong dispela gem bai i hangamapim su. Na wina bai i bungim lusa bilong McGregor 2 na Bomana 4 long narapela wiken.



# BENSON and HEDGES

# LFA SASIM JAURA

**Jaura soka klap i mas baim K1,300 fain olgeta. Tasol K300 em i mas baim pastaim bipo long dispela Fraide.**

**LAE:**

**YAKAM KELO i raitim**

JAURA Soka Klap long Lae bai i mas baim K1,300 o lusim pilai inap wanpela yia na 6 mun long brukim lo bilong Lae Futbol Asosiesen (LFA).

Tripela sinia eksekutiv bilong LFA, presiden, sekerteri na tresera i bin sindaun na toktok long wanem sas em LFA i mas givim. Ol i kamap wantaim tingting olsem Jaura klap i mas baim K1,300 long asosiesen.

Presiden bilong LFA, John Peka i tok Jaura i mas baim K300 pastaim bipo long dispela Fraide, sapos em i laik

pilai long dispela yia na pinisim propa sisen propa resis. Peka i tok narapela K1,000 em bilong joinim LFA gen long neks yia. Em i mas baim nominesen fi na resistresen fi bilong wanwan pilai bilong em tu wantaim.

Peka i tok Golo soka klap tu i kisim sas long baim K200 long dispela Fraide. Bikos ol sapota bilong Golo i bin stap tu insait long dispela trabel.

Tupela wik i go pinis ol, Jaura na Golo pilai wantaim ol sapota i bin paitim wanpela referi husat i lukautim gem bilong tupela. Long dispela hevi na, ol referi i lusim gem na wet long LFA i givim sas long tupela klap ya pas-

taim.

Peka i tok ol i mas traim yet long larim gem bilong LFA i go na pinis long mun Oktoba. Dispela hevi i bin givim hat taim long olgeta divisen insait long LFA. Olsem na Peka i tok sori i go long olgeta klap long dispela hevi.

Em i tok ol referi i man olsem yumi. Na ol i givim taim na sevis bilong ol long lukautim gem na kirapim gem insait long provins. Ol i mas kisim gutpela sapot na pilai long kirapim nem bilong soka.


Peka i tok bai i nogat resis bilong LFA Kap bikos long dispela hevi. Olsem na ol bai

i go het tasol wantaim sisen resis. Sapos LFA i ting i gat inap taim bihain long dispela resis, bai em yet i ken makim wanpela taim long holim LFA Kap resis.

LFA i bin lusim pinis wanpela pilai bilong Jaura long las yia. Pilai ya em James Kiwai. Na em bai i no inap long pilai soka moa long laip bilong em. Tasol long dispela yia klap bilong em i apil long dispela hevi olsem na komiti bilong LFA bai i skelim dispela hevi bilong pilai ya gen.

LFA i lukluk long pinisim olgeta raun bilong sisen propa resis long namba tu wik bilong mun Oktoba.

## Nesenel tim bai bung gen sapos ...



**YAKAM KELO i raitim**

NESENEL soka tim bai i holim namba tri trening kem long Lae sapos em i kisim tupela wik tasol.

Nesenel kosa John Peka i tok em i askim long tripela wik trening kem long PNGFA i orait long en. Tasol em i no kisim bekim bilong PNGFA yet long dispela.

Peka i tok em i harim olsem PNGFA i laik daunim namba bilong trening kem i go daun long tupela wik tasol. Olsem na Peka i tok sapos dispela i kamap tru, bai tupela kem ya i stap tasol long Lae.

Long bihainim plen, tupela wik bai nesenel tim i holim kem long Goroka, na wanpela wik long Lae na i go insait long Saut Pasifik Gem long Septemba. Tasol Peka i tok sapos PNGFA i givim tupela wik, bai skwat i stap

tasol long Lae inap taim bilong gem.

Seketeri bilong PNGFA, Idris Kumbuwah i tok PNGFA bai i gat hevi long kisim ol pilai i kam long kem. Em i tok bai i gat hevi long kisim ol pilai long ol wok bilong ol i kam, na stap longpela taim long kem.

Kumbuwah i tok sapos ol i mekim ol dispela samting insait long 5-pela wik bai i hat tru. Tupela wik pastaim long ol wan wan pilai i kam na tripela wik long kem. Dispela bai i givim bikpela hetpen tumas long PNGFA.



• Mosbi-Newman Peter bilong Yuni i autim stail egensim Guria.



Guria tim husat i bin autim Yuni long las wiken. Ol bai i bungim Kurti Andra nau.

**Enga Soka Asosiesen Poin Tebol 29/07/91**

**Snia Man**

Team	Play	Win	Draw	Lost	For	Ag	Goal Diff	Points
Moku	14	10	2	2	36	12	24	22
Teachcom	14	8	2	4	28	9	9	18
Tarakum	13	8	2	3	23	15	8	18
Buresong	13	6	3	4	23	13	10	15
United	14	5	5	4	21	18	3	15
Enga Blues	14	5	4	6	28	31	-3	13
Amagani	14	4	3	6	25	26	-1	12
Enga Royals	14	3	1	8	24	30	-6	9
Elcom	14	4	3	9	14	24	-10	9
TN Club	13	1	9	10	28	-19	-19	5

\* One game to be replayed  
Sorry games under dispute  
Note\* Points deducted for player not cleared

**Junia Man- Final Table**

Buresong	12	8	4	0	23	8	15	20
Amagani	12	5	5	2	15	9	6	15
Teachcom	12	6	2	4	14	8	6	14
Tarakum	12	4	4	4	16	16	0	12
Moku	12	4	3	5	12	13	-1	11
Kumuls	12	4	2	6	13	14	-1	10
Tn Club	12	0	4	8	5	24	-19	4

**Wimen**

Teachcom	15	10	4	1	37	8	29	24
Amagani	15	9	4	2	28	10	18	22
Yab East	15	7	6	2	27	11	16	20
Moku	15	8	4	3	17	9	9	20
Kumuls	15	6	4	5	22	13	9	16
United	15	6	4	5	13	17	-4	16
Tapi	15	4	4	7	13	21	-9	12
Buresong	15	2	6	7	9	29	-20	10
Tarakum	15	2	1	12	9	23	-14	5
TNClub	15	1	3	11	5	38	-33	5

**Sarere Ogas 3rd, 1991**

Taim	Div	Fil	Pilai
12:30pm	Wom	G1	Teachcom vs Tarakum
2:30pm	Wom	G1	Amagani vs Kumuls
4:30pm			
12:30pm	Wom	G2	Moku vs Tapi
2:30pm	Seniors	G2	Teachcom vs Tarakum
4:30pm	Seniors	G2	Amagani vs Enga Royals
<b>Sunde Ogas 4rd, 1991</b>			
12:30pm	Wom	G1	T.N. Club vs Buresong
2:30pm	Seniors	G1	T.N. Club vs United
4:30pm	Seniors	G1	Moku vs Enga Blues
12:30pm	Wom	G2	United vs Yab East
2:30pm	Seniors	G2	Elcom vs Buresong
BYE: TN Club			

**Ol Soka bilong las wiken:**

Ol resis bilong ol Junia man:  
Amagani del Moku 1-0  
Buresong del Teachcom 1-0  
Tarakum na Kumuls dro 0-0

Resis bilong ol sinia man:  
Moku del Enga Royals 5-3  
Buresong del Amagani 2-1  
Tarakum del T.N. Club 3-0 (by forfeit)  
Enga Blues del Elcom 5-3  
United na Teachcom dro 2-2

Resis bilong ol meri:  
Amagani na Moku dro 1-1  
Teachcom del Buresong 3-0 (by forfeit)  
Yab East del Tapi 3-0 (by forfeit)  
Kumuls del TN Club 3-0 (by forfeit)  
United del Tarakum 3-0 (by forfeit)



**B&H**

**BENSON and HEDGES**

**B&H**

# Mosbi Anda 16 tim i winim ol arapela senta

ATING planti manmeri na pilaia husat i bin helpim kamapim ol wok bilong Nesenel Anda 16 tonamen long Wabeg i wet long lukim ol stori long *Wantok Nius-pepa* na *Weekend Sports*. Tasol mipela olgeta i popaia, na i no lukim tru wanem samting i kamap antap long 'Awi Kantri'.

Olsem na mi yet laik putim liklik stori long lukluk bilong mi long wan wan tim i bin kamap long tonamen.

**Enga:**

Asples Enga yet i winim prais bilong 'nambawan pilaia bilong tonamen'. Dispela i min olsem wangepela pilaia bilong ol i kik gut tru long tonamen.

Dispela pilaia em yangpela John. Dispela pilaia i save pilai long fulbek na save ran i kam antap long midfil sampela taim. O sapos franlain i sotwin, em i

save go antap long traim soim pawa bilong skoarim gol. Olsem na em i winim dispela prais.

Ol i no laki tumas na Hagen i winim ol long las gem. Olsem na ol i sut i go daun tru daunbilo long lata.

**Hagen:**

Hagen i winim namba tu ples long dispela tonamen. Narapela prais em i winim tu em 'nambawan tim bilong tonamen'. Dispela i min olsem Hagen i kik tru olsem tim. Na ai bilong ol oge-naisa na bikman bilong tonamen i laikim tru Hagen. Olsem na dispela prais i go long Hagen.

Yes, em i tru olsem Hagen tim i kik gut tru. Long stat bilong tonamen i kam inap long las gem, ol i givim wankain strong.

Tim bilong ol tu i gat strong long beklain. Ol i gat gutpela swipa tru. Long midfil em i gat ol gut-



pela pilaia tu husat i setim ol straika gut.

pawa bilong ol straika tu i strong. Olsem na ol i winim Enga long las gem. Hagen i wok long tingim nau, watpo em i no winim namba wan ples.

**Goroka:**

Ol Goroka i stat strong tru. Long namel ol i slek liklik. Las tru, ol i traim long kik strong gen. Sapos ol i bin soim wankain strong stat long namba wan gem i go long las gem, ol inap stat antap long poin lata.

**Morobe Kantri:**

Ol lain Kunai i wok long tingting

strong tru nau long namba wan o namba tu ples. Kosa bilong ol yet i ken wok strong, na stiaim ol dispela yangpela long narapela tonamen. Ol i gat sampela gutpela yangpela pilaia olsem liklik midfilda bilong ol.

**Madang:**

Madang i kik wankain tasol olsem Goroka. Em i kik strong long stat na i slek liklik long namel. Na i laik strong liklik gen long las gem. Long gem we ol i lus, mi lukim olsem ol pilaia i no bihainim plen bilong kosa. Ol i kik long laik na tingting bilong ol yet. Ol yangpela pilaia i gat 'attitude problem'.

**Lae:**

Mi sori tru long Lae kosa. Mi save olsem em i traim hat long stiaim ol pilaia. Tasol olgeta samting i rong tru. Na ol i kamap las long resis.

**Mosbi:**

Mosbi i stat wantaim dro na lus. Dispela tupela samting i stap insait long tingting bilong ol pilaia. Olsem na ol i kisim dispela dro na lus.

Long taim tingting bilong ol pilaia i stap long win tasol, kosa bilong ol i sanap arere na amamas long ol boi Mosbi. Dispela tim i 'technically superior' long olgeta arapela tim long tonamen.


Ol i bihainim plen bilong kosa. Planti tim i kamap long tonamen i mas aigris long kain kik bilong Mosbi.

**Ol kosa:**

Bikpela tok tenkyu long ol kosa i stiaim ol pilaia long kamapim gutpela pilai long tonamen. Na tok amamas i go long lain bilong Peter Mommers long Enga, na lain bilong Kemai Sau long Hagen long gutpela tonamen tru.



• Tarangau soka tim bilong Kerevat Distrik Soka Asosiesen.



## Wabeg lukautim gut Anda 16 tonamen

**HELEN TARAWA i raitim**

NAMBA WAN taim, Wabeg i lukautim Nesenel Anda 16 soka sempionsip na i kamap gut tru. Dispela sempionsip i bin kamap long namba 20 de bilong mun Julai, 1991 i go inap long namba 23 de. Wabeg em biktaun bilong Enga provins.

Primia bilong Enga provins, Danley Tindiwi i tokaut olsem em i amamas tru long lukim dispela gutpela bikpela junia sempionsip i kamap long Wabeg. Na dispela i soim olsem Wabeg i ken lukautim ol arapela bikpela gem long bihain taim. Dispela sempionsip i bin kamap gut tru. Na nogat trabel o hevi i bin kamap

long bagarapim.

Provinsal seketeri Luke Kembol i tok ol i amamas long gutpela gem i bin kamap. Olsem na Dipatmen bilong Enga bai i go het long givim sapot long kirapim gem olsem soka insait long provins.

Em i tok Wabeg em i wangepela liklik taun. Tasol em i soim pinis olsem em i ken lukautim ol bikpela gem olsem sampela biknem senta i save lukautim.

Stail bilong soka long Enga i wok long goap nau. Dispela i bin kamap ples klia long dispela sempionsip. Ol yangpela bilong Enga i pilaim strongpela gem tru egensim ol arapela senta. Tasol ol i abras tasol long

i go moa long pes 23

### MOSBI LATA

MOSBI SOKA ASOSIESEN LATA

WIK 21 Premier Division Ladder								Premier Reserve Ladder							
Division	Played	Win	Draw	Lose	For	Against	Points	Division	Played	Win	Draw	Lose	For	Against	Points
University	21	14	4	3	58	22	46	Golo	21	14	6	1	43	20	48
G.F.C.	21	10	10	1	13	15	40	University	21	12	7	2	37	19	43
Rapatona	21	9	9	3	33	20	36	Mobil Sobou	21	10	8	3	32	24	38
Amalpak M. U	21	10	5	6	37	36	35	Westpac	21	11	5	4	29	15	38
Mobil Sobou	21	9	6	6	41	32	33	Kurti Andra	21	10	5	6	32	28	35
Guria	21	9	5	7	33	31	32	B. Kumuls	21	8	6	7	22	20	30
Golo	21	9	3	9	40	33	30	GFC	20	6	7	7	27	35	25
Kurti-Andra	21	6	7	8	30	33	25	Amalpak M. U	20	6	6	8	22	22	24
Westpac	21	5	9	7	28	29	24	Guria	20	7	2	11	25	29	23
B. Kumuls	21	5	3	13	22	44	18	Verave	19	2	4	13	17	31	10
Verave	21	4	1	16	32	48	13	T. Defence	20	1	2	17	16	48	5
T. Defence	21	2	6	13	38	49	12	Womens Division Ladder							
1st Division Ladder								Wanzesi	21	17	3	1	52	7	54
Koupa	20	15	4	1	43	16	49	Guria	21	16	3	3	88	12	51
B.F.C.	20	11	5	4	35	22	38	Mobil Sobou	21	14	3	4	59	11	45
Bao-Mitas	20	11	3	6	40	25	36	University	21	14	3	4	53	15	45
Air Niugini	20	10	6	4	31	23	36	Amalpak M. U.I	21	12	7	2	65	12	43
Kula	21	10	5	6	33	27	35	G.F.C.	21	9	3	9	24	27	30
STC	20	6	6	8	30	34	24	Kurti-Andra	21	7	3	11	24	39	24
Tarangau	21	5	4	12	24	40	19	Milne Bay	21	7	2	12	25	36	23
Naii	20	4	7	9	16	26	19	Kula	21	6	5	10	19	36	23
Wanzesi	21	5	3	13	28	38	18	B. Kumuls	21	3	2	16	17	58	11
Buresong	20	4	6	10	25	38	18	Koupa	20	2	2	16	12	66	8
Milne Bay	20	4	4	12	24	40	16	T. Defence	20	2	2	16	12	66	8
2nd Division Ladder								Suspended: Womens - Koupa							
Amazon Bay	26	18	3	5	66	32	57	Under 19 Division Ladder							
Korion	25	17	3	5	52	20	54	Rapatona	21	14	5	2	76	22	49
Maniota	26	15	7	4	48	33	52	Mobil Sobou	20	13	3	4	43	21	42
Wanzesi	25	15	6	4	74	19	51	B/Kumuls	21	12	3	6	34	21	39
Losegu	23	14	9	-	33	14	51	Kurti-Andra	21	12	1	8	35	20	37
Mt Obree	24	15	2	7	49	36	47	Verave	21	9	8	4	29	14	35
Bao-Mitas	26	13	7	6	40	33	46	Westpac	21	10	2	9	30	31	32
Gala United	25	10	3	12	38	40	33	Bao-Mitas	19	8	5	6	22	21	29
Oruka	23	9	5	10	29	34	32	GFC	20	8	3	9	32	28	27
Mana	25	9	3	13	26	40	30	Guria	21	6	7	8	24	32	27
Elcom	23	4	8	11	24	39	20	T. Defence	19	7	3	9	28	41	24
Cloudy Bay	23	4	6	13	29	45	18	University	19	5	6	8	27	30	21
Tarangau	22	5	2	15	17	36	17	Golo	19	4	4	11	19	50	16
Buresong	24	4	5	15	22	51	16	Buresong	21	4	4	13	21	41	16
								Amalpak	18	2	3	13	18	38	9

# Somare Sil resis i bungim hevi

## WEWAK:

BIKPELA Somare Sil tonamen long Wewak, Is Sepik provins i no pinis gut yet.

Olgeta kik i pinis tasol hevi i stap long fainal. Na tupela tim husat i winim sans long kik long gren fainal em Maprik Red na Wewak Yunaitet.

Las wik Wewak Yunaitet i laikim olsem ol i mas kik long gren fainal long Sande. Tasol Maprik Red i laikim olsem ol i mas kik long Sarere. Tupela tim wantaim i gat sampela kain as long dispela.

Long Sarere Maprik red i pulapim tripela bikpela trak i go daun long Wewak taun, na i fofitim Wewak Yunaitet. Orait long Sande Wewak Yunaitet i ran i go insait long fil na fofitim Maprik Red.

Ol memba bilong komiti husat i go pas long ogenaising dispela tonamen i laik kibung long dispela wik, na stretim dispela hevi. Tasol ripot i tok nogat wanpela kibung i kamap yet.

Bikos tupela memba husat i go pas ong tonamen ogenaising komiti i stap nau long Goroka. Nem bilong tupela em presiden Clement Paime na provinsal spot kodineta, Terence Moka. Ating komiti bai i wetim tupela opisal ya long kamap pastaim.

Long resis bilong winim nama tri ples em Wewak Oldies bai i bungim Gawi. Tupela tim ya i no laik kik tu. Bikos tupela i komplem olsem tupela i pilai aninit long wanpela sponsa tasol.

Olsem na tupela i laik brukim prais mani bilong namba tri na 4 ples.



• Mosbi- Robert bilong Morobe Yunaitet i pait long bal egensim Golo pilaia. Tasol Golo i strong na i win 3-2.

# Goroka laik redi long 1992 taitel

GOROKA Soka Asosiesen (GSA) i laik redim gut tim bilong em long pilai insait long 1992 Nesanel sempionsip.

Presiden bilong GSA, Peter Siba i tok soka long Goroka i wok long go gut na gutpela stail i wok long kamap. Siba i tok pastaim i save gat ol hevi long taim bilong gem. Tasol dispela ya i kamapim gutpela senis tru long pasin bilong ol pilaia na sapota long gem.

Long neks yia bai Goroka i makim ol Hailans rijon long pilai insait long Nesanel Taitel bilong ol sinia man. Olsem na gem bilong Goroka long neks yia bai i mas wankain yet long dispela yia long redim tim long sempionsip.

Siba i tok primia divisen i gat tupela gem tasol long pilai long pinisim raun bilong sisen propa resis.

Em i tok olgeta raun bilong soka bai i pinis long taim sisen bilong sofbal i laik kamap. Na GSA bai traim long stretim em yet long mekim ol samting i go orait long pinisim dispela sisen gut.

Em i tok long las yia no gat prais i go long ol tim na klap long pinis bilong sisen. Bikos GSA i no gat mani long mekim dispela. Tasol long dispela yia, GSA bai traim long givim prais long ol klap husat i win long sisen, na tu long GSA Kap. Em i

tok liklik o bikpela prais em inap tasol.

GSA bai i traim tu long painim liklik mani long baim K500 fi bilong em long Nesanel Spoting Institut (NSI). Fainal mak GSA i save baim NSI em K2,000 tasol GSA i baim tasol K1,500 na K500 i no yet.

## MOSBI SOKA ASOSIESEN

### DRO WIK 11

#### Sarere 4th Ogas, 1991.

Taim	Divisen	Graun	Pilai	
9.00	Res	B1	Golo	vs Westpac
10.30	U19	B1	Bao-Mitas	vs Sobou
12.20	2nd	B1	Gala United	vs Amazon Bay
2.00	1st	B1	BFC	vs STC
4.00	1st	B1	Kula	vs Wanzesi
9.00	2nd	B2	Mt Obree	vs Losegu
10.30	Wom	B2	University	vs Kurti-Andra
12.20	1st	B2	Koupa	vs Naili
2.00	Pre	B2	Sobou	vs Verave
4.00	Pre	B2	Golo	vs Westpac
9.00	2nd	G.F.C.	Mana	vs Buresong
10.30	2nd	G.F.C.	Tarangau	vs Elcom
12.00	2nd	G.F.C.	Wanzesi	vs Milne Bay
1.30	Wom	G.F.C.	Maniota	vs BFC
3.00	Res	G.F.C.	Oruka	vs Wanzesi
4.30	2nd	G.F.C.	Cloudy Bay	vs Korion
12.00	U19	Defence	Kurti-Andra	vs GFC
1.30	2nd	Defence	Bao-Mitas	vs Bulem
3.00	U/19	Defence	Verave	vs Golo
4.30	Wom	Defence	Defence	vs Gura

Bye: 1st Tarangau  
Res University and B. Kumuls  
Wom B. Kumuls

Second Division will double up games this weekend.

#### Sande 5th Ogas 1991.

Taim	Divisen	Graun	Pilai	
9.00	Res	B1	Guria	vs Kurti-Andra
10.30	2nd	B1	Maniota	vs Losegu
12.20	ist	B1	Bao-Mitas	vs Buresong
2.00	Prem	B1	T. Defence	v B/Kumuls
4.00	Prem	B1	Amalpak M. U	v GFC
9.00	2nd	B2	Buresong	vs Korion
10.30	Wom	B2	Sobou	vs GFC
12.20	1st	B2	Milne Bay	vs Air Niugini
2.00	Prem	B2	Guria	v Kurti-Andra
4.00	Prem	B2	University	vs Rapatona
9.00	2nd	G.F.C.	Wanzesi	vs Elcom
10.30	2nd	G.F.C.	Oruka	vs Losegu
12.00	2nd	G.F.C.	Bao-Mitas	vs BFC
1.30	2nd	G.F.C.	Amazon Bay	vs Clouby Bay
3.00	Res	G.F.C.	Amalpak M.U	vs GFC
4.00	Res	G.F.C.	Sobou	vs Verave
9.00	U19	Defence	Amalpak M. U	vs University
10.30	U19	Defence	Defence	vs Guria
12.00	Wom	Defence	Amalpak M. U	vs Kula
1.30	U19	Defence	B. Kumuls	vs Rapatona
3.00	U19	Defence	Buresong	vs Westpac
4.30	2nd	Defence	Mt Obree	vs Gala United

#### MID WEEK DRAW

#### U19 DIVISION WEEK.

#### Tuesday 6th August, 1991

4.30	U19	B1	University	v Sobou
4.30	U19	B2	Amalpak M. U	v Westpac

#### Wednesday 7th August, 1991

4.30	U19	B1	Buresong	v Rapatona
4.30	U19	B2	Kurti-Andra	v T. Defence

#### Thursday 8th August, 1991

4.30	U19	B1	B. Kumuls	v Golo
------	-----	----	-----------	--------

## Wabeg lukautim gut Anda 16 tonamen

i kam long pes 22 skoarim ol gol.

Presiden bilong Enga Soka Asosiesen, Larson Kibsan i bin mekim gutpela wok tru long lukautim dispela tonamen. Larson i kisim ples bilong Peter Mommers. Bikos Mommers i kamap presiden bilong PNGFA, bihain long vot i nogat bilip.

Ripot i tok dispela em i namba wan taim bilong Larson long kamap presiden bilong soka asosiesen. Tasol em i go pas na i lukautim gut dispela tonamen.


Olgeta spot insaitlong Enga i kam aninit long wanpela bodi, Enga Spot Federesen. Olsem na long wiken

bilong sempionsip, federesen i stapim olgeta arapela gem. Na olgeta manmeri i kamap long lukim soka tasol.

Sekyuriti tu i bin nambawan stret. Ol plisman i lukautim gem, na nogat trabel i bin kamap. Planti manmeri long Enga wantaim sampela Hailans rijon i kamap long lukim dispela tonamen.

Sampela bikman i kamap tu long lukim dispela tonamen.


I gat 12-pela referi i bin kamap long lukautim gem.



• Mosbi-Joe Turia bilong Yuni i kisim bai na yangpela stralka bilong Guria, Geno Venao i sambai long baksait. Guria i win 1-0.



# GURIA BAI NEKIM KURTI ANDRA



• Mosbi soka resis-Terence Soweni (raithan) bilong Guria i givim sisti na i laik kisim bal long Yuni pilaia. Guria i winim Yuni 1-0 long las wiken. I gat bikipela bilip olsem Guria bai i autim Kurti Andra long dispela wiken.

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.



• Simon Emmanuel

GURIA i mas pilaim wankain gem olsem las wiken bai em i ken autim Kurti Andra. Nem Mosbi nesenel tim bai i bungim Kurti Andra long wanpela gutpela primia divisen gem bilong Mosbi soka resis long Sande 4 Ogas, 1991.

Las wiken Guria i taitim olgeta banis bilong em long stapim Mosbi soka lida, Yuni- vesiti na i win 1-0. Dis- pela em gutpela dinau stret Guria i givim long ol Yuni studen bilong kosa pilaia, Joe Turia.


Dispela wiken Guria i mas tingting gut long Kurti Andra. Bikos ol sol bilong Manus Ailan i no save sruk long wanem kain tim ol i bung.

Guria i gat inap eksperiens wantaim ol nem pilaia olsem Adam Lema na Charlie Api long beklain, wantaim ke p t e n S i m o n Emmanuel, Eli Mali, Linus Kensak na Eric Petrus long fran lain.

Ol bai i kisim sapot



• Linus Kensap



• Eli Mali



• Eric Petrus



• Adam Lema

## MOSBI

long ol arapela pilaia olsem Vosap Eremas, Sais Mathew, Willie Enosi, Terence Soweni na yangpela straika, Geno. Geno bai i poro- manim smok balus Kensak long skoarim ol gol.

Guria i gat liklik sans long winim wanpela spes long go insait long fainal. Win bilong las wiken i apim nau tingting bilong Guria. Olsem na bikipela bilip i stap olsem Guria bai i nekim Kurti Andra.

Kompetisen lida Yuni- vesiti bai i strong long

autim tiket bilong Rap- atona. Bikos em bai i no inap long lusim dis- pela gem olsem las wiken.

Kosa pilaia Joe Turia bai i lukautim beklain. Long fran lain em tupela straika, Steven Mune na Noel Vari bai i lukautim. Beklain bilong Rapatona i mas sambai long tupela kas ya.

Tasol Rapatona i no inap long givim isi dis- pela gem i go long Yunivesiti. Bikos em tu i tingting long kik i go insait long fainal.

# Mimlon bai i bekim dinau long Momase

## MADANG

MOMASE bai i bungim Mimlon dispela wiken long soim tru olsem husat bai i go antap na wetim fainal bilong Madang soka resis.

Mimlon na Momase i go pas nau long primia divisen soka resis bilong Madang Soka Asosiesen. Dispela wiken, pilai graun bai i paia stret taim tupela lida yet i bung.

Long maina primia fainal, Momase i bin autim tiket bilong Mimlon. Sapos Mimlon i tingim dispela dinau na i laik bekim, ating Momase i mas tingting gut.

Presiden bilong Madang Soka Asosiesen, Peter Angasa i tok ol primia divisen i pinisim namba tu raun bilong resis pinis. Na olgeta tim i redi long fainal nau.

Namba wan divisen wantaim anda 19, na resis bilong ol meri tasol i wok long pilaim sampela gem yet.

Angasa i tok Madang Soka Asosiesen i wok long pilaim nau sampela gem em i no pinis yet. Ol dis- pela wos aut gem i save kamap long namel bilong wik.

Asosiesen i laik pinisim olgeta gem hariap bipo long bikipela 1991 Saut Pasifik Gems. Gems bai i

kamap long namba 7 de i go inap long namba 21 de bilong mun Septemba, 1991.

Em i tok sapos olgeta samting i ran stret bihain- im plen bai Madang soka Asosiesen i pinisim sisen propa resis bilong em long namba wan o namba tu wik bilong mun Septemba.

Kosa

Long ol arapela samting em Madang Soka Asosiesen i makim gen tupela olpela kosa bilong las yia long lukautim Madang tim long Momase Rijonal tonamen. Nem bilong dispela tupela kosa em Jonannes Grengo na Norman Kunewai.

Dispela tonamen bai i kamap bihain long Gems long Oktoba, 1991. Na Wewak Soka Asosiesen i kisim yesa pinis long lukautim dispela bikipela rijonal tonamen long Wewak taun.

Angasa i tok Madang Soka Asosiesen i makim tupela gen bikos long kaikai bilong wok tupela i soim pinis. Dispela em long kosim gut Madang tim i go autim 1990 PNGFA Kap taitel long Mosbi.

Madang skwat bai i gat 18 pilaia olgeta. Nau yet asosiesen i makim tim pinis. Tasol Angasa i no laik givim nem bilong ol. Bikos trening i no stat yet.

### INSAIT

KIKBEK  
WANTAIM PISE  
- PES 22

• LFA sasim Jaura soka klap ..... p21

• Enga soka lata & dro ..... p21

• Nesenel tim bai bung gen sapos ..p21

• Somare Sil resis bungim hevi ..... p23


• Goroka redi long 1992 taitel ..... p23

**B&H**

**BENSON**  
*and*  
**HEDGES**

**B&H**





## Wormald Security i papa tu long stail ka

### KAIRU LAHO i raitim

NO KEN kalap nogut sapos yu lukim wanpela kain stail ka i gat tripela wil tasol (Tuktuk) i ron long ol rot bilong Mosbi.

Tuktuk em narapela bilong ol ka i helpim nau wok bilong ol lain bilong Wormald Security.

Wormald Security i bin baim dispela stail ka bilong ol tupela mun i go pinis. Na em i bung nau wantaim olgeta arapela ka em ol sekyuriti i save yusim long wok bilong ol.

Ol i wok long yusim nau long kisim na bringim ol sekyuriti man, tasol ol i no save mekim olsem long grup. Ol i save yusim Tuktuk long mekim ol wok we i no strong tumas na tu long taim ol imejensi wok nabaut i kamap.

"Mipela i bin tingting planti long wanem kain wok em Tuk-

tuk inap mekim. Tasol nau mipela i painim olsem em i gutpela na inap tru long wok. Mipela i lukim dispela stail ka olsem wanpela bilong kampani long yusim na i no bilong kisim ples bilong ol arapela," wanpela mausman bilong kampani i tok.

Tuktuk inap long karim 6-pela man na inap ron long spit bilong 60 kilomita long wanpela aua.

Kampani i tokim tu ol sampela draiva bilong en long traिम dispela ka.

Wormald i putim tu sampela senis bilong em yet. Sampela bilong ol dispela senis em long putim banis waia na dua bilong banisim draiva. Nogut bai draiva i sutnus i kam ausait.

Na Wormald i amamas long dispela ka na bai yusim yet.



• Tuktuk em nem bilong dispela nupela kain stail ka nau i stap long Mosbi. Na Wormald Security kampani tu i baim wanpela. Sapos ol bos i amamas long Tuktuk, ol sekyuriti bilong kampani bai raun na wok tu long dispela ka. Poto. Misako Elemiah.

## Ol rot projek bai kosim samting olsem K648 m

KOS bilong ol nupela nesanel rot em ol i laik wokim long Papua Niugini bai kos samting olsem K684.1 milien namel long yia 1990 na 2000.

Planti bilong ol dispela projek i bin stat long dispela yia. Na kos bilong ol dispela projek we i stat pinis i stap long mak bilong K102 milien. Long taim namba wan tripela yia bilong projek i pinis long 1993, mak bilong rot em kolta bai karamapim bai muv long 1320.4 kilomita i go antap long 1647 kilomita.

Ol i brukim nupela nesanel rot progrem i go insait long 4-pela hap. Na dispela i makim 4-pela rijon bilong kantri.

Ol rot projek bilong Sauten rijon bai kos samting olsem K253.6 milien. Na dispela winim tru mak bilong ol arapela tripela rijon. Dispela i no karamapim Nesanel Kapitel Distrik husat i save yusim samting olsem K23.1 milien long wanpela yia bilong wokim ol rot.

Ol rot bilong Momase rijon bai kos samting olsem K237.3 milien, Hailans rijon K95.9 milien na Niugini Ailan rijon em K177.3 milien.

Sauten rijon (i no karamapim NCD) bai kisim bikpela mani

bilong baset long ol rot long ol yia i kam bihain long bikpela as.

Sapos yu lukluk nau long mep, yu bai lukim olsem i no gat rot i bungim Nesanel Kapitel Distrik wantaim Oro, Milen Be, Galp na Westen provins. Sauten rijon i gat bikpela wok bilong stretim na wokim ol dispela nesanel haiwe hariap. Na dispela i mas pinis long yia 2000.

Namel long ol dispela rot em wok bilong pinisim bikpela Trans-Ailan Haiwe namel long Mosbi na Lae. I gat tingting tu bilong pinisim wanpela rot namel long Erave insait long Sauten Hailans provins na Kikori long Galp provins. Dispela rot bai bihainim hap em ol paip bilong Kutubu wel i ron long en. Ol bai stretim na wokim gut rot em paip plain i ron long en olsem bai ol pipel na ka i ken yusim tu.

Bihain long Sauten rijon em Momase rijon husat i kisim mani we i bikpela liklik long nesanel rot projek baset. Olgeta mani bilong Momase rijon bai i go long wok bilong stretim olgeta rot nau i stap. Na tu long pinisim rot long Aitape i go olsem lonh Vanimo

i go moa long pes 6

Safety and sports shoes

Car care products

Industrial clothing

Air, oil and petrol filters

Pool care products

Metal wheel rims

Tyres

Industrial hose

Pools

Davey household pumps

Batteries

Dunlop is a lot more than just tyres. Besides our world renowned tyres, we carry the latest in industrial hose, batteries for all situations; industrial clothing and a complete range of footwear. Our pools, pumps, chlorine and general pool supplies are the best available, as are our performance mag wheels; air, oil and fuel filters, a full range of car care products and the very latest in selected sports gear.

We're Dunlop, the company in PNG with a lot more to offer you.

Port Moresby Tel: 25 5444  
 Koki Tel: 21 7697  
 Rabaul Tel: 92 2828  
 Lae Tel: 42 1322  
 MT. Hagen Tel: 52 2966, 52 2987

**DUNLOP**  
 More Than Just Tyres

# PMV draiva na kru i mas gat yunifom

SEKETERI bilong Trensport na suprintenden bilong Moto Trefik, Brian Amini i askim pinis olgeta papa bilong ol PMV long baim yunifom bilong ol bas draiva na kru bilong ol.

Nupela stail yunifom bilong ol PMV draiva na kru em blupela sotpela han siot. Dispela samting i mas kamap pastaim long 1991 Saut Pasifik Gems em bai kamap long mun Septemba long dispela yia. Olgeta pilai bai kamap long Mosbi na Lae.

Ol papa bilong ol PMV i mas

baim dispela ol yunifom taim ol i laik aplai long kisim laisens bilong larim ol ka bilong ol i stap long haia. Dispela i min olsem ol wan wan spot grup inap baim bas bilong grup bilong ol yet long yusim.

Amini i bin mekim dispela bihainim askim bilong Len na Trensport bod long wanpela kibung bilong ol long dispela yia. Na long mun Epril bilong dispela yia, Amini i bin salim pas i go long olgeta papa bilong ol PMV. Tasol long dispela taim i kam inap nau, no

gat wanpela bekim o meknais i bin kamap bihainim dispela askim bilong bod.

Em i tok sapos ol papa bilong ol PMV i no mekim wanpela samting, dipatmen bai rausim laisens bilong ol PMV long wok inap long wanpela mun olgeta.

Moa long 88 papa bilong ol PMV long Mosbi i bin stap insait long kibung. Na bihain tasol long dispela kibung, ol i bin holim wanpela liklik kos wantaim namba wan seketeri bilong Len Trensport bod, Ken

Brewster.

Amini i tokaut tu olsem planti papa bilong ol PMV i bin amamas long tingting bilong dipatmen. Na ol i bin askim tasol dipatmen long givim ol sampela moa taim bilong baim ol yunifom na stretim ol arapela liklik hevi pastaim.

Brewster i bin askim tu olgeta papa bilong ol PMV long wok i go inap long apinun long taim bilong ol bikpela pilai long mun Septemba. Na wanem ol PMV i laik wok i go long apinun na nait i mas kisim nara-



• Brian Amini

pela tok orait pepa long hetkwata bilong Len na Trensport bod long Konedobu. Dispela i mas kamap pastaim long namba wan de bilong ol pilai.


## Tok lukaut long ol teksu

NAU yet Nesanel Kapital Distrik Komisn (NCDC) bai lukluk long ol Teksu ka we i no gat gutpela mita bokis.

Komisn i tok sapos em i painim wanpela teksu i no gat dispela kain mita, bai em i rausim laisens i go inap papa teksu i putim gen gutpela nupela mita bilong mekim gut wok.


Nau yet Len na Trensport Bod i askim Seketeri bilong Trensport na Suprintenden bilong Moto trefik, Brian Amini long askim olgeta opereta long stretim olgeta hevi bilong Teksu. Bikos dipatmen bai rausim laisens long wanem teksu i no putim gutpela bokis

i go moa long pes 3



Liptimapim gut. Ol hellkopta bilong Heli Niugini i gat bikpela nem long karim ol kago i go long sampela ples we i no gat rot olsem long ples maunten.

# 20<sup>FOOT</sup> CONTAINER SERVICE



## LAE/ MADANG/ WEWAK RETURN EVERY WEEK

25 TON SINGLE LIFT CAPACITY

### LUSHIP

LAE - LUSHIP

MADANG - LUSHIP

WEWAK - SEPIK COASTAL

Ph: 422066 Fax: 425806 Telex: 44172 P.O. Box 1459

Ph: 822577 Fax: 822180 Telex: 82726 P.O. Box 789

Ph: 862578 Fax: 862796 Telex: 86123 P.O. Box 118



# MBA - helpim tru bisnis bilong painim gol, kopa na wel long Papua Niugini

MILEN BE Airways (MBA) em balus bisnis kampani bilong Papua Niugini stret na i save helpim ol wok bilong main long kantri.

Em i save wokim ron bilong karim ol kago na oda bilong ol bisnis kampani. Tasol dispela i no wanpela wok bilong Milen Be Airways tasol. Nogat. Em i save karim tu ol pasindia.

Em i no save bihainim kain ron bilong ol arapela balus kampani. Olsem na em i ken helpim ol manmeri bilong go long wanem hap em ol i laikim long en. Em i save wok i go abrusim taim sapos bikpela wok bilong helpim ol manmeri i kamap.

Wanpela balus bilong Milen Be Airways i save lusim Mosbi olgeta moning na kamap long Lae long 4 klok apinun. Em i save karim niuspepa wantaim ol arapela oda bilong ol lain long Lae. Long neks moning, balus i save lusim Lae na kam bek long Mosbi.

MBA i save helpim ol wokman na meri bilong em long ol wok stadi bilong bisnis long graun na ol ron bilong balus. Em i save kisim ol turis raun, karim oda bilong ol hotel na stretim hevi bilong ol lain husat i kam nupela long kantri. Em i save helpim long stretim tu ples bilong kaikai na slip long ol kastoma bilong en.

Milen Be Airways i wok bung wantaim Kolumbia Helikopta grup bilong kantri Amerika. Dispela tupela kampani i gat 4-pela Boeing Vertol 107, ol bikpela helikopta bilong mekim wok bilong painim gol, kopa, wel na ol arapela samt-

ing bilong graun. Ol dispela helikopta i save karim samting olsem 4700 kilogrem hevi bilong kago na helpim Chevron Niugini na BP Exploration long karim ol bikpela masin bilong digim hul long graun.

Narapela helikopta bilong dispela tupela kampani em Boeing Chinook 234. Na em inap long karim 12,700 kilogrem hevi bilong ol samting.

MBA i gat gutpela nem long helpim ol maining kampani long Papua Niugini. Em i soim olsem em i ken mekim gutpela wok long kirapim kantri bilong yumi.

- MBA i gat nem long mekim ol bikpela wok na em bai helpim husat i gat hevi long wanem wok i sut long maining o karim na salim ol oda samting.

- Em i save ron long Papua Niugini yet na i save long wanem kain win, klaut na mak bilong graun long Papua Niugini. Mak bilong em i save stap long 14,000 fit long klaut.

- Ol balus bilong Milen Be Airways i ken senisim taim bilong flai sapos i gat planti askim i kam long ol kastoma. Wanpela balus i ken apim taim bilong en i go antap o daunim i kam daun bihainim askim bilong ol kastoma. Dispela senis i ken kamap long olgeta de bilong wok.

MBA balus kampani i bin stat long 1986 long Gurney ples balus long Milen Be provins.

Nem bilong kampani i kamap bihainim namba wan ples em i i go moa long pes 8



• Ol mekanik bilong Milen Be Airways i stretim wanpela balus bilong kampani i bagarap na sanap long haus balus.



**Nupela bris** • Dispela em i wanpela bilong ol planti nupela bris long Westen Hailans provins em ol ensinia bilong Westen Hailans Provinsal Gavman (WHPG) i wokim long en.

## Tok lukaut long ol tekksi

i kam long pes 2


bilong mita.

Dispela tok i lukaut kamap bikos Len na Trensport Bod i bin mekim sampela wok painimaut long pasin bilong sasim pasindia nating bikos tekksi i no gat gutpela mita.

Nau yet ol inspekta bilong

Trensport Bod i mekim wok painimaut yet long stapim kain pasin olsem long bihain taim. Amini i tok dispela wok bai lukluk long 73 tekksi husat i wok long siti. Planti bilong ol i no gat gutpela bokis bilong mita.

## Bridging THE Pacific



### Solomon Airlines

Fly Solomon Airlines the 'NEW SPIRIT' of the Pacific

GSA OFFICES:

<b>FIJI</b> Fiji Air Ltd. Tel. 31 4666 Suva	<b>NEW ZEALAND</b> World Aviation Systems Tel. (06) 79 4455 Auckland	<b>VANUATU</b> Air Vanuatu Ltd. Tel. (078) 9648 Port Vila	<b>PAPUA NEW GUINEA</b> Solomon Airlines Office Tel. (075) 25 5724 Port Moresby	<b>AUSTRALIA</b> World Aviation Systems Brisbane (07) 229 7813 Sydney (02) 231 1722 Melbourne (03) 921 1694
--	---	--	--	---

# Nupela Isuzu i gat strongpela bodi na bikpela pawa ensin

NEW Guinea Motors nau i gat wanpela nupela kain ka ol i wok long salim nau long plan-ti hap bilong Papua Niugini.

Dispela nupela ka i gat strongpela ensin na inap long mekim ol bikpela wok. Nau long PNG tude ol bikpela wok i kamap na PNG i laikim ol bikpela ka bilong mekim ol dispela wok. Long Hailans ol dispela ka i bikpela samting tru long karim ol hevi na kago long nambis i go antap long Hailans.

New Guinea Motors i luksave long dispela na nau i traim long painim ol ka na salim long ol dispela lain. Na em i painim olsem dispela nupela ka em i nambawan ka tru.

New Guinea Motors i save wokim dispela long wan wan yia. Em i save stadim gut tru ol kain kain hevi ol man i gat na bihain traim long painim kain ka we ol i ken baim na yusim long stretim dispela hevi bilong ol.

Dispela nupela ka em Isuzu na i gat 6x4 pawa long ensin bilong en. New Guinea Motors i traim tu long painim ol kain kain Isuzu. Ol kain Isuzu we i isi long stretim taim em i



• Nupela Isuzu 6x4 Hevi Duti Kontrol CXZ ka em New Guinea Motors i wok long salim nau long kantri.

*Nupela Isuzu 6x4 i gat narapela kain pawa bilong karim ol bikpela kago na i moa gutpela long ol kain ples olsem Papua Niugini. Em i gat kain kain stail bilong em yet we ol narapela ka i no gat long en.*

bagarap. Isuzu i gat gutpela kain ka. Dispela nupela ka tu i rekot na i winim ol narapela ken wokim wanem kain wok

yu laikim long en.

Olgeta ol gia bilong ka i stap ples klia na yu no inap long painim taim yu laik statim o stapim ka. I gat ol lait tu insait long kain kain hap bilong ka we i mekim isi long ol draiva long painim wanem gia na i laik mekim wanpela wok long nait. Stia i gat ol kain kain baten tasol em i mekim isi tru long draiva.

Sapos ples i kol ausait, i gat liklik hap bilong ka bai yu ken tanim bilong mekim yu hat. Na yu ken srukim nabaut sia bilong ka long wanem kain stail yu laikim long en. I gat ol gutpela kain matres long sia na tu kala long insait bilong ka i luk nais tru.

Niugini Motors i luksave tu olsem taim ol man i baim ka, ol i mas tok save olsem ol bai redi tasol long stretim ka gen taim em i bagarap long liklik prais.

I gat ol ples long sait bilong ka we ol draiva i ken sanap long en taim ol i laik wasim ka. Batri bilong ka tu i stap ausait tasol na dispela i mekim isi long ol man taim ol i laik

sekim. I gat ol kain masin tu bilong klinim ol win nogut. Taim insait bilong ka i doti, i gat belo bai krai na draiva bai save olsem i gat wanpela samting i bagarap.


Isuzu i gat strongpela ensin tru, na antap long dispela ol i putim gen narapela hap masin i go insait long dispela we i strong pinis na stap.

Ka i no hevi, tasol em i save mekim gutpela na bikpela wok tru. Ol man i wokim ka i stadim pinis wanem ol kain kain samting i save bai kamap long ka. Olsem na ol i traim long wokim olsem bai ol dispela kain hevi i no inap long kamap.


I gat ol kain kain samting long ka we i helpim ka long go bilong ol kain kain rot we i gutpela na i nogut. Ka i gat strongpela brek tru na i ken holim ka taim em i go daun long maunten o stap.

I gat ol narapela samting moa we yumi ken stori long ol tasol yumi mas stap long hia, bikos taim yu lukim dispela ka bai yu save tasol long dispela em i wanem kain ka.


Front panel early-warning indicators



Behind-dash fuse box



Quick-check see-through coolant tank



Inside-the-cab clutch fluid reservoir




Non-slip bumper steps



Air cleaner sensor



Longitudinal battery bays



## Kos bilong ol trenspot opisa

EITIN man na tripela meri opisa bilong Trenspot dipatmen i bin stap insait long wanpela wan wik kos long Edministretiv Koles long Mosbi.

Dispela kos i bin kamap na pinis long las wik yet.

Dispela ol opisa i bin wok wantaim ol arapela gavman dipatmen na ejensi long bipo. Tasol nau ol i trense na kam wok wantaim Trenspot dipat-

men. Na dispela kos i sut long as tingting bilong mekim ol i klia gut long wok bilong dipatmen.

Dispela em i namba wan taim tru bilong kain kos olsem long kamap bilong helpim ol opisa long luksave long ol sinia opisa bilong ol. Wankain kos bilong ol nupela woka bilong dipatmen i bin stat long dispela wik Mande.

BUY ONE, GET ONE

FREE!

Yes...Buy Any Tickets from

TNA Trans Niugini Airways

your Airline and go into a weekly Draw for a **FREE** Ticket up to the value of **K60** you **MUST** be in to **WIN..**



So Book "NOW"!

YAHOOO!!!

MI WINIM WANPELA FRI TIKET, YA!! EM NAU.. MI GO RAUN LONG PLES NA KAM BEK!!

Fax: 25 4791  
P.O. Box 3779 Brko  
Port Moresby

PH: 25 6183 *or*

# TNA balus i bilong helpim ol pipel bilong ples stret

## KAIRU LAHO i raitim

"SEVIS i go long ol kastoma em bikpela samting, olsem na mipela i tokaut long givim nambawan sevis i go long ol kastoma bilong mipela," menesing dairekta bilong Trans Niugini Airways (TNA), Gerard Phillip i tok olsem.

Trans Niugini Airways i sambai tasol long givim nambawan sevis i go long ol kastoma bilong em. Dispela em long karim ol pasindia na kago bilong stua i go long ol rurel eria bilong Koiari maunten eria, na i go insait long Goilala eria long Sentrel provins.

Narapela sevis TNA i save givim em long karim ol kaikai long Koiari na Goilala eria i kam long Mosbi.

"Mipela i traim sampela nupela samting tu, long givim ol sampela kain sevis long ol kastoma," Phillip i tok.

Nau yet kampani i painim pinis wanpela rot bilong amamasim ol kastoma, na long sem taim pulim moa pasindia. Long olgeta tiket ol

pasindia i baim, olgeta nem bai i go insait long laki dro na kampani i save makim wina long olgeta wik. Wina bai kisim wanpela fri balus tiket.

TNA i ranim bisnis bilong em long tupela mun nau. Na i kamap bikpela na givim gutpela helpim long ol pipel. Dispela em long ol pipel husat i stap long ol rurel eria.

TNA i save ron long hap bilong Maunten Koiari, na i karamapim 9-pela ples balus wantaim 8-pela long Goilala eria.

Planti ron bilong balus TNA i save wokim em long karim ol kaikai bilong gaden i kam long

Mosbi. Bikos dispela em i wanpela rot tasol bilong karim ol kago long hap i kam long Mosbi siti.

Long olgeta wik, TNA i save ron tupela taim i go long dispela ol hap. Goilala eria tasol em TNA i save wokim ron i go long Goilala long olgeta de.

TNA i save ron i go long ol arapela eria bilong Papua Niugini tu aninit long sata. Na tu em i save givim sevis long ol komesel o bisnis kampani.


Ol lokal pipel i saved lainim long we bilong yusim redio. Bikos ol i ken toktok wantaim het opis long Mosbi, na tokaut sapos de i gutpela long balus i ron o no gat.

Ol i save tokaut tu sapos ol pasindia i redi long kisim balus o nogat.

Nau yet TNA i gat tupela liklik balus. Na klostu bai em i kisim wanpela moa.

Phillip i bin wok wantaim Simbu Aviation kampani long bipo. Simbu Aviation em narapela liklik balus kampani. Tasol em i lusim Simbu Aviation na i statim dispela balus kampani bilong em yet. Em i bin ranim opis long Hailans, na i no long taim em i opim wanpela opis long Mosbi.

Phillip em i wanpela pilot. Na i bin stap long Papa Niugini long 1989 yet i kam inap nau. Em i bilong kantri Frans long Yurop.




• Menesing Dairekta Gerard Phillip.

Ol rot projek bilong narapela 10 yia

Hia em lista bilong ol rot em Nesenel Eksekutiv Kaunsil i tokaut olsem ol nesenel rot...

- Western province
- Kiunga-Tabubil road
- Institutional roads
- Gulf province
- Hiritano Highway: Malalua-Kerema
- Kanabea-Kaintiba
- Trans-Island Highway: Kaintiba-Malalua
- Kivori-Iokea
- Institutional roads
- Central province
- Hiritano Highway: Laloki river-Bereina
- Magi Highway: NCD border-Ganai
- Launakalana road: Magi Highway to Launakalana
- Hood Lagoon road: Launakalana-Hood Lagoon
- Porebada road: Napanapa road-Porebada
- Goldie river road: Hiritano Highway-Goldie Camp
- Rigo-Hula road
- Porebada-Boera road
- Lealea road
- Boku road: Boregaina-Wiga
- Kupiano road: Magi Highway-Kupiano wharf
- Sogeri road: NCD border-Sogeri National High School
- Sirinumu road: Sogeri road-Sirinumu dam
- Variarata road: Sogeri road-Variarata National Park Lookout
- Goilala road: Hiritano-Tapini
- Waima road: Bereina-Kivori
- Bebeo road: Hiritano Highway-Bebeo
- Inawauni road: Hiritano Highway-Inawauni
- Ma'akunga road: Inawauni-Ma'akunga
- Old Hiritano Highway: Ikiekina-Aropokina road
- Kore-Kelerakwa road
- Institutional roads
- Bereina-Malalua
- National Capital District
- Arterial roads
- Hubert Murray Highway: Konedobu-Tanubada
- Hiritano Highway: Moitaka T/O-Laloki river bridge
- Morea Tobo road: Hubert Murray Highway-Jacksons Airport
- Magi Highway: Morea Tobo road-Central border
- Dogura road: Inter-section to Taurama Barracks-Magi Highway
- Taurama road: Hubert Murray Highway (3 Mile traffic lights)-Taurama Barracks gate
- Waigani Drive to Champion Parade: 4 Mile (Hubert Murray Highway)-Gerehu-Baruni-Konedobu
- Napanapa road: Baruni road-Napanapa dockyard gate
- Institutional roads
- Milne Bay province
- Magi Highway: Alotau-Sagarai river
- Kaibola-Losua-Vakuta road
- Bwagaioia-Liak-Eaus-Gulewa
- Alotau-East Cape-Rabaraba-Sirisiri-Agaun
- Esa'ala-Miadeba-Pwanapwana
- Institutional roads
- Oro province
- Northern Highway: Popondetta-Bareji junction
- Popondetta town-CIS-NBC transmitters
- Popondetta town-Pati College

i go moa long pes 15



## PANGIA STEEL SUPPLIES

# SPRING MANUFACTURE

Pangia Steel Introducing an Exclusive First to P.N.G.

### (1) VEHICLE LEAF SPRING MANUFACTURE



DIGIT CONTROLLED PROCESS ENSURES HIGHEST QUALITY

IMMEDIATE SERVICE NO WAITING FOR PARTS

### (2) COIL SPRING MANUFACTURE



PRODUCTION RUNS OR SMALL QUANTITIES

SPECIAL SIZES OF HEAVY DUTY SPRINGS MADE TO ORDER

### (3) INDUSTRIAL HEAT-TREATING FURNACE TO 1000° CENTIGRADE

All sizes of motor vehicles spring manufacture repaired and reset at our Mt Hagen Production Factory

Pangia supporting PNG'S effort in Conserving Overseas funds by establishing Local Manufacturing Industry

**PHONE: 52 2812**

**P. O. BOX 152, MOUNT HAGEN, W.H.P; P.N.G**  
**PANGIA STEEL SUPPLIES MANAGER**  
**MR. CHRIS JENKINS**

## Kepten Gorohu - brukim solwara wantaim Consort

CONSORT Express Lines i bin amamasim 10-pela yia em kepten Frank Gorohu i bin stap na wok wantaim kampani olsem flit sinia masta.

Kepten Gorohu i bin stat wok wantaim kampani long 1981 na long dispela taim, em i holim wok olsem kepten bilong kampani sip, *M.V. Niugini Coast*.

Dispela olupela sip i stap winim 20 krismas nau na i save wok long kantri Nowe long hap bilong Yurop. Long dispela taim tu i no bin gat inap saveman bilong ronim dispela kain sip. Long wanem dispela ol kain sip i save mekim bikpela na strongpela wok bilong karim hevi kago samting.

Kepten Gorohu i traime olgeta strong na save bilong em long ronim dispela sip inap ol i kisim narapela we i bikpela na nupela gen.

Nupela sip kepten Gorohu i ronim gen em *M.V. Niugini Coast* na em i save wok i go long hap bilong Shangai long Saina long 1986.

Dispela sip em namba tri susa bilong *M.V. Madang Coast* na *M.V. Morobe Coast* em kampani i baim long 1986



Kepten Gorohu long haus bilong em.

na 1988.

Kepten Gorohu i stap kepten bilong sip na i save karim flak bilong Consort i go raun long ol kantri arapela olsem Saina, Manila, Singapo, Australia, Taiwan na Hong Kong.

Em i bin wok wantaim Consort Express Lines taim kampani i stat nupela yet. Long dispela taim em i kisim kampani i kam antap na helpim long givim trening long ol arapela yangpela kepten long kamap gutpela na strongpela kepten na bos bilong sip na solwara long bihain taim.

Bikpela amamas i go long kepten Gorohu long gutpela

wok bilong em na kampani i lukaut yet long strongim na skruim dispela gutpela wok bung wantaim i go moa yet long bihain taim.

Consot Express Lines bai mekim narapela bikpela samting gen long kepten Gorohu sapos em i stap yet na wok inap long narapela 10-pela krismas. Gorohu i givim bikpela tok amamas bilong em i go long menesmen na ol wokman bilong kampani long gutpela sapot na wok bung wantaim ol i givim long em long 10-pela krismas i kam inap nau. Na em i laik lukim dispela gutpela wok bung wantaim i go het yet.

## Ol rot projek bilong narapela 10 yia bai kosim samting olsem K648 m

i kam long pes 1

na Grin Riva i go long Vanimo long Sandaun provins.

Baset bilong Niugini Ailan rijon i bilong stretim na lukautim wanem ol rot nau i stap. Na tu long pinisim rot bilong bungim Nu Briten Haiwe long Bialla, Wes Nu Briten provins wantaim Rabaul long Is Nu Briten provins. Na bilong stretim hap rot bilong Kimbe i go olsem long Gloucester.


Olgeta rot bilong Hailans rijon i stap orait tasol na i gutpela moa. Bikpela wok nau i bilong lukautim na stretim tasol wanem samting i bagarap long Hailans Haiwe. Na bilong stretim tasol rot namel long Erave i go long Kikori na stretim ol rot i go long Karimui.

Narapela ol trenspot wok na program we i kam aninit long wok bilong main i stap wantaim maining Developmen Plen. Na ol maining kampani na arapela lain husat i wok long hap yet i lukautim dispela.

Tok piksa bilong dispela em long Poroma na Lek Kutubu rot. Dispela i stap aninit long han bilong Chevron Niugini kampani. Na wankain tu long dispela rot namel long Vanimo na Aitape. Dispela i stap long han bilong Vanimo Timbers.

Olgeta wanwe bris long ol bikpela haiwe, olsem long Hailans Haiwe bai kamap tuwe bris. Baset bilong Hailans Haiwe bai kos samting olsem K20 milien olgeta.






**POM TRANS**


# PORT MORESBY TRANSPORT

## RLC Freight Forwarding


# Moving You Into The 21st Century



Truck & Transport



Import Export Services




**CENTURY**  
GROUP OF COMPANIES

Port Moresby Transport Pty Ltd RLC Freight Forwarding

PO Box 916	PO Box 916
PORT MORESBY	PORT MORESBY
Tel: 25 1022	Tel: 21 4053
Fax: 25 8996	Fax: 21 4186

A joint venture between



*Steamships Pty. Ltd.*


Mr. Wayne Murray General Manager	Mrs. Anne Burgess Manager
-------------------------------------	------------------------------

# TOYOTA STOUT



## K13950

### BAIM TASOL NA DRAIVIM IGO!



NA HUSAT OL MAN MERI BAIM WANPELA STOUT KAR NEMEL LONG  
10 JULAI NA 31 OGUS 1991 BAI GO INSAIT LONG LAKI DRO RESIS  
BILONG WINIM WANPELA YAMAHA EF2500 JENEREITA. PRAIS BILONG  
JENEREITA INAP LONG MAK BILONG K1250!

HARIAP NAU - I NO PLANTI STOUT LONG  
DISPELA SPESEL K13950 DRAIVIM I GO PRAIS!  
LONG MT HAGEN TASOL

 **TOYOTA**

## Ela Motors

## Island Helicopters na Islands Aviation i gro wantaim ol pipel bilong PNG

WANPELA rot em Papua Niugini i save mekim wok bilong em long yusim ol balus long go long ol narapela hap bilong kantri.

I gat ol kain kain balus kampani nau i kamap long kantri. Balus tasol i kamapim bikpela senis namel long ol manmeri long kantri. Pastaim ol i save stap olsem tumbuna bilong ol nau i stap long nupela sindaun.

Sampela long ol man i save kamapim balus kampani em Parer, Mustar, Gibbs na planti ol narapela manmeri moa.

Musta i save karim ol masin bilong painim gol i go insait long Bulolo. Em i brukim nupela rekot bilong wok bilong balus long wol. Na ol narapela kampani i wok long go het yet long brukim rekot long nau em planti ol bikpela maining wok i wok long kamap.

Plani ol senis nau i wok long kamap long kantri na ol balus kampani i traim long bungim ol dispela senis tu long go het long karim ol sevis i go long ol hap bilong kantri.

Ol balus kampani i luksave long sampela hevi ol i gat. Kain hevi olsem i no gat inap saveman long mekim ol wok. Ol maining kampani nau i lainim ol wokman bilong ol yet. Dispela i no kamap long wan-

pela nait tasol.

Island Helikopta long Rabaul i wok long bihainim dispela rot nau. Islands Helikopta i givim trening long ol wokman bilong en na long wankain taim tu i save go het long karim aut ol sevis i go long ol komyuniti.

Olpela Praim Minista na nau namba tu oposisen lida, Sir Julius Chan i gat sea long Islands Helikopta. Sir Julius i luksave long kain gutpela bisnis bai dispela kamapim long Rabaul. Kain developmen nau i wok long kamap olsem Lihir Gol long Nu Ailan.

Ol kain bisnis olsem turisim, maining, ol liklik indastri bai kamap bikpela na bikos long dispela, i mas gat tu ol gutpela sevis ol balus i save mekim. Dispela em wanpela strongpela bilip bilong Sir Julius. Aninit long lukaut bilong em, em i wokim nupela woksop na bikpela ples bilong wetim balus long Rabaul. Ol paillet, enginia na ol narapela wokman bilong Islands Helikopta i wok bung wantaim na nau kampani i srukim wok bilong en i go long bikples olsem long Momase na Hailans.

Ol wel na maining kampani i luksave olsem helikopta i save mekim bikpela wok bilong ol tru. Olsem na ol i laikim planti ol helikopta moa na wanpela

long ol kampani i givim ol helikopta bilong em em Islands Helikopta.

Ol helikopta kampani nau i wok long srukim ol wok bilong ol i go bikpela long ol narapela hap bilong kantri. Nem bilong ol helikopta i wok nau em Islander na Cessna 206. Tripela ol Island helikopta i bes long Strickland Riva eria. Ol i wok kontrak wantaim SSL-Pecten Grup na ol i save karim 7,500 tan samting bilong kampani.

Bihain long dispela, wanpela balus i go long dispela eria. Kampani i kisim i go antap aem Carso-Prato. Balus i save karim ol samting bilong narapela kampani, Command Petroleum. Tupela helikopta bilong kampani tu i save karim ol samting bilong Highlands Gold na Elders Resources na Morobe provinsal gavman. Narapela helikopta gen i bes long Rabaul.

Nau Talair i no wok mao long ol planti ol rurel eria long kantri, ol helikopta nau bai mekim bikpela wok tru long kisim ples. Islands Aviation i go insait na yusim wanpela Twin Otter 300, tupela Islander, wanpela Baron na narapela Cessna 206.

"Dispela ol balus bai mekim ol kain kain wok," generel

menesa bilong kampani Tony Skelton i tok.

Skelton em siv paillet bilong Talair bipo na em i wok long PNG long 20 yia olgeta. Skelton i gat bikpela tingting long kisim ol paillet long wok em husat i gat moa ekspiriens.

Siv Enginia, David Morgan i wok long PNG moa long tenpela yia. Em i save gut tru long stretim ol balus nau Islands Aviation i gat. Em i bos na i gat narapela 8-pela man i wok aninit long em. Siv paillet em Greg Skerret. Em i kisim setifiket long flaim ol balus long ol narapela kantri na PNG wantaim. Wok bilong em long lukim bai ol paillet i karim aut ol sevis we i ken helpim gut ol kastoma.

Planti ol developmen i wok long kamap long kantri na ol balus kampani tu i resi. Na dispela i gutpela long ol kampani bikos dispela bai kamapim gutpela sevis namel long ol manmeri long komyuniti.

Dispela tu bai helpim wok bilong ol kain developmen long sait olsem wok bilong Turisim. Ol seaholda em Sir Julius na David Pidduck. David i olsem siaman bilong bot. Ol narapela dairekta em Ken Trezise OBE na pikinini bilong Sir Julius,

Byron. Sir Julius i gat nem long wok bisnis long kantri na em i wanpela long ol lida husat i pait long gutpela ikonomi bilong kantri long longpela taim tru.

Em i namba wan Fainens Minista na em i wok tu olsem Gavana bilong Asian Development Beng, Wol Beng na Intanesenel Monuteri Fan. Em i wok tu olsem minista bilong Praimeri Indastri insait long PNG Gavman. David Pidduck nau i go pas long lukautim wok bilong Turisim i go insait long Island Aviation.

## MBA helpim ol bisnis long Papua Niugini

i kam long pes 3

bin statim ol wok long en. Na dispela em long Milen Be provins yet.

Kampani i lusim opis bilong en long Milen Be na kam long Mosbi bikos i gat planti wok bisnis em i ken painim long Mosbi. Ol narapela liklik opis bilong Milen Be Airways i stap long Kikori long Galp provins na Mendi long Sauten Hailans provins.



**NUPELA NAMBAWAN SPESEL PE BILONG OL  
ISLAND AVIATION BALUS**

**RABAUL**

**DISPELA NAMBAWAN SPESEL PE BAI STAT LONG 24  
JULAI I GO INAP LONG 31 OGAS, 1991.**

Husat pasindia i ron long wanpela balus bilong Island Aviation nau baim ful pe tiket long wanem hap em ol balus bilong mipela i save ron i go o i kam long Rabaul bai kisim wanpela fri tiket bilong go bek long hap em yu kam long en, taim yu kamap long opis bilong mipela long Park Strit.

I gat tu sampela liklik samting bilong stretim pastaim long dispela i kamap. Toktok wantaim ol lain i lukautim tiket na ron bilong ol balus bilong mipela long Park Strit opis Rabaul long telipon namba 92 3500 o 92 3550.





RABAUL'S REGIONAL AIRLINE  
**REGULAR PASSENGER AND FREIGHT SERVICES**  
 SCHEDULE EFFECTIVE  
 24th July 1991

SCHEDULES ARE BASED ON  
 THE LATEST INFORMATION  
 AND ARE SUBJECT TO CHANGE  
 WITHOUT NOTICE  
 SUBJECT TO CAA APPROVAL

PHONE: RESERVATIONS: 92 3500  
 92 3550  
 CHARTERS: 92 2900  
 AIRPORT: 92 2879  
 92 2863

	MONDAY	TUESDAY	WEDNESDAY	THURSDAY	FRIDAY	SATURDAY
	FLT DEP FROM TO ARR	FLT DEP FROM TO ARR	FLT DEP FROM TO ARR	FLT DEP FROM TO ARR	FLT DEP FROM TO ARR	FLT DEP FROM TO ARR
	450 0730 RAB ATN 0750 451 0805 ATN RAB 0825	450 0730 RAB ATN 0750 451 0805 ATN RAB 0825	450 0730 RAB ATN 0750 451 0805 ATN RAB 0825	450 0730 RAB ATN 0750 451 0805 ATN RAB 0825	450 0730 RAB ATN 0750 451 0805 ATN RAB 0825	450 0730 RAB ATN 0750 451 0805 ATN RAB 0825
	470 0900 RAB TLO 0925 0935 TLO GOE 0955 1005 GOE JAQ 1010 471 1020 JAQ GOE 1025 1035 GOE TLO 1055 1105 TLO RAB 1130	474 0845 RAB BAA 0925 0935 BAA HKN 0955 1005 HKN KDR 1040 475 1050 KDR HKN 1125 1135 HKN BAA 1155 1205 BAA RAB 1245	470 0900 RAB TLO 0925 0935 TLO GOE 0955 1005 GOE JAQ 1010 471 1020 JAQ GOE 1025 1035 GOE TLO 1055 1105 TLO RAB 1130	460 0845 RAB ATN 0905 0920 ATN LNV 0940 0950 LNV MPU 1015 461 1025 MPU KVG 1105 1120 KVG RAB 1210	470 0900 RAB TLO 0925 0940 TLO GOE 0955 1005 GOE JAQ 1010 471 1020 JAQ GOE 1025 1035 GOE TLO 1055 1105 TLO RAB 1130	464 0900 RAB KVG 0955 1010 KVG MPU 1040 1050 MPU LNV 1110 465 1120 LNV BOV 1140 1150 BOV ATN 1220 1235 ATN RAB 1255
	496 1200 RAB IIS 1250 1305 IIS BUA 1330 497 1345 BUA US 1410 1420 US RAB 1505	490 1315 RAB BUA 1415 491 1430 BUA RAB 1530	490 1200 RAB BUA 1300 491 1315 BUA RAB 1415	490 1315 RAB BUA 1415 491 1430 BUA RAB 1530	490 1200 RAB BUA 1300 491 1315 BUA RAB 1415	490 1315 RAB BUA 1415 491 1430 BUA RAB 1530
	452 1530 RAB ATN 1650 453 1605 ATN RAB 1625	452 1600 RAB ATN 1620 453 1635 ATN RAB 1655	452 1530 RAB ATN 1550 453 1605 ATN RAB 1625	452 1600 RAB ATN 1620 453 1635 ATN RAB 1655	452 1530 RAB ATN 1550 453 1605 ATN RAB 1625	
	450 0800 RAB OPB 0825 0835 OPB ULE 0850 0900 ULE BAA 0915 0925 BAA HKN 0945 481 1010 HKN BAA 1030 1040 BAA ULE 1055 1105 ULE OPB 1120 1130 OPB RAB 1155	460 0800 RAB TLO 0825 0835 TLO GOE 0900 0910 GOE JAQ 0915 461 0925 JAQ GOE 0930 0940 GOE TLO 1005 1015 TLO RAB 1040	456 0930 RAB ATN 0950 1005 ATN BOV 1035 457 1045 BOV LNV 1110 1120 LNV ATN 1140 1155 ATN RAB 1215	476 0800 RAB TLO 0825 0835 TLO GOE 0900 0910 GOE JAQ 0915 0925 JAQ UVO 0950 1000 UVO FUB 1015 1025 UVO GMI 1040 1050 GMI KDR 1120 1130 KDR HKN 1205 477 1225 HKN KDR 1300 1310 KDH GMI 1325 1335 GMI FUB 1350 1400 FUB UVO 1415 1425 UVO JAQ 1446 1455 JAQ GOE 1500 1510 GOE TLO 1540 1550 TLO RAB 1615	456 0930 RAB ATN 0950 1005 ATN BOV 1035 457 1045 BOV MKN 1115 1125 MKN MGP 1140 1150 MGP RAB 1210	472 0800 RAB TLO 0825 0835 TLO GOE 0900 0910 GOE JAQ 0915 0925 JAQ UVO 0950 472 1910 UVO JAQ 1030 1040 JAQ GOE 1045 1140 GOE TLO 1205 1140 TLO RAB 1205
	468 1300 RAB MGP 1330 1340 MGP MKN 1400 1410 MKN BOV 1435 469 1445 BOV ATN 1515 1530 ATN RAB 1550	454 1300 RAB ATN 1320 1335 ATN LNV 1355 455 1405 LNV ATN 1425 1435 ATN RAB 1500			480 1300 RAB OPB 1325 1335 OPB ULE 1350 1400 ULE BAA 1415 1425 BAA HKN 1445 481 1505 HKN BAA 1520 1530 BAA ULE 1545 1555 ULE OPB 1610 1620 OPB RAB 1645	452 1330 RAB ATN 1350 453 1405 ATN RAB 1425

**AIRCRAFT AVAILABLE FOR CHARTERS:** BELL 206 LONG RANGER HELICOPTER, DHC6 TWIN OTTER, Britten Norman Islander, Beechcraft Baron B58 and Cessna 206. Competitive Cargo Rates. Computerised Reservation Bookings and reliable service to the Islands Region.

Check in time: 45 minutes before departure time.

ABBREVIATIONS	Gonalia	GOE	Londolovit	LNV	Namatanai	ATN
PORTS OF CALL	Hoskins	HKN	Malekolan	MKN	Open Bay	OPB
Biiala	BAA	Jacquinot Bay	JAQ	Manga	Rabaul	RAB
Boang	BOV	Kandrian	KDN	Mapua	Sule	ULE
Buka	BUA	Kavieng	KVG	Nissan Island	Tol	TLO
Fulleborn	FUB				Uvo	UVC
Gasmata	GMI					

**AIR NIUGINI ARE OUR AGENTS AT BOTH KAVIENG AND KIMBE FOR TICKET BOOKINGS**

## Fletcher Manufacturing i wok wantaim tingting bilong helpim Papua Niugini i gro

FLETCHER Manufacturing kampani i wok wantaim bikipela as tingting bilong sapotim ol bisnis na kain kain wok kamap insait long kantri. Kain ol bisnis em kampani i save wok wantaim i wok long kamap bikipela nau.

Fletcher Manufacturing i bin wokim planti bikipela haus samting pinis. Tasol dispela i no stapim wok bilong en long hap tasol. Em i go het moa long saplain na helpim ol arapela lain long kain kain samting bilong wok em ol i laikim.

Ol samting bilong kampani long yusim long wok na ol arapela bilong salim i save stap insait long kantri yet. Planti bilong ol dispela samting em bilong yusim long wokim ol haus samting nau long Papua Niugini.

Inap long 20 krismas nau, kain kain bikipela wok i bin kamap long Papua Niugini. Na Fletcher Manufacturing tu i bin kamap long sait na givim hap skel bilong en long kirapim ol wok na Papua Niugini long dispela taim.

Dispela em long ol kain wok olsem long Porgera gol main, Bogenvil kopa main, Ok Tedi maining, Kutubu wel, Yonki pawa saplain na planti ol arapela rot projek long kantri.

Kampani i gat ol kain kain masin na saveman na meri bilong mekim ol wok olsem ol ensinia, lukautim na ranim bisnis na ol planti arapela sait bilong wok.

Kampani i gat bikipela sapot bilong mekim ol wok ausait. Olsem na oltaim em i save redi tasol long wok na givim

helpim long olgeta man, meri na kampani wantaim ol arapela grup husat i laikim helpim bilong en.

Opis bilong Fletcher Manufacturing long Lae i bin mekim bikipela wok tru long kantri. Na tu em i bin givim planti wok long ol man na meri bilong Papua Niugini yet.


Fletcher Manufacturing em hap han kampani bilong ARMCO Intanesenel grup. Em i stap mekim ol kain kain wok inap long 100 yia pinis. Kampani i save mekim ol kain wok

olsem putim ain na paip long rot, banis na simen bilong wara i bihainim na ron stret na i no ken bagarapim rot na planti arapela kain wok olsem.

Olsem olgeta arapela bikipela kampani long kantri na wol, Fletcher Manufacturing tu i putim pinis olgeta wok samting bilong en long ol kompyuta masin. Na dispela i helpim tru long mekim ol wok i kamap isi na ol kastoma inap luksave gut long ol samting hariap.

Wok bilong kisim ol toktok samting long kompyuta i fri tasol na i no gat sas long en.

**Lokal bisnis - Ol pailot bilong Papua Niugini yet i save ronim olgeta balus bilong Nationalair. I no long-taim bai ol dispela lain pailot yet i ronim tu ol helikopta bilong kampani. Planti bilong ol i stap yet long treading. Long poto em wanpela pailot bilong Kimbe long Wes Nu Briten provins i lusim balus bihain long em i pinisim ron bilong em i go long Popondetta**



Fletcher Manufacturing provide the most comprehensive range of civil construction products and services available in PNG

HERE ARE A FEW... ■ Bridges

- Super-Span Grade Separation and Hydraulic Structures
- Bridge Decking
- Bridge redeck
- Large span formwork
- Caissons
- Culverts
- Steel
- Aluminium
- Geotextiles
- Escape Tunnels
- Mine Egress
- Building fire escape
- Guardrail
- Gabions
- Conveyor Tunnels
- Drainage
- Stormwater drains
- Embankment fluming
- Nestable half circle pipe
- Slotted surface drains
- Irrigation pipes,
- pipe arches and arches




For more information please contact our sales Manager MOGI WEI BE

FORMERLY ARCO (AUSTRALIA) PTY LTD. PHONE: 42 2666 TELEX: NE42422 FAX: 42 5640 P.O. BOX 845 LAE



Stretim gut • Nesenel Kapitel Distrik Komisn (NCDC) i save mekim bikipela wok tru bilong stretim ol rot long Mosbi. Na long poto, ol wokman i stretim rot stat long Jacksons ples balus na i kam olsem long 6 Mail. Wankain wok i kamap long planti arapela hap bilong siti.

## Hebou go pas long brukim graun



• • Hebou Construction kampani i winim pinis wanpela kontrak bilong wokim ol haus bilong ol wokman na meri bilong Australia Hai Komisn long Konedobu, Mosbi.

HEBOU Construction i winim pinis olsem wanpela bikipela kampani long Mosbi. Em i save givim bikipela helpim tru long brukim graun, digim baret na stretim na wokim ol rot long Mosbi.

HEBOU Construction i bin stat long 1973 na i stap wok long Papua Niugini long dispela taim i kam inap nau.


Sampela ol bikipela wok em kampani i bin mekim sotpela taim tasol i go pinis em long wok bilong nupela bikipela haus sik long Mosbi, ol pilai graun bilong 1991 SP Gems long Lae na Mosbi, na ol haus bilong Australia Hai Komisn long Konedobu.

HEBOU Construction i amas tru long planti lain wokman bilong en husat i bin stap wok wantaim kampani inap long planti krismas nau. Na planti bilong ol dispela lain i holim yet ol bikipela wok wantaim kampani. Dispela em ol kain wok olsem bosman, kuskus na ol arapela wok long opis.

Kampani i gat bikipela laik bilong go het na wok yet insait long Papua Niugini. Long wankain taim, bikipela tingting bilong en i stap tu long givim treading na lainim ol wokman bilong em yet long lukautim na holim ol bikipela wok bilong kampani long bihain taim.

## GENERAL AIR CONDITIONERS

**GENERAL PRESENTS THE LATEST IN SPLIT UNIT AIR CONDITIONERS.**



**Backed by Brian Bells**

**Quality Servicing & Spare Parts**

**Brian Bell Stores**

• BOROKO • LAE • GOROKA • MT HAGEN • RABAUL  
Ph:25 5411 Ph:42 1433 Ph:72 1098 Ph:52 1999 Ph:92 1966

A MAJOR SPONSORS OF 9TH SOUTH PACIFIC GAMES PAPUA NEW GUINEA 1991

# Heli Niugini i helpim long karim kago na pasindia tu

## MATUPIT DARIUS i raitim

Mi wok long sindaun toktok wantaim jenerel menesa bilong Heli Niugini, Horst Allmann i stap taim telipon i ring.

Man husat i ring i toktok long Pisin na tarangu bikman ya i no klia long wanpela samting. Olsem na em i givim mi telipon. Man husat i ring em wanpela kopi groa insait long bus bilong Saidor long Madang provins. Namel long

ples bilong dispela man na Saidor i no gat rot.

Na sapos em i kamap long Saidor tu, em bai wet gen wantaim bikpela kago kopi bilong em inap bot i kamap na bringim em wantaim kopi i kam long taun. Na long kamap long Saidor tasol, em bai brukim ol bikpela wara na kalapim maunten bilong kam kamap long Saidor stesin.

Dispela kopi groa i ringim Heli Niugini bikos kampani i helpim na stretim nau dispela

hevi bilong em long bringim kopi i kam long taun. Wanpela helikopta bilong Heli Niugini bai karim stret kopi bilong dispela groa long ples i kam olgeta long Madang taun. Na Heli Niugini i save sasim dispela groa long liklik mani tasol bilong baim wok ol i mekim long liptimapim kopi bilong em i kam long Madang.

Nau yet Heli Niugini i gat 9-pela helikopta. Na ol i stap wok namel long Morehead long Westen provins na Kimbe

insait long Wes Nu Briten provins. Em i bin statim wok long Papua Niugini long 1980. Tasol nem Heli Niugini i bin kamap long 1987. Na kirapim ol wok bilong en long Goroka.

Long dispela taim yet, wanpela bikpela helikopta kampani i bin kamap pinis long Goroka. Dispela kampani em Pacific Helicopters.

Long 1989, Heli Niugini i srukim het opis long Goroka i go long Madang bikos i gat gutpela ples bilong putim ol

helikopta bilong en long hap.

Heli Niugini i gat planti Bell helikopta. Allmann i tok dispela ol Bell 206 helikopta inap flai long longpela hap tru. Na tu em i ken karim moa long 7-pela pasindia. Liklik smok balus bilong en i ken karim 5-pela pasindia. Na Bell 212 i ken karim 12-pela pasindia



• Horst Allman

wantaim tupela pailot.

Narapela helikopta gen, Bell 214 i wanpela strongpela balus bilong karim ol hevi samting. Em inap karim ol samting hevi bilong ol i stap namel long tupela na tripela tan hevi. Na bikpela bilong dispela helikopta i ken karim 500 ton wantaim 5-pela pasindia.


"Mipela i kamap olsem namba wan kampani insait long Papua Niugini long yusim ol 214B helikopta," Menesing dairekta i tok.

Dispela ol 214B i wanpela gutpela masin bilong karim ol hevi samting. Planti kampani na kain kain grup insait long wol i save laikim long yusim dispela strongpela pawa helikopta. Na long kain kantri olsem Papua Niugini, dispela ol helikopta i nambawan stret. Ol dispela helikopta i stap mekim ol wok bilong painim wel nau long Morehead na Strickland eria long Westen provins.

"Heli Niugini i save wok bung wantaim wanpela kampani husat i save salim ol kain kain helikopta long ol kain hap olsem Papua Niugini. Na mipela i ken bringim ol dispela helikopta i kam insait long kantri long wanem taim em mipela i laikim long en," Allmann i tok.

Heli Niugini i gat 18 pailot husat i stap ronim ol helikopta bilong en nau. Na ol kastoma bilong mipela i kam olsem long ol hap bilong Maunten Kare, Ok Tedi, Pos na Telekomunikesen (PTC) na ol lain bilong Papua Niugini Difens Fos. Ol dispela lain i save yusim ol helikopta bilong mipela long mekim ol wok bilong ol.

Planti taim ol helikopta bilong Heli Niugini i save bringim ol teknisen bilong PTC i go long ol ripita stesin bilong ol. Na planti bilong ol dispela stesin i stap ausait long bikbus.



**GOODYEAR**  
The greatest name in tyres

## UNISTEEL ROAD LUG

Advanced drive axle tyre for maximum traction on heavy trucks primarily in off road applications.

The tread design offers excellent self cleaning characteristics and superior mileage performance.

Its compound is developed to withstand high speed in tough working conditions.

*See the complete line of over/off-the-road tyres by GOODYEAR*



**BOROKO MOTORS**  
THE GOOD GUYS FOR BEST BUYS



# Wanpela trakta na bikpela ka i statim Ambesugi

## MATUPIT DARIUS i raitim

BIPO long 1970, tupela lokal gavman kaunsil insait long Madang provins i gat bikpela tingting long kamapim wanpela kampani bilong wokim rot.

Tupela i no gat inap mani na samting bilong statim dispela kampani. Tasol narapela gavman kaunsil wanpela i gat

trakta na narapela i gat wanpela tipa trak. Na tupela i statim wok bilong stretim rot.

Nau, dispela kampani i gat 9-pela buldosa, 4-pela greda, tripela rola na 12-pela trak.

Dispela kampani em i wanpela bilong tupela nesenel kampani husat i mekim wok bilong rot long Madang provins. Nem bilong dispela kampani em Ambesugi Earthmoving Kampani Pty Ltd.

Dispela nem i kamap bihainim tupela nem bilong lokal gavman kaunsil ya. Ambenob na Sumgilbar Lokal gavman kaunsil em nem bilong tupela lokal gavman kaunsil ya.

Ambenob Lokal gavman kaunsil i stap klostu long Madang taun na Sumgilbar i stap long Not kos eria ausait long Madang taun. Ambesugi i bin winim wanpela bikpela kontrak tupela yia i go pinis. Dispela kontrak i bilong wokim

rot namel long Simbai na Aiome eria bilong Madang. Dispela tupela stesen i no gat rot.

Jenerel menesa Micheal Searson i tok kampani i bin bungim planti hevi taim ol i wokim rot namel long tupela ples ya. Em i tok ol i save kisim olgeta masin bihainim wara Ramu long taim bilong ren. Tasol long taim bilong san, wara i save drai na i no gat ol arapela rot bilong kisim

masin.

Taim kampani i panisim wok, em i mas wetim ren gen bilong rausim olgeta masin samting i go bek long ples bilong ol.

Nau yet Ambesugi i mekim gutpela wok bilong rot namel long Madang taun na ol arapela liklik ples we i no gat rot long en. Na tu i pulim gutpela winmani bilong tupela lokal gavman kaunsil long yusim na mekim wok bilong ol yet.

## Tambu long givim moa laisens bilong ol balus long ron

NESENEL minista i bosim wok na ron bilong ol balus, John Wauwia i tokaut long askim Sivil Eviesen dipatmen long givim nupela laisens long ol balus kampani.

Na wankain samting bai kamap tu long taim ol kampani i laik baim balus long ol arapela kantri.

Minista Wauwia i stapim olgeta laisens bikos em i bin harim planti komplek i kam long sampela kampani long nupela lo bilong gavman. Wauwia i tok em bai stapim ol nupela laisens inap dipatmen i bosim wok bilong ol balus i stretim olgeta hevi pastaim. Tasol minista bai toktok wantaim ol balus kampani long dispela nupela aplikesen em ol i laik kirapim long dispela yia.

"Mi save olsem planti balus kampani bai kros, tasol bai mi harim toktok na askim dipatmen long givim nupela laisens sapos mi lukim olsem aplikesen bilong ol i orait," Wauwia i tok.

Dipatmen i orait tu long tingting bilong stapim ol kampani long baim nupela balus. Long wanem, planti balus nau i stap long kantri i no gat laisens bilong Papua Niugini.

Minista Wauwia i tok taim nupela lo bilong CAA i kamap, ol kampani i baim planti balus pinis. Na dispela i winim tru mak em Papua Niugini i laikim long en.

Nau dipatmen i no gat inap ples bilong putim ol balus. Bikos nau yet i gat 284 balus i stap wok insait long kantri. Na minista i tok dipatmen bilong em i mas stretim dispela hevi hariap orait bihain gavman i ken rausim dispela lo.

Em i tok dispela nupela lo i no makim kampani husat i laik baim nupela balus bilong senisim olpela. Nogat. Dipatmen i tokaut long dispela lo bilong stapim ol kampani long baim moa nupela balus.

Nau yet em i askim olgeta balus kampani long stretim taim bilong ol balus. Na ol i mas kisim pasindia stret i go long wanem hap ol i laik kamap long en long wankain taim.

Specialists Exploratory Charters

Worldwide Executive Jet Charters

Nationwide Helicopter Charters

Specialists in Resource Support

NATIONAIR



NATIONAIR

Nationair  
PO Box 488  
Boroko NCD  
Papua New Guinea  
Phone: 25 4055 / 25 4381  
Fax: 21 3986  
Telex: STOLIP NE 23413

Mt Hagen  
Phone: 55 1577  
Fax: 55 1578  
Telex: STOLIP NE 52088  
Tari  
Phone: 50 8047  
Fax: 55 1578

# CONSORT EXPRESS LINES

PTY. LTD.

## PNG'S ONLY DEDICATED CONTAINER LINE

WITH WEEKLY EXPRESS SERVICE BETWEEN:



Port Moresby - Samarai - Alotau - Misima - Oro Bay - Lae - Kieta - Rabaul - Kimbe via Biella - Kavieng  
Also accepting break bulk cargo, unitised cargo and heavy lifts up to 25 tonnes

M.V. Morobe Coast - MV Madang Coast - MV Niugini Coast - MV. Maneba

"With the largest stock by far on the coastal trade of 4m<sup>3</sup>, 9m<sup>3</sup> and 20m<sup>3</sup> containers and on new reefer containers."

# Planti hap i no gat ol rot yet

I GAT planti hap bilong kantri em ol rot i no go kamap long ol ples em ol i mas go long en.

Dispela hevi nau i stap long bikpela Trans-Ailan Haiwe namel long Mosbi na Lae. Ol wokman i wokim rot stat long Mosbi i go inap tasol long Bereina na i no

go kamap long Aseki long Morobe provins.

Wanpela bikpela hevi em i gat planti ol maunten na tu tais wara. Planti long ol dispela hap em rot i no go long en i no gat planti man i stap. Dispela i wankain olsem long rot nau bai kamap long Galp na Sauten Hailans

provins.

Tasol sampela hap bilong Trans Ailan Haiwe i gat planti manmeri i stap long en. Em long hap bilong dispela rot namel long Bereina na Malalaua. I gat planti manmeri long dispela hap na tu i gat gutpela graun.

# Hamas ka samting i ron long rot

I GAT samting olsem 51,425 ka i ron nau long ol rot long olgeta hap bilong PNG tude.

Insait long dispela namba, 35 pesen em ol liklik ka na teks, 25 pesen em ol bikpela ka bilong mekim wok, 14 pesen em ol trak, 6 pesen em ol bas, 3 pesen em ol motobaik na wilwil na 7 pesen em

ol narapela kain ka.

I gat bikpela senis tumas long namba bilong ol ka i save ron long rot. Tasol i gat sampela liklik senis i kamap long Hailans Haiwe.

Longpela bilong Haiwe i stap olsem 600 kilomita na samting olsem 700 ka save i ron long en long wan wan de.

Insait long dispela

700 ka em 40 pesen bilong ol em ol kontena ka i save karim ol hevi kago i go antap long Hailans na ol bas.

Longpela bilong ol rot long ol narapela hap bilong kantri i bung em inap olsem 6,814.3 kilomita. Na i save gat namel long 100 na 250 ka i ron long ol long wanpela de.




# TALAIR

EM MIPELA TASOL

**40** Foa pela Ten Krismas

Wok Insait Long Papua Niugini



# Heli Niugini i helpim long karim kago na pasindia

"Mipela i save painim hevi long taim bilong wok sapos i gat bikpela ren. Na mipela i save bungim wankain hevi tu long moning na apinun bikos i gat planti maunten tumas," Allmann i tok.

Allmann i bin holim wok pas-taim olsem siev pailot bilong Heli Niugini. Bihain em i kisim nupela namba na i kamap

olsem menesing dairekta.

Tupela yia i go pinis, Heli Niugini i bin winim wanpela bikpela kontrak bilong wok wantaim Difens Fos. Long dispela taim i kam inap nau, Heli Niugini i salim ol pailot bilong en i go long flaim na stretim 4-pela helikopta bilong PNGDF.

Allmann i tok Difens Fos bai yusim pailot bilong Heli Niugini i go inap PNGDF i gat inap pailot bilong flaim ol helikopta bilong em yet. Na Heli Niugini

i bin amamas tru long winim dispela kontrak.

Allmann i tok bisnis bilong ranim na lukautim wok bilong ol helikopta long Papua Niugini i gutpela. Long wanem dispela kantri i pulap tru long ol bikpela maunten na wara. Na ol ka na narapela masin i no inap wok insait long ol dispela kain hap. Wanpela rot tasol i stap long han bilong ol helikopta.

Helikopta i ken givim helpim hariap long ol sikman, meri na

pikinini long ol ples insait tru long bikbus bilong kam na kisim marasin long taun.

Menesing dairekta i skruim toktok olsem fi bilong kisim ol helikopta i kam insait long kantri tu i bikpela. Olsem na kos bilong helikopta bisnis i bikpela tu.

Sampela taim ol helikopta bilong Heli Niugini i save karim kopi bilong ol groa long ol ples longwe i kam long taun. Na ol i save sasim liklik mani.

Tasol Allmann i tok, kos

bilong ron em ol helikopta i mekim i stap bihainim longpela bilong ples. Sapos ples i no stap longwe, kos bai i liklik. Na sapos helikopta i mekim longpela ron bilong balus, kos bilong baim balus tu bai i go antap moa yet.

I tru olsem prais bilong kopi na ol narapela samting long Papua Niugini i go daun. Tasol ol groa i no gat narapela rot bilong salim wanem samting ol i planim. Wanpela rot tasol i stap yet em long yusim ol helikopta.

## Ol rot projek bilong narapela 10 yia

i kam long pes 5

Kokoda road: Pongadetta-Kokoda  
 Pongani-Afore  
 Pongani-Bareji  
 Institutional roads  
 Southern Highlands province  
 Southern Highlands Highway: WHP border-Mendi  
 Koroba road: Mendi-Koroba  
 Oksapmin road: Koroba-Kopiago  
 Kutubu road: Iaria-Pimaga  
 Erave road: Kisenepoi-Ialibu-Kagua-Erave  
 Kandep-Murihu-Sumia-Kagua  
 Tari road: Tari-Komo-Bosavi  
 Institutional roads: DPI Tea roads included  
 Kopiago-Oksapmin  
 SHP-Gulf road: Samberigi-Kikori  
 Enga province  
 Enga Highway: WHP border-Wabag  
 Porgera road: Wabag-Porgera  
 Laiagam-Mendi road: Laiagam-Winja  
 Institutional roads  
 Western Highlands province  
 Highlands Highway: EHP border-Togoba  
 Souther Highlands Highway: Togoba-SHP border  
 Enga Highway: Togoba-Enga border  
 Baiyer road: Mt Hagen-Baiyer R-Ruti  
 Kagamuga Airport road  
 Institutional roads  
 Chimbu province  
 Highlands Highway: EHP border-WHP border  
 Bundi Highway: Imwan Pass border-  
 Keglsugl-Gembogl-Kundiawa  
 Kerowagi access road: Highlands Highway-Police  
 Institutional roads  
 Karimui-Dega (Nomane)  
 Eastern Highlands province  
 Highlands Highway: Young Creek-Simbu border  
 Aiyura access road: Kainantu-Aiyura NHS  
 Institutional roads  
 Dunanti-Dumpu  
 Morobe province  
 Highlands Highway: Lae-Young Creek  
 Ramu Highway: Watarais junction-Gusap  
 Trans-Island Highway: Highlands Highway T/O-Bulolo  
 Bulolo-Aseki-Kaintiba  
 Institutional roads  
 Madang province  
 Ramu Highway: Gusap-Madang  
 Coastal Highway: Madang-Awar  
 Bundi Highway: Yakomba-Braham-Bundi-  
 Imwan Pass border  
 Karkar ring road  
 Madang-Saidor  
 Institutional roads  
 East Sepik province  
 Coastal Highway: Angoram-Wewak-West  
 Sepik border  
 Sepik Highway: Passam-Bonges (West  
 Sepik border)  
 Hayfield-Pagwi  
 Institutional roads  
 West Sepik province  
 Coastal Highway: East Sepik border-  
 Romei-Black Water-Vanimo-Wutung  
 Sepik Highway: East Sepik Border-  
 Karaitem  
 Vanimo-Green river road: Vanimo-Ainbai  
 Vanimo-Green River road: Dio Landing-  
 Dio Crossing  
 Institutional roads  
 Manus province  
 Momote road: Lombrum-Momote  
 Lolak road: Kombil bridge-Lolak bridge  
 East-West road: Lorengau-Bundralis  
 Institutional roads  
 New Ireland province  
 Buluminski Highway: Kavieng-Namatana  
 Kaut road: Putput-Kaut  
 Namatana-Huris  
 Institutional roads  
 East New Britain province  
 New Britain Highway: Tunnel Hill-Gaulim  
 Warongoi road: Burmah road-Warongoi  
 Korere road: Nonga-Foleap-Rapindik  
 Tokua road: Kokopo-Tokua Airstrip  
 Institutional roads  
 West New Britain province  
 New Britain Highway: Bakada-Kimbe  
 Talasea road: Kimbe-Talasea  
 Hoskins road: Mai-Hoskins  
 Koimomu road: Hoskins-Koimomu  
 Institutional roads: (DPI roads included)  
 Kimbe-Gloucester road  
 North Solomons province  
 Buka road: Arawa-Buka  
 Aropa road: Tunuru-Aropa  
 Institutional roads

## STD CALLS IN PNG ARE CHEAPER

### AT NIGHT & ALL DAY SUNDAY

#### STD CALLERS ....

Do you know you can **SAVE** on STD calls in Papua New Guinea ?

#### HERE'S HOW.

When you ring between **6pm and 6am** at **NIGHT** and anytime on **Sundays...**

You save **HALF** of the cost on normal STD call charges, from the comfort of your home.



Post & Telecom  
 Keeping you in touch by phone

# Mosbi Hire i wok gut tru long salim ol samting bilong yusim long sotpela taim

## KAIRU LAHO i ratim

BAIM samting bilong yusim long sotpela taim tasol na givim bek i gutpela. Bikos dispela i no inap givim yu hevi bilong holim samting em yu laik yusim long sotpe'a taim tasol.

Na long pinisim dispela kain laik em Mosbi Hire. Dispela kampani i save salim samting long ol kastoma bilong yusim

long wokim ol haus na arapela konstraksen wok long sotpela taim tasol. Taim ol i pinis, kastoma i ken bringim i go bek. Na bisnis i ron gut tru.

Long dispela kain gutpela wok na pasin, Mosbi Hire i opim pinis wanpela opis long Hagen. Ol i kolim dispela opis olsem Hailans Hire, na i no longtaim, em bai opim gen narapela opis long Moro long Tari, Sauten Hailans provins. Mosbi Hire i bin stap wok

long kantri inap long 5-pela yia nau. Nem bilong em i autim wanem kain bisnis em dispela kampani i save mekim. Bikpela wok bilong Mosbi Hire em long salim ol samting bilong wokim haus na ol arapela konstraksen wok long sotpela taim tasol. Em i save mekim wok tu olsem mausman o ejen bilong ol Makita na Ramset tuls em ol i salim long sorum bilong ol long Hohola. Long nau yet, Mosbi Hire

tasol i save mekim ol dispela kain bisnis bilong salim ol samting bilong yusim long wok long sotpela taim tasol, na bihain givim bek.

"No gat wanpela arapela lain i resis wantaim mipela. Olsem na mipela i givim sevis bilong amamasim ol kastoma bilong mipela," man husat i go pas long dispela wok William Walimu i tok.

Papa bilong kampani em menesing dairekta yet, Greg



• Man husat i go pas long ol wok, William Walimu.

Bates. "Greg i bin luksave olsem i gat planti lain i laikim kain sevis olsem. Na i no longtaim, wantaim gutpela save bilong em long wok kamda, bisnis bilong Mosbi Hire i stat," Walimu i tok.

I gat 12-pela wokman na meri i wok long Mosbi opis. Na long planti taim, olgeta dispela lain i save wok bung wantaim. Em i gat wanpela woksap tu bilong sekim na stretim olgeta samting em i salim bilong yusim long sotpela taim. Na ol wokman i ken go stret long ples we wok i kamap long en na sevisim o stretim ol samting.

Ol i bin opim narapela han bilong ol long Hagen las yia. Na man husat i lukautim opis long Hagen em Gabriel Pora.

Long namba wan taim, Pora i bin stat wok em wanpis. Na opis bilong em i bin liklik tru. Tasol ol kastoma i wok long kapsait na i no longtaim, ol i opim gen narapela bikpela opis. Na narapela tripela man gen i kam wok na helpim Pora.

"Hailans Hire em wanpela kampani tasol i lukautim Hailans rijon. Olsem na mipela i save givim sevis long olgeta lain hia. I no gat narapela bisnis moa," Pora i tok.

"Kain sevis nau mipela i givim i gutpela tru bilong helpim ol lain long ples. Sapos wanpela man long ples i laik wokim haus na em i laikim wanpela samting, em i no inap go stret long wanpela stua na baim samting bilong wokim haus we i ken kosim em K3,000 o K4,000. Long wanem em bai yusim tasol dispela samting long sotpela taim. Olsem na i mobeta long em i baim dispela samting bilong yusim sotpela taim tasol na givim bek," Pora i tok.

Hailans Hire i save helpim ol liklik lain bilong ples i go inap long ol bikpela kampani olsem Placer Pacific.

"Bisnis bilong kampani i wok long go het gut tru na i luk olsem mipela bai kam antap yet. Hagen em i stretpela hap bilong stap bikos em i stap namel stret long olgeta Hailans provins," Pora i skruim toktok.



Hailans Hire i save salim tu ol masin na arapela samting bilong yusim long sotpela taim i go long Ok Tedi na Lae.

## FROM THE GROUND UP!

We hire almost everything for Building & Maintenance. Contact MOSBI HIRE 25-1333 OR HAILANS HIRE 52-1333 for quick, friendly service.




AND THE SKY'S THE LIMIT!




• Ol tripela mekanik ya, Peter, Sito na Roy i taitim bun long wok i stap.



• Wari i soim sampela samting i stap long sorum bilong Mosbi Hire long Hohola. Ol poto: Misako Elemlah.



• Man bilong lukautim ol lektrik wok, Kepas i stailim bilong em tu.



• Selsmen bilong Mosbi Hire, Kenneth Wari i soim ol kastoma rot bilong yusim dispela masin bilong apim ol samting.



# CURTAIN STAR

## JOINT VENTURE




Curtain Star Joint Venture as the major contractor at OK TEDI helps to serve the interests of the preferred area people.

Curtain Star specialises in Earthworks and Road Maintenance but as general contractors is able to turn its hand to just about anything. Some of the varied types of works undertaken in the Province to date are:-

- General Plant Hire
- Operation of Concrete Batching Plants
- Any concrete works to be installed
- Operation of Road Base and metals crushing plants
- General Freight
- Bulk Fuel Haulage
- Bridges and Culverts
- Water Pipelines - Slurry Pipelines
- Pioneering and construction of new roads


### HEAD OFFICE

P.O. Box 46  
Tabubil Western Province  
Ph: 58 9077 OR 58-9039  
Fax: 589208

### BRANCH OFFICE

KIUNGA  
Ph: 58-1025  
Fax: 581061

# Nambawan Hevi Duti.



CXZ - 18J - 24  
6X4 PRIME MOVER

CXZ - 18J - 22  
DUMP

Isuzu i no kusai long kolim wanpela ka "Hevi Duti". Bodi i strong, inap ron long olgeta hap, no gat wari long ples nogut, strongpela na pawa ensin, giabokis na pawa bilong stia. Em inap stap longtim na wok yet.

I gat wanpela hevi duti Isuzu bilong yu yet, na yu yet i ken kisim wanem ka em yu laikim. Wanpela tu, foa o siks wil draiv. Autim tingting bilong yu.

Olsem na sapos yu toktok long hevi duti, traim Isuzu long New Guinea Motors. Nambawan long ol hevi duti ka: Tokim ol olsem Lu i salim yu!



**NEW GUINEA  
MOTORS**

PORT MORESBY  
25 3644

RABAU  
92 1022

KIMBE  
93 5191

TABUBIL  
58 9048

LAE  
42 3477

MT. HAGEN  
52 1152

ALOTAU  
61 1005



# Ol Las Paraka pipel bilong Westen Hailans bai kisim rot bilong ol yet

## JULIE BENGI i raitim

WOK i kamap nau long Togoba lalibu rot. Dispela em i wanpela bikpela sevis na developmen insait long Sauten na Westen Hailans provins.

Dispela rot em hap bilong nesenel haiwe long Togoba i go long Nebilyer Veli insait long hap bilong Westen Hailans provins i go long lalibu distrik long isten sait bilong Sauten Hailans provins. Nebilyer na lalibu em tupela eria we i gat planti pipel tru.

Wanpela kampani bilong Is Korea i wokim nau dispela rot. Kampani ya i kisim tok orait bilong Papua Niugini gavman bilong wokim dispela wok. Kampani i yusim sampela ol kain kain nupela masin long mekim dispela rot.

Ol i wokim dispela vot bihainim avasis stail stret. Olsem na taim olgeta wok i pinis, ol pipel husat i yusim bai i tru.

Gavman na Papua Ningini bai i kisim helpim tu long dispela rot. Bikos ol bikpela projek olsem bilong wel na ges bai i yusim dispela rot.

Na 40 kilomita i go longwe long saut bilong dispela haiwe i gat sampela 200 pipel. Ol dispela pipel i bilong Wes Kambia. Dispela em wanpela rurel eria stret bilong Westen Hailans provins we i gat bikpela bus na maunten.

Wanpela rot tasol bilong kamap long Hagen taun em long wokabaut. Ol i save wokabout long planti aua tru na kamap long bikpela haiwe, pastaim long ol i kisim PMV na go long Hagen.

Ol arapela sevis olsem skul, et pos na misin stesin i save yusim helikopta tasol.

Bikpela hevi bilong ol Las Paraka pipel em i no gat wanpela gutpela rot i bungim ol.

I hat tru long bringim developmen i go long eria bilong ol. Bikos long bikpela bus, maunten na wara. Wara Nebilyer i brukim Nebilyer Veli na Wes Kambia.

Tupela yia i go pinis, wanpela ensinia grup i go mekim ol wok painimaut bilong lukim sapos ol i ken wokim wanpela rot i go long hap. Dispela grup em wanpela bisnis han bilong Westen Hailans Provinsal Gavman.

Bekim bilong dispela wok em wanpela 17 kilomita rot wantaim 200 mita ain bris em klostu bai i pinis nau.

Gavman bilong Mara i bin toktok long wokim dispela rot. Tasol no gat wanpela samting i bin kamap inap 1989, taim Kapal gavman i redim mani bilong dispela projek. Nau yet dispela gavman bin tromoi K180,000 olgeta long dispela projek.

Tasol dispela projek i pinis, em bai i kos samting olsem hap milien kina olgeta (K500,000).

Dispela 17 kilomita rot i stat long Pabrabug na i go insait

long sampela eria we no gat rot i bin go long en bipo. Ol pipel long maunten i muv i kam pinis na stap klostu long rot ya.

Eria i gat planti bikpela maunten na i hat tru long wokim rot. Tasol wantaim gutpela save bilong wanpela ensinia bilong Viktoria, Kevin Wilkinson, olgeta dispela hatwok i karim kaikai nau.

Ol wokman i yusim danaimait long brukim sampela hap bilong maunten. Dispela em long rot i go daun

long maunten klostu long hap ol i wokim bris nau.

Planti taim tru ol man i yusim, wantaim hatwok long wokim dispela bris gut. Bikos arere bilong wara i gat planti ston, na i go daunbilo tru.

Long narapela sait em ol i wokim narapela 5 kilomita rot long han tasol. Dispela em long helpim buldosa long ron i go na mekim wok.

Taim wok bilong sanapim bris i pinis, ol bai wokim hap-sait rot i go olgeta long Gomi. Gomi em wanpela gavman

stesin tasol we i save lukautim wanpela skul na et pos.

Bikpela hevi nau em long kisim ol samting bilong wok i go long hap wok i kamap nau. Bikos i gat planti bikpela hevi wantaim ren. Na tu i no gat inap mani.

Dispela projek i olsem narapela 12-pela i kamap nau insait long provins. Planti bilong ol dispela projek i traim long bungim ol ples we i no gat rot i go long en.

Narapela program em long wokim rot long Gomi i go long

Maunten Au long Is Kambia eria. Dispela em wanpela provinsal gavman projek. Olsem na mani bilong dispela projek bai i kam long provinsal gavman.

Westen Hailans provinsal gavman ensiniering divisen i bin kamap long 1981, aninit long lukaut bilong Mara gavman. Bikos gavman i laikim olsem em yet i mas lukautim ol developmen program long provins.

Long 1986, wok bilong dispela divisen i go bikpela.

# PNG's only business newspaper

PNG

# BUSINESS

40¢

Inc. PNG Trade Monthly



## AUGUST issue on sale now at your favourite newsagency

- POM
- Jacksons News
- Boroko News
- Tabari News
- Post News
- Steamships



1. Andersons Foodland - Rabaul
2. Arawa Enterprises - Rabaul
3. Bulae News - Lae
4. Arawa Enterprises - Lae
5. John Forsters - Mt Hagen
6. T Tam Yan - Madang
7. Arawa Enterprises - Goroka



***BENSON***  
*and*  
***HEDGES***



*Government Warning  
Smoking is Dangerous to Health*

# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.